

MECLİS-i MEŞÂYİH DEFTERLERİ

6

PROJE YÜRÜTÜCÜSÜ

HASAN KAMİL YILMAZ

EDİTÖRLER

HASAN KAMİL YILMAZ

AYHAN IŞIK

MELİHA AYDINLI



Türkiye Diyanet Vakfı Yayınları Yayın No. 1567
İSAM Yayınları 277
Başvuru Eserleri Dizisi 55
© Her hakkı mahfuzdur.

MECLİS-i MEŞÂYİH DEFTERLERİ 6. Cilt

Proje yürütücüsü Hasan Kamil Yılmaz
Editör Hasan Kamil Yılmaz, Ayhan Işık, Meliha Aydın
Yayın danışmanı İsmail Kara, Bilgin Aydın



TDV İslam Araştırmaları Merkezi (İSAM)
tarafından yayına hazırlanmıştır.
İcadiye-Bağlarbaşı Cad. 38 Üsküdar / İstanbul
Tel. 0216. 474 08 50
www.isam.org.tr yayin@isam.org.tr

Yayın yöneticisi Yaşar Çolak
Yayın editörü Mustafa Demiray
Proje koordinasyon Arzu Güldöşüren
Çeviri yazı ve özet Ayhan Işık, Meliha Aydın
Mukabele Esra Yıldız, Beşir Şen, Ömer Karadağ, Meliha Aydın
Özetlerin redaksiyonu Rabia Aydın
İmla İnayet Bebek
Grafik uygulama Ender Boztürk
Kapak tasarım Hasan Hüseyin Can

Bu eser
TDV İslam Araştırmaları Merkezi'nin (İSAM)
Meclis-i Meşâyih Defterleri Projesi
kapsamında yayımlanmıştır.

Bu kitap
İSAM Yönetim Kurulu'nun
29.08.2025 tarihli ve 2025/07 sayılı kararıyla basılmıştır.
Birinci Basım: İstanbul, Eylül 2025
ISBN 978-625-428-799-2 (Tk.)
978-625-428-805-0 (6. Cilt)



Basım, Yayın ve Dağıtım
TDV Yayın Matbaacılık ve Tic. İşl.
Ostim OSB Mahallesi, 1256 Cadde, No. 11
Yenimahalle / Ankara
Tel. 0312. 354 91 31 Faks. 0312. 354 91 32
bilgi@tdv.com.tr
Sertifika No. 48058

Meclis-i Meşâyih defterleri / ed. Hasan Kamil Yılmaz, Ayhan Işık, Meliha Aydın. -
İstanbul ; Ankara : İslam Araştırmaları Merkezi (İSAM) ; Türkiye Diyanet Vakfı, 2025.
6. c. (626 s.) ; 28 cm. - (Türkiye Diyanet Vakfı Yayınları ; 1567. İSAM Yayınları ; 277.
Başvuru Eserleri Dizisi ; 55)
ISBN 978-625-428-799-2 (Tk.) 978-625-428-805-0 (6. Cilt)

MECLİS - i MEŞÂYİH
DEFTERLERİ

1740
Numaralı
Müzekkire ve Derkenâr
Defteri

1740 NUMARALI MÜZEKKİRE VE DERKENÂR DEFTERİ

IST_MFT_MSH_DFT02_01740_0001-0001-0001-02¹

Silivrikapı'da Seyyid Nizâmeddin ve Seyyid Seyfullah dergâhlarının şeyhleri Seyyid Kenan ve Seyyid Turhan efendilerin nâiblerinden Mustafa Efendi'nin niyâbete devamına ve Adli Efendi'nin azline karar verilmesi.²

Bâb-ı Fetvâ Meclis-i Meşâyih									
Târih-i Tesvîd		Müsevvid	Evrak Odası	Husûsî Numarası			Umûmî	Târih-i Tebyîz	
Arabî	Rumî							Arabî	Rumî
-	-	-	-	-	-	-	41	Fî 18 Rebî'ülâhîr sene [1]339 [30 Kasım 1920]	Fî 29 Kânûn-ı evvel sene [1]336
Mazbata Silivrikapı civârında kâin Seyyid Nizâmeddin ve Seyyid Seyfullah efendiler hazerâtı dergâh-ı şerîfleri şeyhleri sagîrân Seyyid Kenan ve Seyyid Turhan efendilerin nâibleri Şeyh Adlî ve Şeyh Mustafa efendilerin adem-i ehliyetlerinden ve sagîrân-ı mezbûrânı dergâha ve taht-ı terbiyelerine almamakta olduklarından ve alsalar bile terbiyeye gayr-i muktedir bulunmağla dergâhları benimsemek için çocukları cehle sevk edeceklerinden bahisle azilleriyle yerlerine tarîkat-ı alîyye-i Şa'bâniyye'den ve erbâb-ı iktidârdan Şeyh Edhem Efendi'nin kabûl ettiği vechile hasbî olarak ta'yîni istid'âsına dâir sagîrân-ı mûmâ-ileyhimâdan Kenan Efendi'nin vâlidesi Halide ve Turhan Efendi'nin vasîsi Sâlih imzâlarıyla bi't-takdîm havâle buyurulan merbût arzuhâller birleştirilerek kırâet olunması üzerine nâib-i mûmâ-ileyhimâ Şeyh Adlî ve Mustafa efendiler celb ve keyfiyyet tebliğ ve istîzâh-ı madde olundukta Şeyh Mustafa Efendi nâib bulunduğu dergâha henüz vaz'-ı yed ettirilmediğinden bu gibi şikâyâta mahal olamayacağı ve Meclis'in mukarrerâtına münkâd bulunduğunu ifade ve Adlî Efendi ise kendisini dergâh-ı mezkûrda asâleten şeyh bilip mirâren tebliğ kılınan ve o yolda berât-ı âlî-şân sudûr eden niyâbet kararını kabûl etmediğini ve bu husûstan dolayı Kazaskerlik Mahkemesine mürâca'at ettiği cihetle menûbu dergâha ve taht-ı terbiyesine almamakta olduğunu ve almayacağını beyân etmiştir. Kuyûda lede'l-mürâca'a kutbû'l-ârifin Seyyid Nizâmeddin Dergâh-ı şerîfi meşîhat cihetleri mutasarrıf Şücâeddin Efendi'nin bilâ-veled-i zükûr vukû'-ı vefâtıyla meşîhatleri her nasılsa münhal addolunarak Seyyid Nizâm Dergâhı meşîhati mûmâ-ileyh Adlî Efendi'ye ve Seyyid Seyfullah Dergâhı meşîhati Hâfız Mustafa Efendi'ye bi'l-asâle tevcih olunmuş iken bi'l-âhare her iki cihet seyid-i müşârun-ileyh evlâdına meşrût olduğu ve evlâddan sagîrânı mûmâ-ileyhimâ Kenan ve Turhan efendiler mevcûd bulunduğunu kayden ve hükmen sâbit olduğuna binâen ciheteyn-i mezkûreteynin asâleti mûmâ-ileyhimâ Adlî ve Mustafa efendilerin uhdelerinden bi'r-ref' niyâbetleriyle sagîrân-ı mûmâ-ileyhimâ uhdelere tevcih olunup ol bâbda Meclis-i dâ'iyânemizden tanzim ve takdîm kılınan ve mu'âmele-i câriyyenin bidâyetinden hitâmina kadar Fetvâhâne-i âlî ve mehâkim ve Şûrâ-yı Evkâf ve devâir-i sâirece geçirdiği safahâtını izâh eden fî selh-i Ramazan sene [1]337 ve fî 1 Temmuz sene [1]335 târihli ve 18 numaralı mazbata makâm-ı sâmi-i Cenâb-ı Meşîhat-penâhîlerinden tasvîb-i âliye iktirân ederek mücebince berât-ı âlîleri istâr buyurulmuş ve mûmâ-ileyh Adlî Efendi'nin vekîli tarafından Meclis-i dâ'iyânemiz kararına vukû' bulan i'tirâz üzerine dosyaları aldirılarak Şûrâ-yı Devletce ba'de't-tedkîk karâr-ı vâkî' muvâfık-ı usûl ve nizâm görûnerek sûreti merbût mazbata ile tasdîk edilmiş olduğu ve keyfiyet şûrâ-yı müşârun-ileyhâdan Evkâf-ı Hümâyûn Nezâret-i celîlesine de bildirilmiş bulunduğu anlaşılmıştır. [0002] İcâb-ı keyfiyyet lede'l-müzâkere mûmâ-ileyh Şeyh Mustafa Efendi kürsî şeyhi ve Buhârî-i şerîf sâhib-i ciheti bulunup niyâbet-i mezkûrenin ifâsına kifâyeti bulunmakla fi'l-hakîka dergâh-ı mezkûra henüz vâzî'u'l-yed bulunmadığından mezkûr Seyyid Seyfullah Efendi Dergâhında fuzûlî ikâmet etmekte olanların tahliyesiyle mûmâ-ileyhin ve nâibi bulunduğu sagîrin iskânı ve Adlî Efendi ise Meclis-i Meşâyih Nizâmnâmesi'nin ikinci ve dokuzuncu maddeleri mücebince tekâyâ ve zevâyâya âid cihâtın tevcih ve ref'i ve bi'l-umûm mu'âmelâtı Meclis-i Meşâyih'e mevdû' ve münhasır bulunması münâsebetiyle tedkîkât-ı amîkâsı bi'l-icrâ hall ü fasl ve neticeye iktirân ettirilmiş ve i'tirâz etmeleri üzerine Şûrâ-yı Devletce de tedkîk ve tasdîk edilmiş bir cihet için mahkemeye mürâca'at ettiğine dâir ifâde-i ta'lîliyyesi ve niyâbet kararına ve berât-ı âlisine mutî' olmadığını ve mütevellî Kenan Efendi'yi dergâha kabûl etmeyeceğini sûret-i kat'îyyede beyân ve ityân etmesi ve aradaki nizâ'n temâdîsi işbu arzuhâllerdeki iddî'âları te'yîd ve mûmâ-ileyh hakkındaki tevcihât-ı sâbika her nasılsa bilâ-imtihân olması iddî'â-yı mezkûru teşyîd ve niyâbetten maksûd olan hikmet fevt olduğundan niyâbetten nefsinî iskât etmekle niyâbet-i mezkûrenin mûmâ-ileyh Adlî Efendi uhdesinden ref' şart-ı vâkîf ve nizâmnâme ahkâmına tevfiikan ehil ve münâsibine tevfiiz tensîb ve tezekkür edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde matbata-i dâ'iyânemizin işâret-i alîyye-i Cenâb-ı Fetvâ-penâhîleriyle tevşîh buyurulmak bâbında. Mehmed Haşim, Sîret, Cevdet, Remzî, Vahyî, Mustafa, Seyyid Mehmed es-Sükûtî									

- 1 Tabloda bulunan başlıklar, diğer kararlarda tekrar edilmeden bu bilgi sırasına göre verilmiştir.
- 2 Defterlerde atlanan bazı kararlar, ilgili kararın devamı niteliğinde metnin içinde geçmektedir ya da orijinalinde bulunmadığı için aslına bağlı kalınarak verilmemiştir.

IST_MFT_MSH_DFT02_01740_0001-0001-0003

Çarşamba'da Kefevî Camii meşihat cihetine mutasarrıf Şeyh Vasfi Efendizâde Abdülkâdir Efendi'nin vefatı üzerine, yerine Şeyh Hacı Edhem Efendi'nin asaleten tayini.

Fî 12 R. sene [1]339 / Fî 23 Kânûn-ı evvel sene [1]336 / - / Hüsâm / - / - / - / 40 / Fî 16 Rebî'ülâhîr sene [1]339 [28 Kasım 1920] / Fî 27 Kânûn-ı evvel sene [1]336

Mazbata

Tarîkat-i aliyye-i Nakşibendiyye'den Çarşamba civârında kâin Kefevî Câmî'-i şerîfindeki meşihat cihetinin Şeyh Vasfî Efendizâde Abdülkâdir Efendi'nin sinni hadd-i nizâmîye vusûlüne değin Şeyh Hacı Edhem Efendi tarafından bi'l-vekâle ifâ-yı hizmet olunmakta iken fî 23 Teşrîn-i evvel sene [1]336 târihinde mûmâ-ileyh Abdülkâdir Efendi'nin bilâ-veled vukû'-ı vefâtına mebnî münhal olan cihet-i mezkûrenin vekîl-i mûmâ-ileyhin asâleten uhdesine tevcihi tarîkat-i Nakşibendiyye'den Murad Molla Dergâhı postnişini Halid Efendi tarafından bâ-takrîr ve tarîkat-i Nakşibendiyye'den mücâz kürsî meşâyihinden Mustafa Efendi cihet-i mezkûrenin uhdesine tevcihini bâ-istid'â istirhâm olunmuş ve bi't-taleb ihrâc olunan Evkâf-ı Hümâyûn Kuyûd-ı Vakfiyye Müdiriyyeti'nin kaydında İstanbul'da Kefevî Mahallesi'nde kâin câmî'-i şerîfte haftada bir gün âyîn-i tarîkat-i aliyye-i Nakşibendiyye üzere icrâ-yı hatm-i hâcegân etmek şartıyla ber-vech-i hasbî meşihat ciheti fî 18 Cumâdelûla sene [1]327 târihinde Şeyh Vasfî Efendi'ye ve onun vefâtıyla mahdûmu Abdülkâdir Efendi'ye vekâleten tevcih kılındığı ve mukayyed vakfiyesi olmadığı beyân edilmiş ve müsted'î-i mûmâ-ileyh Mustafa Efendi muahharan cihetin hasbî olması ve süknâsı bulunmaması cihetiyle huzûr-ı Meclis'te istid'âsından nükûl etmiş olmasına binâen keyfiyyet lede't-tezekkür başka tâlib olmadığı ve bu gibi hasbî veya vazifesi kalîl cihâtın tevcihinde Cihât Nizâm-nâmesi'nin kırk dokuzuncu maddesine nazaran salâh-ı hâl kâfi bulunduğu ve mûmâ-ileyh Şeyh Hacı Edhem Efendi ise salâh-ı hâl ashâbından ve tarîkat-i aliyye-i Nakşibendiyye'den mücâz ve müstahlef olduğu ibrâz ettiği vesâikten anlaşıldığı cihet-i mezkûre vesâir vekâletleri hüsn-i sûretle ifâ-yı hizmet eylediği münâsebetiyle sâlifü'l-arz câmî'-i şerîfteki münhal cihetin müteveffâ-yı mûmâ-ileyh Abdülkâdir Efendi mahlûlünden vekîl-i mûmâ-ileyh Şeyh Edhem Efendi uhdesine tevcihi tensîb edilmekle muvâfık-ı re'y-i rezîn-i isâbet-karîn-i hazret-i Fetvâ-penâhîleri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması zımında işbu mazbata-i dâ'iyânemizin bâ-tezkire-i aliyye Evkâf-ı Hümâyûn Nezâret-i celîlesine tesyâ[r] buyurulması bâbında emr ü fermân.

Mehmed Haşim, Sîret, Cevdet, Remzî, Mustafa, Seyyid Mehmed es-Sükûtî

Yazılmıştır Hüsâm

IST_MFT_MSH_DFT02_01740_0001-0001-0004

Şehremini'nde Remlî Dergâhı postnişini Şeyh Hafız Hüseyin Hâlis Efendi'nin vefatı üzerine, meşihatın Kabakulak diğer ismiyle Alîme Hatun Dergâhı postnişini Hakkı Efendi'nin niyâbetiyle müteveffanın oğlu İlhamî Efendi'ye tevcihi.

Fî 18 Ra. sene [1]339 / Fî 29 Teşrîn-i sâni sene [1]336 / Hüsâm / - / - / - / - / 39 / 20 Rebî'ülevvel sene-i minhü [2 Aralık 1920] / 1 Kânûn-ı evvel sene [1]336

(Vakfiyede meşihat şartı olmadığı)

Mazbata

Şehremîni civârında kâin tarîkat-i aliyye-i Kâdiriyye'den Remli Dergâh-ı şerîfi postnişini Şeyh Hâfız Hüseyin Halis Efendi'nin vukû'-ı vefâtına mebnî münhal olan meşihat cihetinin sin-ni haddi-i nizâmîsine vâsıl ve bi'n-nefs ifâ-yı hizmete kesb-i liyâkat edinceye değin vazife-i meşihatın Kabakulak nâm-ı diğer Alîme Hatun Dergâh-ı şerîfi postnişini Şeyh Hakkı Efendi niyâbetiyle uhdesine tevcîhi müteveffâ-yı mûmâ-ileyhin mahdûmu İlhami Efendi tarafından takdîm olunup havâle buyurulan arzuhâl ileistirhâm olunması üzerine bi't-taleb Evkâf-ı Hümâyûn Kuyûd-ı Kadîme-i Vakfiyye İdâresi'nden muhrec der'uhde ve vakfiye kayıdları sûretlerinin mütâlâ'asından dergâh-ı mezkûrun meşihat ciheti fî 25 Cumâdelâhire sene [1]328 târihinde Hâfız Hüseyin Halis Efendi'ye müvecceh olduğu anlaşılmıştır. İcâbı lede'l-müzâkere müsted'î-i mûmâ-ileyh İlhami Efendi henüz sinnen hadd-i nizâmîyi ikmâl etmediğinden tahsîl-i ulûm ve seyr-u sülûkünü ikmâl ederek bi'l-fi'il ifâ-yı hizmete ehliyetini isbât edinceye değin vazife-i meşihat ecille-i ricâl-i Kâdiriyye'den mûmâ-ileyh Şeyh Hakkı Efendi tarafından bi'n-niyâbe ifâ olunmak üzere cihet-i mezkûrenin mûmâ-ileyh İlhami Efendi uhdesine tevcîhi tensîb edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdirde mu'âmele-i mukteziyye ifâ ve berât-ı âlî tastîr ve i'tâ olunması husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Sîret, Remzî, Vahyî, Mustafa, Seyyid Mehmed es-Sükûtî

IST_MFT_MSH_DFT02_01740_0001-0001-0005-6

Yenibahçe Karabaş Mahallesi'nde Mahmud Bedreddin Efendi Dergâhı postnişini Şeyh İsmâil Efendi'nin vefatıyla, meşihate Şeyh İzzeddin Efendi'nin tayini.

Fî 16 Ra. sene [1]339 / Fî 27 Teşrîn-i sâni sene [1]336 / - / - / - / - / 38 / Fî 23 Rebî'ülevvel sene [1]339 [5 Aralık 1920] / Fî 4 Kânûn-ı evvel sene [1]336

Mazbata

Yenibahçe kurbünde Karabaş Mahallesi'nde kâin tarîkat-i aliyye-i Uşşâkiyye'den Mahmud Bedreddin Efendi Dergâh-ı şerîfi postnişini Şeyh İsmâil Efendi'nin fî 25 Temmuz sene [1]336 târihinde vukû'-ı vefâtına mebnî inhilâl eden meşihat cihetinin uhdesine tevcîhi kebîr mahdûmu Cemil Efendi tarafından bâ-arzuhâl taleb ve istid'â olunması üzerine Meclis-i dâ'iyânemiz ifâdesiyle sebk eden iş'âr-ı âliye cevâben Evkâf-ı Hümâyûn Nezâret-i celîlesinden vârid olup havâle buyurulan fî 4 Zilhicce sene [1]338 ve fî 19 Ağustos sene [1]336 târihli ve 129709 husûsî 105 numaralı tezkireye melfûf der'uhde ve vakfiye kayıdları sûretlerinin mütâlâ'asından dergâh-ı mezkûrun meşihat ciheti fî 28 Rebî'ülevvel sene [1]317 târihinde kutbü'l-ârifin Hüsameddin-i Uşşâkî hulefâsından eslahı olan müteveffâ-yı mûmâ-ileyh Hâfız İsmâil Efendi'ye tevcîh olunduğu ve bin yüz yetmiş dokuz târihiyle müverrah ve mukayyed vakfiyede vâkıf-ı mûmâ-ileyh Bedreddin Efendi zâviye-i mezkûre meşihati evvelâ kendisine ve ba'de vefâtihî evlâd ve evlâd ve evlâd-ı evlâd-ı evlâdının batnen ba'de batnin eslahına ve ba'de'l-inkırâz hulefâ ve hulefâ-i hulefâsının eslahına ve ba'dehüm Kasımpaşa'da medfûn gavsü'l-vâsılın ve kutbü'l-ârifin Hüsameddin-i Uşşâkî hulefâsından eslah bir kimesneye şart eylediği ve evlâdiyla hulefâsının inkırâzına mebnî vakfiyedeki şart-ı sâlise tevfiқан cihet-i mezkûre müteveffâ-yı mûmâ-ileyhe tevcîh edildiği anlaşılmıştır.

Îcâbı lede'l-müzâkere a'zâdan Emir Buhârî Dergâh-ı şerîfi postnişîni Mustafa Sabri Efendi vâkıfın evlâd ve hulefâsı mukaddemâ munkarız olmasına mebnî vakfiyesi mücebince Hüsâmeddin-i Uşşâkî Hânkâh-ı şerîfi hulefâsından müteveffâ Şeyh İsmâîl Efendi'ye tevcih olunmasıyla vâkıfın şart-ı sâlisî tatbîk edilmiş olup ondan sonra vukû' bulacak inhilâlde tekrar hânkâh-ı mezkûr hulefâsına tevcihine mahal olmayıp müteveffânın oğlu henüz yirmi iki yaşında olup [0006] sinn-i nizâmîsini ikmâle daha sekiz sene bulunduğundan otuz yaşına vusûlünde ehliyetini isbât etmek şartıyla oğluna intikâli lâzım geleceği re'yinde bulunmuş ise de meşihat-i mezkûre cihât-ı meşrûtadan olup müsted'î-i mûmâ-ileyhin evlâd-ı vâkıftan ve Hüsâmeddin-i Uşşâkî Âsitânesinin eslah ve erşed hulefâsından bulunmadığı ve binâen-aleyh cihet-i meşihatın kendisine tevcihi şart-ı vâkıfa mugâyir olacağı cihetle istid'âsının tervîc olunmaması zarûrî bulunmağla ber-müceb-i şart-ı vâkıf pîr-i müşârun-ileyh âsitânesi hulefâsından münâsibinin inhâsı taleb olundukta eslah ve erşed hulefâ olduğu azîz-i müşârun-ileyh hânkâh-ı şerîfi postnişînlîği tarafından inhâ olunan ve cihet-i mezkûreye tâlib olan icâzet ve ehliyeti Meclis-i dâ'iyânemizce de musaddak ve meşrûtün-leh bulunan Şeyh İzzeddin Efendi uhdesine tevcihi ekseriyyet-i ârâ ile tensîb edilmiş ve müteveffâ Şeyh İsmâîl Efendi'nin haremi hanımın ber-hayât olup tezevvüc etmedikçe iskânıyla mûmâ-ileyh tarafından vikâyesinin berât-ı âliye derc buyurulması muvâfık-ı emsâl görülmüş olmağla sûret-i ma'rûza rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması husûsunun işbu mazbata-i dâ'iyânemizin leffiyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Sîret, Remzî, Vahyî, Seyyid Mehmed es-Sükûtî

Yazılmıştır Hüsâm

IST_MFT_MSH_DFT02_01740_0001-0001-0007

Eyüp'te Mihrişah Sultan Türbesi hatm-i hâcegân ciheti sahibi Mehmed Hâşim Efendi'nin vefatı üzerine, cihetin Şah Sultan Dergâhı mensuplarından Hafız İsmâîl Efendi b. Şeyh Hafız İbrâhîm Efendi'ye tevcihi.

Fî 3 Rebî'ülevvel sene [1]339 / Fî 14 Teşrîn-i sâni sene [1]336 / Hüsâm / - / - / - / - / 37 / Fî 16 Rebî'ülevvel sene [1]339 [28 Kasım 1920] / Fî 17 Teşrîn-i sâni sene [1]336

Mazbata

Hazret-i Ebâ Eyyûb el-Ensârî -radiye anhü'l-Bârî- civârında kâin firdevs-âşiyân Vâlide Mihrişah Sultân Türbe-i Şerîfesinde beher hafta Pazar ve Perşembe günleri ba'de edâ-yı salâti'l-asr kırâet ve icrâsı meşrût olan hatm-i hâcegân ve zikir ve tevhîd cihâtı ashâbından Mehmed Hâşim Efendi'nin vukû'-ı vefâtına mebnî inhilâl eden hatm-i hâce cihetinin Şah Sultân Dergâh-ı şerîfi mensûbîninden Hâfız İsmâîl Efendi'ye tevcihi mezkûr Şah Sultân Dergâh-ı şerîfi postnişînlîğinden inhâ ve Şeyh Murad Dergâh-ı şerîfi postnişîni tarafından tasdik olunmuş ve cihet-i münhallenin Şah Sultân Dergâhı mensûbîninden olan müteveffâ-yı mûmâ-ileyhten inhilâl etmesine mebnî ber-müceb-i şart-ı vâkıf yine dergâh-ı mezkûr mürîdânından ehline tefvîz olunması vakfiye-i ma'mûlün-bihâ ahkâmından bulunmuş olmasına binâen sâlifü'l-arz münhal hatm-i hâcegân cihetinin bi'l-imtihan ehliyeti tebeyyün eden mûmâ-ileyh Hâfız İsmâîl Efendi b. Şeyh Hâfız İbrâhîm Efendi uhdesine vazife-i mu'ayyenesiyle tevcih buyurulması tensîb

edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i kaydiyyesi îfâ ve berât-ı âlîsi tastîr ve îtâ olunması zımında mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Mehmed Haşim, Sîret, Remzî, Mustafa, Seyyid Mehmed es-Sükûtî

Yazılmıştır Hüsâm

IST_MFT_MSH_DFT02_01740_0001-0001-0008

Kocamustafapaşa'da Mihrişah Hatun diğer adıyla Hacı Kadın Dergâhı postnişini Şeyh İsmâîl Sadeddin Efendi'nin vefatıyla meşihatın, Mirahor Dergâhı postnişini Şeyh Mehmed Vahyî Efendi'nin vekâletiyle müteveffanın oğlu Receb Efendi'ye tevcihi.

Fî 15 Z. sene [1]338 / Fî 31 Ağustos sene [1]336 / Hüsâm / - / - / - / - / 36 / Fî 16 Reb'ülevvel sene [1]339 [28 Kasım 1920] / Fî 27 Teşrîn-i sâni sene [1]336

Mazbata

Kocamustafapaşa civârında tarikat-i aliyye-i Halvetiyye-i Sünbüliyye'den Mihrişah Hatun nâm-ı diğer Hacı Kadın Dergâh-ı şerîfi postnişini pederi Şeyh İsmâîl Sadeddin Efendi'nin vukû'-ı vefâtına mebnî inhilâl eden meşihat cihetinin uhdesine tevcihi müteveffâ-yı mûmâ-ileyhin mahdûmu Receb Efendi tarafından takdîm olup havâle buyurulan arzuhâlde taleb ve istirhâm olunmuş ve Evkâf-ı Hümâyûn Kuyûd-ı Vakfiyye İdâresi'nden muhrec kaydında dergâh-ı mezkûrun yevmî beş akçe vazîfe ile meşihat ciheti fî 11 Receb sene [1]317 târihinde İsmâîl Sadeddin Efendi uhdesine müveccih bulunduğu anlaşılmış ve mûmâ-ileyh Receb Efendi henüz sinen hadd-i nizâmîyi ikmâl etmediğinden tahsîl-i ulûm ve seyr-u sülûkunu ikmâl ederek bi'l-fi'l îfâ-yı hizmete ehliyetini isbât edinceye değin vazîfe-i meşihat, ecille-i meşâyih-i Sünbüliyye'den Mirahor Dergâh-ı şerîfi postnişini Şeyh Mehmed Vahyî Efendi tarafından bi'n-niyâbe îfâ olunmak üzere cihet-i mezkûrenin mûmâ-ileyh Receb Efendi uhdesine tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye îfâ ve ol vechile berât-ı âlî tastîr ve îtâ olunması husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Sîret, Cevdet, Remzî, Vahyî, Mustafa, TevfikYazılmıştır Hüsâm

IST_MFT_MSH_DFT02_01740_0001-0001-0009-10-11-11A

Beşiktaş'ta Şeyh Yahya Efendi türbedarı ve hankahı postnişini Hasan Hayrî Efendi'nin vefatıyla, yerine büyük oğlu Mustafa Neşet Efendi'nin tayini.

Fî 24 Z. sene [1]338 / Fî 9 Eylül sene [1]336 / - / - / - / - / - / 35 / Fî 28 Zilhicce sene [1]338 [12 Eylül 1920] / Fî 13 Eylül sene [1]336

Mazbata

Beşiktaş'ta kâin kutbü'l-ârifin Yahya Efendi Türbe-i şerîfesi türbedarı ve Hânkâh-ı şerîfi postnişini Hasan Hayrî Efendi'nin fî 18 Ağustos sene [1]336 târihinde vukû'-ı vefâtına mebnî inhilâl eden mezkûr meşihat cihetinin uhdesine tevcihi müteveffâ-yı mûmâ-ileyhin kebîr mahdûmu Mustafa Neşet Efendi tarafından istid'â olunması üzerine cereyân eden muhâbere neticesinde Evkâf-ı

Hümâyûn Nezâret-i celîlesinden mürsel ve Meclis-i dâ'iyânemize muhavvel kayıd sûretinde mezkûr hânkâhın meşihat cihetine dâir bir sarâhat olmayıp ancak hânkâhta türbedârlık ve müstahfiz-ı türbe cihetleri müteveffâ-yı mûmâ-ileyhin uhdesinde olduğu mukâbele ve hatm-i şerîf du'âları esnâsında cennet-mekân Bezmiâlem Vâlide Sultan hazretlerinin isimleri yâd olunmak üzere hânkâh-ı mezkûrda türbedâr olup postnişini bulunan zevâta müşârun-ileyhâ vakfından şehri yüz gurus vazîfe muhassas bulunduğu beyân olunmuş ve muhassasât-ı mezkûrenin postnişini nâmıyla müteveffâ-yı mûmâ-ileyhe i'tâ olunmakta olduğu mübriz berât-ı âlîşânın mütâla'asından anlaşılmıştır.

İcâbı lede'l-müzâkere mütâla'a olunan berevât-ı âliyye meâllerine ve Meclis ve Kuyûd-ı Mevkûfe idâresi kayıdlarına nazaran mine'l-kadîm dergâh olan türbe-i şerîfe-i mezkûrede ayrıca meşihat ciheti mevcûd olmamakla beraber türbedâr bulunan zât tarafından tarîkatı aliyye-i Nakşibendiyye usûl ve erkânı üzere zikrullâh îfâ olunageldiğine ve müsted'î-i mûmâ-ileyh ise vezâif-i mezkûreyi hüsn-i îfâya muktedir ashâb-ı salâhtan olduğuna binâen türbe-i şerîf-i mezkûrede îfâsı te'âmül olan tarîkat-ı aliyye-i mezkûre usûlünü îfâ etmek üzere mezkûr türbedârlık cihetinin müteveffâ-yı mûmâ-ileyhin mahlûlünden mûmâ-ileyh Mustafa Neşet Efendi uhdesine tevcihi tensib edilmekle rehîn-i tasvib-i âlî-i Cenâb-ı Meşihat-penâhileri buyurulduğu takdîrde mu'amele-i lâzime îfâ ve berât-ı âlî i'tâ olunmak üzere işbu mazbata-i dâ'iyânemizin leffiyle nezâret-i müşârun-ileyhâya tezkire-i aliyye şeref-tastîr buyurulması bâbında.

Sîret, Remzî, Seyyid Mehmed es-Sükûtî, Vahyî, Mustafa, Tevfik

[0011A]

Beşiktaş'ta Şeyh Yahya Efendi türbedarı ve hankahı postnişini Hasan Hayri Efendi'nin vefatıyla yerine büyük oğlu Mustafa Neşet Efendi'nin tayin talebine dair dilekçesi.

Hüve

Huzûr-ı âlî-i Cenâb-ı Meşihat-penâhî'ye

Ma'rûz-ı dâ'î-i dirîneleridir

Beşiktaş'ta kutbü'l-ârifin Yahya Efendi'nin dergâh-ı şerîfi postnişini pederim Hasan Hayri Efendi'den münhal olan meşihat cihetinin uhde-i dâ'iyâneme tevcihi vesâilinin istikmâli zım-nında işbu arzuhâl-i dâ'iyânemin Meclis-i Meşâyih'e havâle buyurulması bâbında emr ü fermân hazret-i veliyyü'l-emrindir.

Fî 6 Zilhicce sene [1]338 ve fî 21 Ağustos sene [1]336 [21 Ağustos 1920]

Merhûm-ı müşârun-ileyhin mahdûmu Mustafa Neşet

[0011]

Meclis-i Meşâyih-i kirâma fî 6 Z. sene [1]338 [21 Ağustos 1920] / İstid'â 962

135

Beşiktaş'ta kâin kutbü'l-ârifin Yahya Efendi hazretleri dergâh-ı şerîfi meşihat cihetinin pederi merhûm Şeyh Hasan Hayri Efendi'nin mahlûlünden uhdesine tevcihi istid'âsına dâir Mustafa Neşet Efendi tarafından takdîm olup havâle buyurulan işbu arzuhâl kıraet olundu.

İktizâsı ba'dehû teemmül ve arz olunmak üzere evvel emirde dergâh-ı mezkûr meşihat cihetiyle meşihate meşrûta cihât-ı sâirenin der'uhde kayıdlarıyla vakfiyesinin bi-ibâretihâ sûret-i

musaddakalarının serî'an irsâli zımnında mazrûfen Evkâf-ı Hümâyûn Nezâret-i celîlesine irsâl buyurulması tezekkür kılındı ol bâbda emr ü fermân hazret-i men lehü'l-emrindir.

Fî 6 Zilhicce sene [1]338 ve fî 21 Ağustos sene [1]336 [21 Ağustos 1920]

Meclis-i Meşâyih

Tevfik Mazrûfen Evkâf-ı Hümâyûn Nezâret-i celîlesine 21 minhü.

Kuyûd-ı Vakfiyye Müdüriyyeti'ne fî 23 Ağustos sene [1]336

Evkâf-ı Hümâyûn Kuyûd-ı Vakfiyye Müdüriyyeti

23 Ağustos sene [133]6 [23 Ağustos 1920]

C 2004 / 2984 / Vakfiye / 600

[0010]

Beşiktaş'taki Şeyh Yahya Efendi Türbesi'nin türbedarlığına ait vakfiye şartlarını bildiren Kuyûd-ı Kadîme-i Vakfiyye Müdüriyetinin tezkiresi.

Bihî

NEZÂRET-İ EVKÂF-I HÜMÂYÛN

Kuyûd-ı Vakfiyye Kalemi

Numara 2984

Aded

Makâm-ı âlî-i hazret-i Meşihat-penâhî'ye bi't-takdîm mazrûfen tevdî' buyurulan merbût arzuhâl zahrına Meclis-i Meşâyih-i Kirâmdan yazılan derkenâr müfâdına nazaran tedkîkât-ı kaydiyye lede'l-icrâ Beşiktaş'ta Beşiktaşlı merhûm Yahya Efendi Türbesinin şehri yetmiş beş gurus vazîfe ile türbedarlığı 15 Zilhicce sene 1289 ve cennet-mekân Sultân Mahmud Hân-ı sâni hazretleri evkâf-ı şerîfesinden şehri elli gurus vazîfe ile müşârun-ileyh Yahya Efendi hazretleri türbesinin diğer türbedarlığı ile şehri yirmi beş gurus vazîfe ile müstahfız-ı türbe cihetleri de 19 Rebî'ülevvel sene [1]291 târihlerinde es-Seyyid eş-Şeyh Hasan Hayri ve es-Seyyid eş-Şeyh Hüseyin Şevkî efendilere müvecceh iken mûmâ-ileyhimâdan Hüseyin Şevkî Efendi'nin vefâtıyla yalnız müşârun-ileyh Yahya Efendi hazretleri vakfından olan nısf hisse türbedarlığın 29 Teşrin-i evvel sene [1]320 târihinde birader ve müstereki mûmâ-ileyh Hasan Hayri Efendi'ye müstakillen tevcih olduğu ve 3 Zilhicce sene [1]256 târihinden itibaren de müşârun-ileyh Yahya Efendi hazretleri hânkâhında mukâbele ve hatm-i şerîf du'âları esnâsında cennet-mekân Bezmiâlem Vâlîde Sultân hazretlerinin isimleri yâd olunmak üzere hânkâh-ı mezkûrda postnişini bulunan zevâta müşârun-ileyhâ Bezmiâlem Vakfından şehri yüz gurus vazîfe tahsis kılındığı bi't-tedkîk anlaşılmış ise de şeyh-i müşârun-ileyh hazretleri vakfının vakfiyesi mukayyed olmadığı gibi biri şeyh-i müşârun-ileyh Yahya Efendi'nin vakfı tevliyetine ve diğeri akârât ve ziyâ'-ı mevkûfesine dâir mukayyed olan bin yüz on târihiyle müverrah olan iki kıt'a i'lâm-ı şer'ide de ânîfü'l-arz türbedarlığın şart-ı tevcihine dâir sarâhat görülememiş olmağla evrâk-ı melfûfenin mazrûfen huzûr-ı âlî-i hazret-i Meşihat-penâhî'ye takdîmi bâbında emr ü fermân hazret-i men lehü'l-emrindir.

Fî Ağustos sene 1336 Evkâf-ı Hümâyûn Kuyûd-ı Vakfiyye Müdüriyyeti

Meclis-i Meşâyih-i Kirâma fî 17 Zilhicce sene [1]338 mücebince takdîmi fî 25 minhü. [1

Eylül 1920]

Meclis

244IST_MFT_MSH_DFT02_01740_0001-0001-0012

**Üsküdar'da Tavâşi Hasanağa Mahallesi'nde Bandırmalı Şeyh Yusuf Efendi Dergâhı
bitişigindeki türbe ile Selim Baba Türbesi türbedarlıklarının, dergâhın şeyhi Yusuf
Nizâmeddin Efendi'ye tevcihi.**

Fî 8 Z. sene [1]338 / Fî 24 Ağustos sene [1]336 / Hüsâm / - / - / - / - / 34 / 19 Zilhicce sene-i
minhü [3 Eylül 1920] / 4 Eylül sene-i minhü

Mazbata

Üsküdar'da Tavâşi Hasanağa Mahallesi'nde kâin Bandırmalı Şeyh Yusuf Efendi Dergâhı
ittisâlindeki türbe-i şerîfesinin Hekîmoğlu Ali Paşa Vakfından şehri doksan beş gurus vazîfeli
ve dergâh-ı mezkûr pîşgâhında medfûn e'izze-i kirâmdan Selim Baba Türbe-i Şerîfesinin Zü-
leyha Hatun Vakfından vazîfe-i mu'ayyene ile türbedârlık cihetlerinin ber-mûceb-i şart-ı vâkıf
uhdesine tevcihi dergâh-ı mezkûr şeyhi Yusuf Nizâmeddin Efendi tarafından istid'â olunması
üzerine tedkikât-ı lâzime bi'l-icrâ mezkûr türbedârlık cihetlerinin dergâh-ı mezkûrda postnişîn
bulunanlara tevcih olunageldiği anlaşılmış ve mûmâ-ileyh Şeyh Yusuf Nizâmeddin Efendi
dergâh-ı mezkûrun postnişîni bulunduğ gibi mezkûr türbedârlık cihetlerinin de hüsn-i sûretle
hizmetini ifâya ehil ve muktedir bulunmuş olmasına mebnî ol vechile ciheteyn-i mezkûreteynin
mûmâ-ileyh Şey Yusuf Nizâmeddin Efendi uhdesine tevcihi tensib edilmekle rehîn-i tasvib-i
sâmî-i Cenâb-ı Meşîhat-penâhileri buyurulduğu takdîrde mu'âmele-i mukteziyye ifâ ve berât-ı
âlî tastîr ve i'tâ olunması zımnında takdîm kılınan işbu mazbata-i dâ'iyânemizin leffiyle Evkâf-ı
Hümâyûn Nezâret-i celîlesine tezkire-i aliyeh tastîr buyurulması bâbında.

Sîret, Cevdet, Remzî, Vahyî, Mustafa, Tevfik

Yazılmıştır Hüsâm

IST_MFT_MSH_DFT02_01740_0001-0001-0013

**Sultanahmet'te Dügümlü Baba'nın medfun olduğu Arabacıbaşı Dergâhı şeyh ve türbedar
vekili İhsan Efendi'nin vefatı, vekâleten tayin edilen torunu Şehâbeddin Efendi'nin de
istifasıyla, görevin Odabaşı Dergâhı şeyhi Ahmed Efendi'ye tevcihi.**

24 Zilk'ade sene [1]338 / 11 Ağustos sene [1]336 / - / - / - / - / - / 33 / 1 Zilhicce sene-i minhü
[16 Ağustos 1920] / 16 Ağustos sene-i minhü

Mazbata

Cennet-mekân Sultân Ahmed Hân Câmi'-i şerîfi civârında mecâzib-i ilâhiyyeden Dügümlü
Baba'nın medfûn bulunduğu Arabacıbaşı Dergâhı meşîhat ve türbedârlık ciheti mütevellî-i
vakfın re'y ve tensibiyle vekâleten münâsibine tevcih olunması vakfiye-i ma'mûlün-bihâ şerâiti
iktizâsından olup ciheteyn-i mezkûreteynin vekâletinde bulunan tarikat-i aliyye-i Rifâ'iyye'den
Şeyh İhsan Efendi'nin sekiz mâh mukaddem hîn-i vefâtında mütevellî-i vakf Necmeddin Bey
taht-ı silâhta ve taşrada bulunduğundan Der'aliyye'ye gelip re'yi istihsâl olununcaya değin
vezâif mu'attal kalmamak üzere müteveffâ-yı mûmâ-ileyhin hafidi Şehâbeddin Efendi muvak-
katen tevkil edilmiş idi. Bu kere mütevellî-i mûmâ-ileyh tarafından takdîm olunup Meclis-i
dâ'iyânemize muhavvel arzuhâlde dergâh-ı mezkûrun muvakkaten meşîhat ve türbedârlık
vekâletinde bulunan Şehâbeddin Efendi'nin vukû'-ı isti'fâsına mebnî ciheteyn-i mezkûreteyn

vekâletine Odabaşı Dergâhı şeyhi Ahmed Efendi uhdesine vekâleten tefvîzi re'y ve ifâde ettiğine ve mûmâ-ileyh Şeyh Ahmed Efendi kudemâ-yı meşâyih-i Rifâ'iyye'den ve erbâb-ı ehliyetten olmasına ve postnişini bulunduğu dergâhın muhterik bulunmasına binâen sâlifü'l-arz meşihat ve türbedârlık cihetlerinin vekâleten mûmâ-ileyhe tefvîzi tensîb edilmekle rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'amele-i mukteziyyenin ifâ ve berât-ı âlî tastîr ve itâ olunması zımnında işbu mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Sîret, Cevdet, Remzî, Seyyid Mehmed es-Sükûti, Vahyî, Mustafa, TevfikYazılmıştır
Hüsâm

IST_MFT_MSH_DFT02_01740_0001-0001-0014

Silivrikapı'da Karagöz Mehmed Paşa Dergâhı'ndaki Sadullah Çavuş Mescidi müezzini Hüseyin Efendi'nin azliyle, yerine Hafız İsmâil Efendi'nin tayini.

Fi 17 Za. sene [1]338 / Fi 3 Ağustos sene [1]336 / Hüsâm / - / - / - / - / 32 / Fi 24 Zilkâ'de sene [1]338 [9 Ağustos 1920] / Fi 11 Ağustos sene [1]336

Mazbata

Silivrikapısı kurbünde Karagöz Mehmed Paşa Dergâhı derûnunda kâin Sadullah Çavuş Mescid-i şerîfi müezzinlik cihetinin uhdesine tevcîhi Hâfız İsmâil Efendi tarafından bâ-istid'â taleb olunması üzerine ol bâbda cereyân eden muhâbere neticesinde Evkâf-ı Hümâyûn Nezâret-i celîlesinden vârid olup havâle buyurulan fi 19 Temmuz sene [1]336 târihli ve husûsî 94 numaralı tezkire-i cevâbiyye melfûf kayıd sûretine nazaran mebhûsün-anh mescid-i şerîfin şehri altmış dokuz buçuk guruş vazife ile müezzinlik ciheti fi 25 Ağustos sene [1]330 târihinde Hüseyin Efendi uhdesine müveccih bulunduğ anlaşılmış ve mûmâ-ileyhin iki seneden beri ifâ-yı vazife etmediği ve hayat ve memâtı meçhûl idiği cihetle vazife-i mezkûre tûl müddet mu'attal kalmamak için cihet-i mezkûrenin mûmâ-ileyhten ref'iyle salâh-ı hâl ile muttasıf bulunan mûmâ-ileyh Hâfız İsmâil Efendi'ye tevcîhi mahallesini muhtârân ve hey'et-i ihtiyâriyyesiyle ahâlî tarafından takdîm olunan fi 2 Ağustos sene [1]336 târihli mahzarda da taleb ve istihâm olunmuş ve ashâb-ı cihâtın bilâ-özr terk-i hizmet etmeleri uhdelerinden cihâtın ref'ini mûceb mevâddan bulunmuş olduğundan Tevcîh-i Cihât ve Meclis-i Meşâyih nizâm-nâmelerinin mevâdd-ı mahsûsası ahkâmına tevfiğe cihet-i mezkûrenin mûmâ-ileyh Hâfız Hüseyin Efendi'den ref'iyle bi'l-imtihân ehliyeti tebeyyün eden müsted'î-i mûmâ-ileyh Hâfız İsmâil Efendi'ye tevcîhi tensîb edilmekle rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'amele-i mukteziyye ifâ ve berât-ı âlî itâ olunması husûsunun Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Sîret, Cevdet, Remzî, Vahyî, Mustafa, Mehmed Gülşen, Tevfik
Yazılmıştır Hüsâm

IST_MFT_MSH_DFT02_01740_0001-0001-0015

Büyük Ayasofya'da Karaki Mahallesi'nde Saçlı Emir Dergâhı içerisinde Mahmud Çavuş Mescidi'nin imam ve hatibi ile dergâhın şeyhi İzzî Efendi'nin vefatı üzerine, imam ve hatiplik cihetinin Mehmed Şerafeddin Efendi'nin niyâbetinde müteveffanın torunu Bayram Efendi b. Şükrü'ye tevcihi.

Fî 23 Za. sene [1]338 / Fî 9 Ağustos sene [1]336 / Hüsâm / - / - / - / - / 31 / 24 Za. sene-i minhü [9 Ağustos 1920] / 12 mezbûr sene-i minhü

Mazbata

Ayasofya-i kebîr kurbünde Karaki Mahallesi'nde kâin Saçlı Emir Dergâhı derûnunda Mahmud Çavuş Mescid-i Şerîfinin bâ-berât-ı âlî imâmet ve hitâbet cihetlerine mutasarrıf olan dergâh-ı mezkûr şeyhi İzzî Efendi'nin vukû'-ı vefâtına mebnî inhilâl eden ciheteyn-i mezkûreteynin hizmeti kendi tarafından bi'n-niyâbe îfâ olunmak üzere müteveffâ-yı mûmâ-ileyhîn hafidi sagîr Bayram Efendi uhdesine tevcihi Mehmed Şerafeddin Efendi tarafından istid'â olunmuş ve Evkâf-ı Hümâyûn Kuyûd-ı Vakfiyye Kaleminden muhrec ol bâbdaki kayıd sûretine nazaran ber-vech-i hasbî ciheteyn-i mezkûreteynin fî 29 Muharrem sene [1]329 târihinde müteveffâ-yı mûmâ-ileyh Şeyh İzzî Efendi'ye müveccceh olduğu gösterilmiş ve müsted'î-i mûmâ-ileyh Şerafeddin Efendi sagîr-i mûmâ-ileyhe tevcih olunan dergâh-ı mezkûr meşihat cihetinin nâibi ve ricâl-i ilmiyyeden bulunmuş olmasına mebnî sâlifü'l-arz ciheteyn-i mezkûreteynin dahi Tevcih-i Cihât Nizâm-nâmesi'nin sekizinci maddesine tevfiikan sagîr-i mûmâ-ileyh bi'l-fi'îl îfâ-yı hizmete kesb-i iktidâr edinceye değin hizmeti Mehmed Şerafeddin Efendi tarafından bi'n-niyâbe îfâ olunmak üzere müteveffâ-yı mûmâ-ileyh Şeyh İzzî Efendi mahlûlünden hafidi mûmâ-ileyh sagîr Bayram Efendi b. Şükrü'ye tevcihi tensib edilmekle rehîn-i tasvib-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye îfâ ve berât-ı âlî tastîr ve i'tâ olunması husûsunun mazbata-i dâ'iyanemizin leffiyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Sîret, Remzî, Seyyid Mehmed es-Sükûtî, Vahyî, Mustafa, Tevfik

Yazılmıştır Hüsâm

IST_MFT_MSH_DFT02_01740_0001-0001-0016

Beykoz Çayır Caddesi'ndeki Rifâî Dergâhı şeyhi Ali Efendi'nin vefatıyla, vekili Şeyh Ahmed Efendi'nin Arabacıbaşı Dergâhı meşihat vekâletine nakledilmesi ve meşihate Rumelihisarı'ndaki Nalbûrî Dergâhı şeyhi Kâmil Efendi'nin nakil yoluyla tayini.

Fî 18 Za. sene [1]338 / Fî 4 Ağustos sene [1]336 / - / - / - / - / - / 30 / Fî 23 Zilka'de sene [1]338 [8 Ağustos 1920] / Fî 9 Ağustos sene [1]336

Mazbata

Beykoz kazâsında Çayır Caddesi'nde kâin Rifâî Dergâhı şeyhi Ali Efendi'nin vukû'-ı vefâtına mebnî inhilâl eden dergâh-ı mezkûr meşihat ciheti vakfiyye-i ma'mûlün-bihâsına nazaran vâkıf Şeyh Edhem Efendi'nin hulefâ ve hulefâ-i hulefâsına meşrûta olup Rumelihisarı'nda kâin Nalbûrî Mehmed Efendi Dergâhı şeyhi Kâmil Efendi akdem-i hulefâ ve meşrûtün-leh bulunduğundan bahisle cihet-i mezkûrenin uhdesine tevcihini istid'â etmesine ve hulefâdan

diğer iki tâlib daha bulunmasına mebnî cümlesi isbât-ı ehliyyet imtihânına da'vet edildikte mûmâ-ileyh Kâmil Efendi ile diğer biri bu babda istinkâf eylemelerinden ve üçüncüsünün isbât-ı ehliyyet edememesinden dolayı dergâh-ı mezkûr vazîfesi mu'attal kalmamak üzere tarîk-i Rifâ'iyye meşâyihinden Şeyh Ahmed Efendi vekîl ta'yîn kılınmış idi bu kere mûmâ-ileyh Ahmed Efendi'nin Arabacıbaşı Dergâhı meşîhati vekâletine nakli bi't-tensîb mu'amelesi derdest icrâ bulunduğu cihetle mezkûr Beykoz Dergâhı meşîhati yine hâlî kalmasına ve mûmâ-ileyh Kâmil Efendi'nin esâsen uhdesinde bulunan Nalbûrî Mehmed Efendi Dergâh-ı şerîfinin vakfiyesi mücebince tarîkat-i aliyye-i Nakşibendiyye'den bulunmasına nazaran ba-berât-ı âlî meşâyihden bulunan mûmâ-ileyh Kâmil Efendi'nin istid'âsı vech ile meşrûtün-lehi bulunduğu Beykoz Dergâhı meşîhatine nakl ve ta'yîni ve mûmâ-ileyhin naklinden dolayı inhilâlî tabî'î olan Rumelîhisarı'ndaki Nalbûrî Dergâhı meşîhatinin de şart-ı vâkîf dâiresinde diğer münâsibine tevcihi bi't-tensîb mezkûr Nalbûrî Dergâhı meşîhati diğer mazbata-i dâ'iyânemizle arz edilmiş olmağ-la sûret-i ma'rûza rehîn-i tasvîb-i sâmi-i Cenâb-ı Meşîhat-penâhîleri buyurulduğu takdirde mu'amele-i mukteziyye îfâ ve berât-ı âlî tastîr ve i'tâ olunması zımnında mazbata-i dâ'iyânemizin leffîyle Evkâf-ı Hümâyûn Nezâret-i celîlesine tezkire-i aliyye şeref-tastîr buyurulması bâbında.

Sîret, Remzî, Seyyid Mehmed es-Sükûtî, Vahyî, Mustafa, Mehmed Gülşen, Tevfik

Yazılmıştır Hüsâm

IST_MFT_MSH_DFT02_01740_0001-0001-0017

Rumelîhisarı'ndaki Nalbûrî Şeyh Mehmed Efendi Dergâhı şeyhi Mehmed Kâmil Efendi'nin; Beykoz Rifâî Dergâhı meşîhatine nakil ile tayini ve onun yerine Meclis-i Meşâyih azasından Mehmed Cevdet Efendi'nin tevcihi.

Fî 21 Za. sene [1]338 / Fî 7 Ağustos sene [1]336 / - / - / - / - / 29 / Fî 23 Zilka'de sene [1]338 [8 Ağustos 1920] / Fî 9 Ağustos sene [1]336

Mazbata

Der'aliyye'de Rumelîhisarı'nda kâin Nalbûrî Şeyh Mehmed Efendi Dergâh-ı şerîfi şeyhi Mehmed Kâmil Efendi'nin meşrûtün-lehi bulunduğu Beykoz'da Rifâ'î Dergâhı meşîhatine nakl buyurulmasına mebnî uhdesinden inhilâl eden mezkûr Mehmed Efendi Dergâhı meşîhat ciheti vakfiyesi mücebince Eyübsultân'da Şeyh Murad Hânkâh-ı şerîfi şeyhi bulunan zâtın intihâb ve inhâsıyla tarîkat-i aliyye-i Nakşibendiyye meşâyihinden ehil ve muktedir bir zâta tevcihi meşrût olduğundan Yanya Dergâhı şeyhi Mehmed Cevdet Efendi'nin meşîhat-i mezkûreye intihâb edildiği mezkûr Şeyh Murad Dergâhı Postnişînliği'nden inhâ olunmuş ve mûmâ-ileyh Şeyh Cevdet Efendi sâlifü'z-zikr vâkîf Nalbûrî Şeyh Mehmed Efendi'nin silsile-i tarîkiden olup Meclis-i dâ'iyânemiz a'zasından ve ilim ve irfânı müsellemlerle bulunmuş olmasına binâen sâlifü'l-arz Nalbûrî Mehmed Efendi Dergâhı meşîhat cihetinin şart-ı vâkîfa tevfiikan mûmâ-ileyh Şeyh Mehmed Cevdet Efendi uhdesine tevcihi tensîb edilmekle karîn-i tasvîb-i sâmi-i Cenâb-ı Meşîhat-penâhîleri buyurulduğu takdirde mu'amele-i mukteziyye îfâ ve berât-ı âlî tastîr ve i'tâ olunması zımnında işbu mazbata-i dâ'iyânemizin leffîyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Sîret, Remzî, Seyyid Mehmed es-Sükûtî, Vahyî, Mehmed Gülşen, Tevfik

Yazılmıştır Hüsâm

IST_MFT_MSH_DFT02_01740_0001-0001-0018

Eyüp'te Hüsrev Paşa Dergâhı şeyhi Fevzî Efendi'nin görevi terk etmesi üzerine cihetin, dergâhın eski şeyhi Safiyyullah Efendi'nin halifesi ve Meclis-i Meşâyih reisi Şeyh Mehmed Tevfik Efendi'ye tevcihi.

16 Za. sene [1]338 / 2 Ağustos sene [1]336 / - / - / - / - / 28 / Fî 18 Zilka'de sene [1]338 [3 Ağustos 1920] / Fî 4 Ağustos sene [1]336

Mazbata

Hazret-i Ebâ Eyyûb el-Ensârî -radiye anhü'l-Bârî- civâr-ı rahmet-medârında merhûm Hüsrev Paşa'nın binâ ve ihyâ-kerdesi olan tarikat-i aliyye-i Nakşibendiyye-i Hâlidîyye Dergâh-ı şerîfi şeyhi Fevzî Efendi'nin terk-i hizmet ettiğinden dolayı cihet-i meşîhatin uhdesinden ref'i husûsu 13 Cumâdelûlâ sene [1]338 târîhli ve 33 numaralı müzekkire ile lede'l-arz icâbı icrâ buyurulmuş olmasına mebnî inhilâl eden cihet-i mezkûrenin dergâh-ı şerîf-i mezkûr şeyh-i esbakı merhûm Safiyyullah Efendi'nin akdem halifesi olup beyne'l-meşâyih fazîlet ve reşâdetiyle mümtâz bulunan ve hasâil-i âliyesiyle de nâmını makrûn-ı ihtirâm ve i'zâz etmiş olan Meclis-i dâ'iyânemiz reisi tarikat-i aliyye-i mezkûreden Şeyh Mehmed Tevfik Efendi uhdesine tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve işbu mazbata-i dâ'iyânemizin leffen tesyâr buyurulması bâbında.

Sîret, Cevdet, Remzî, Seyyid Mehmed es-Sükûtî, Vahyî, Mustafa, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0019

Üsküdar Sultantepeci'nde Özbekler Dergâhı diğer ismiyle Hacıhâce Zaviyesi şeyhi Atâ Efendi'nin azliyle, meşîhatin Seyyid Ahmed Buhârî Dergâhı postnişini Şeyh Ali Efendi niyâbetinde Özbekler Dergâhı eski şeyhi Sâdık Efendi'nin torunu Necmeddin Efendi'ye tevcihi.

14 Za. sene [1]338 / 31 Temmuz sene [1]336 / - / - / - / - / 27 / Fî Zilka'de sene [1]338 [Ağustos 1920] / Fî Ağustos sene [1]336

Mazbata

Üsküdar'da Sultantepeci nâm mahalde kâin Özbekler Dergâhı nâmiyla ma'rûf Hacıhâce Zâviyesi meşîhat cihetinin işâret-i aliyye-i Cenâb-ı Meşîhat-penâhîye iktirân eden müzekkire mücebince Ata Efendi uhdesinden ref'ine mebnî cihet-i mezkûrenin dergâh-ı mezkûr şeyh-i esbakı müteveffâ Sâdık Efendi'nin on yedi yaşında ve tahsilde bulunan oğlu Necmeddin Efendi uhdesine tevcihiyle tahsîl-i ulûm ve seyr u sülûkunu ikmâl ve bi'l-fi'îl ifâ-yı hizmete ehliyetini isbât edinceye değin vazîfe-i meşîhatin ecille-i meşâyih-i Nakşibendiyye'den Seyyid Ahmed el-Buhârî Dergâh-ı şerîfi postnişini Şeyh Ali Efendi tarafından bi'n-niyâbe ifâsı tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye ifâ ve ol vechile berât-ı âlî tastîr ve i'tâ olunması husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Sîret, Cevdet, Remzî, Vahyî, Mustafa, Tevfik, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0020-21

Büyük Ayasofya civarında Nâzikî Dergâhı meşihati hissedarlarından dergâhın postnişini Hasan Tahsin Efendi'nin vefatıyla, hissesinin diğer hissedar Şeyh Mehmed Hilmi Efendi'ye tevcihi.

Fî 14 Za. sene [1]338 / Fî 31 Temmuz sene [1]336 / - / - / - / Mahmud / - / 26 / Fî 16 Zilka'de sene [1]338 [1 Ağustos 1920] / Fî 2 Ağustos sene [1]336

Mazbata

Ayasofya-i Kebîr Câmî'-i şerîfi kurbünde kâin Malatyalı İsmâîl Ağa merhûmun binâ-kerdesi olan Nâzikî Dergâhı meşihat ciheti hissedârlarından olup hasbe's-sin postnişini bulunan Hasan Tahsin Efendi'nin fî 7 Mart sene [1]336 târihinde vukû'-ı vefâtına mebnî nevbet-i meşihat kendisine teveccüh ettiğinden muhassasâtın tarafına tesviyesini müsted'î cihet-i mezkûre hissedârlarından Mehmed Hilmi ve pederi müteveffâ-yı mûmâ-ileyhten inhilâl eden hisse-i meşihatın uhdesine tevcihi istid'âsına dâir Mehmed Ali imzâsıyla takdîm olunup havâle buyurulan fî 28 Haziran sene [1]336 târihli iki kıt'a arzuhâl üzerine Meclis-i dâ'iyânemiz ifâdesiyle sebk eden iş'âr-ı âlî-i Meşihat-penâhîlerine cevâben Evkâf-ı Hümâyûn Nezâret-i celîlesinden vârid olan fî 6 Temmuz sene [1]336 târihli ve husûsî seksen sekiz numaralı tezkirenin melfûfu vakfiye ve kayıd sûretleri mütâlâ'a ve îcâbı müzâkere olundu. Sâlifü'l-arz kayıd sûretine nazaran dergâh-ı mezkûr meşihat ciheti fî 15 Muharrem sene [1]273 târihinde Ahmed Efendi mahlûlünden mahdûmları kebîr es-Seyyid Mehmed Râşid ve Ali Rıza ve Mehmed Hamdi ve Hüseyin Hüsnü ve sagır Hasan Tahsin efendilere ve mûmâ-ileyhimden Mehmed Râşid ve Ali Rıza efendilerin bilâ-veled vefâtlarıyla iki hums hisseleri mahlûllerinden fî 22 Receb sene [1]305 târihinde birader ve müşterekleri Mehmed Hamdi Efendi'nin hums hissesine ilhâken ve mûmâ-ileyh Mehmed Hamdi Efendi'nin dahi sulbî kebîr oğulları Mehmed Cemâleddin ve Mehmed Hilmi efendileri terk ederek vukû'-ı vefâtına ve mûmâ-ileyh Mehmed Cemâleddin Efendi'nin taşrada hizmet-i me'mûriyette bulunmasına binâen keff-i yedinden meşihat-i mezkûre hizmeti sinnen büyükleri Hüseyin Hüsnü Efendi tarafından îfâ olunarak mûmâ-ileyh Mehmed Hilmi Efendi onun ma'iyetinde bulunmak üzere fî 28 Zilka'de sene [1]311 târihinde üç hums hisse-i meşihat-i mezkûrenin mûmâ-ileyh Mehmed Hilmi Efendi'ye ve mûmâ-ileyhimden Hüseyin Hüsnü Efendi'nin dahi vefâtıyla hums hissesi mahlûlünden fî 27 Ağustos sene [1]329 târihinde mahdûmu Mustafa Mes'ûd Efendi'ye tevcihâtı icrâ kılındığı anlaşılmış ve cihât-i gayr-i meşrûtadan olup da eşhâs-ı müte'addide uhdesinde bulunan cihât hissedârlarından birinin vefâtı vukû'unda inhilâl eden hissenin ehil olan müşterekine ilâveten tevcih olunması el-yevm mer'ıyyü'l-icrâ bulunan Tevcih-i Cihât Nizâmnâmesi'nin madde-i mahsûsası ahkâmından bulunmuş olmasına ve cihet-i mezkûrun üç hums hissesine mutasarrıf olan müsted'î-i mûmâ-ileyh Şeyh Mehmed Hilmi Efendi'nin imtihanı mesbûk ve bi'l-fi'îl îfâ-yı vazîfeye ehliyeti ma'lûm bulunmasına binâen müteveffâ-yı mûmâ-ileyh Hasan Tahsin Efendi'den [0021] inhilâl eden bir hums hisse-i meşihatın dahi ilâveten mûmâ-ileyh Mehmed Hilmi Efendi'ye tevcihiyle muhassasâtının mûmâ-ileyh nâmına tesviye ve îfâsı tensib edilmekle rehîn-i tasvib-i sâmi-i Cenâb-ı Meşihat-penâhîleri buyurulduğu takdirde îcâbı icrâ ve berât-ı âlî i'tâ olunması zımında mazbata-i dâ'iyânemizin bâ-tezkire-i aliyye nezâret-i müşârun-ileyhâya irsâl buyurulması bâbında.

Sîret, Cevdet, Remzî, Vahyî, Mustafa, Tefvik, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0022

Kadıköy Zühtüpaşa Mahallesi Kuşdili Mecidi Dergâhı postnişini Şeyh Ahmed Münib Efendi'nin vefatıyla, meşihate büyük oğlu Yusuf Nizâmeddin Efendi'nin tayini.

7 Za. sene [1]338 / 24 Temmuz sene [1]336 / - / - / - / - / 25 / 9 Za. sene [1]338 [25 Temmuz 1920] / 26 Temmuz sene [1]336

Mazbata

Üsküdar'a muzâfe Kadı karyesinde Zühdüpaşa Mahallesi'nde Kuşdili nâm mahalde kâin tarikat-i aliyye-i Sa'diyye ve Celvetiyye'den Mecîdî Dergâh-ı şerîfi postnişini Şeyh Ahmed Münib Efendi'nin vukû'-ı vefâtına mebnî inhilâl eden dergâh-ı mezkûr meşihat ciheti müteveffâ-yı mûmâ-ileyhin ekber evlâdına meşrûta olduğu mukayyed ve vakfiyesinde musarrâh olmasına ve kebîr oğlu Yusuf Nizâmeddin Efendi tarîk-i Sa'dî ve Celvetiyye'den müstahlef ve lede'l-imtîhân ehliyet ve likâyati müsbet bulunmasına binâen cihet-i meşihat-i ma'rûzanın pederi mahlûlünden mûmâ-ileyh Şeyh Yusuf Nizâmeddin Efendi uhdesine tevcihi tensib edilmekle rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyye îfâ ve berât-ı âlisi i'tâ olunmak üzere mazbata-i dâ'iyânemizin leffîyle Evkâf-ı Hümayûn Nezâret-i celîlesine tezkire-i aliyye tastîr buyurulması bâbında.

Sîret, Remzî, Seyyid Mehmed es-Sükûtî, Vahyî, Mustafa, Tevfik, Mehmed
GülşenYazılmıştır Hüsâm

IST_MFT_MSH_DFT02_01740_0001-0001-0023-24

Üsküdar Hasanağa Mahallesi'nde Seyyid Şeyh Yusuf Efendi Dergâhı postnişini Şeyh Ahmed Münib Efendi'nin vefatıyla, meşihate oğullarından Yusuf Nizâmeddin Efendi'nin tayini.

Fî 30 Şevvâl sene [1]338 / Fî 17 Temmuz sene [1]336 / - / - / - / Mahmud / - / 24 / 2 Zilkâ'de sene [1]338 [18 Temmuz 1920] / 19 Temmuz sene-i minhü

Mazbata

Üsküdar'da Hasanağa Mahallesi'nde kâin tarikat-i aliyye-i Celvetiyye'den merhûm es-Seyyid eş-Şeyh Yusuf Efendi Dergâh-ı şerîfi postnişini Şeyh Ahmed Münib Efendi'nin vukû'-ı vefâtına mebnî inhilâl eden cihet-i meşihatın uhdelere tevcihi cihet-i mezkûrenin rub' hissesi mutasarrıfı Mehmed Nebil ve müteveffâ-yı mûmâ-ileyhin kebîr mahdûmu Yusuf Nizâmeddin ve sagîr mahdûmu Fazlullah efendiler tarafından bâ-arzuhâl taleb ve istid'â olunması üzerine Evkâf-ı Hümayûn Nezâret-i celîlesinden celb olunan vâkıf-ı müteveffâ-yı mûmâ-ileyh Şeyh Yusuf Efendi'nin bin yüz altmış bir târihli vakfiye-i ma'mûlün-bihâsı ve kuyûd-ı mütedâvile sûret-i musaddakalarını mübriz berevât-ı atîka lede'l-mütâla'a dergâh-ı mezkûr meşihat ciheti ile Aydın vilâyetinde Birgi kazâsına tâbî Marmara'da Ali Baba Zâviyesi zâviyedârlıklarının vâkıfın evlâd-ı evlâd-ı evlâdından eslah ve erşedine meşrûta olduğu ve cihet-i meşihatın rub' hissesi fî 19 Zilhicce sene 1291 târihinde Mehmed Kâmil b. Sâlih ve diğer rub' hissesi fî 28 Zilhicce sene [1]311 târihinde Galib Efendi niyâbetiyle sagîr Mehmed Nebil b. Fahreddin ve nısf hissesi fî 4 Zilhicce sene [1]329 târihinde Şeyh Ahmed Münib b. Galib efendilere müvecceh olduğu anlaşılmıştır. Îcâbı lede'l-müzâkere mutasarrıfın-i mûmâ-ileyhimden Şeyh Kâmil ve Şeyh Münib efendilerin bu kere vukû'-ı vefâtlarıyla uhdelere inhilâl eden hisselerin Tevcih-i Cihât Nizâmnamesi ahkâmına tevfiikan bi't-tevhid evlâd-ı vâkıftan eslah ve erşedine tevcihi lâzım gelmekle evlâd-ı

vâkıftan mevcûd ve batında mukaddem eslah ve erşed bulunan İskender Baba Dergâhı şeyhi Rıza Efendi'ye teklif olundukta zamân-ı tasarrufundan keff-i yed etmesine ve derece-i sâniyede meşrûtün-leh olan müsted'î-i mûmâ-ileyh Mehmed Nebil Efendi'nin gerçi hâl-i sıgarında niyâbetle tevcîh olunan rub' hisse için bi'l-âhare istihkâmen berât-ı âlî ihsân olunmuş ise de münhal diğer hisselerin dahi ona tevcîhi, Tevcîh-i Cihât Nizâmnâmesi ahkâmınca ehliyetinin sübûtuna mütevakıf olduğundan icrâ kılınan imtihan neticesinde ehliyeti kâfi görülememesine ve üçüncü derecede meşrûtün-leh müsted'î-i mûmâ-ileyh Yusuf Nizâmeddin Efendi'nin bi'l-imtihan ehliyet ve liyâkati tebeyyün eylesine binâen mûmâ-ileyh Mehmed Nebil Efendi'nin uhdesinde bulunan rub' hisse meşihatın ref'i ve münhal diğer rub' ve nisf hisselerin tevhidî ile meşrûtün-lehi hulefâ-yı Celvetiyye'den mûmâ-ileyh Şeyh Yusuf Nizâmeddin Efendi b. Şeyh Ahmed [0024] Münib Efendi uhdesine müstakillen tevcîhi ve biraderi mûmâ-ileyh Fazlullah Efendi ma'lûl ve muhtâc-ı mu'âvenet bulunduğu cihetle kayd-ı hayât şartıyla mûmâ-ileyh Şeyh Yusuf Efendi tarafından dergâh-ı mezkûrda iskân ve i'âşe edileceği mûmâ-ileyh Şeyh Yusuf Efendi tarafından ta'ahhüd edilmiş olduğundan berât-ı âlî'ye derci tensib edilmiş olmağla sûret-i ma'rûza nezd-i sâmi-i Cenâb-ı Meşihat-penâhilerinde rehîn-i tasvîb-i âlî buyurulduğu takdîrde mu'âmele-i mukteziyye îfâ ve berât-ı âlisi tastîr ve i'tâ olunmak üzere mazbata-i dâ'iyânemizin leffiyle nezâret-i müşârun-ileyhâya tezkire-i aliyye tastîr buyurulması bâbında

Sîret, Cevdet, Remzî, Seyyid Mehmed es-Sükûti, Vahyî, Mustafa, Tevfik, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0025

Salkımsöğüt'te Aydınoglu Dergâhı şeyhi Mehmed İzzî Efendi'nin vefatı üzerine, meşihate Mehmed Şerafeddin Efendi vekâletiyle müteveffanın torunu Bayram Efendi b. Şükrü'nün tayini.

- / - / - / - / - / - / - / - / 23 / Fî 30 Şevvâl sene [1]338 [17 Temmuz 1920] / Fî 17 Temmuz sene [1]336

Mazbata

Der'aliyye'de Salkımsöğüt'de kâin tarikat-i aliyye-i Şa'bâniyye'den Aydınoglu Dergâh-ı şerîfi şeyhi Mehmed İzzî Efendi'nin bilâ-veled-i zükûr vukû'-ı vefâtına mebnî inhilâl eden meşihat cihetinin kendi niyâbetiyle müteveffâ-yı mûmâ-ileyhin hafidi sagîr Bayram Efendi uhdesine tevcîhi merhûmun ta'allukât ve müntesibîninden Mehmed Şerafeddin Efendi tarafından istid'â olunmasına ve postnişinlik cihetlerinin hafide tevcîhi câiz olacağı Tevcîh-i Cihât Nizâmnâmesi'nin sekizinci maddesini tefsîran Şûrâ-yı Devletce taht-ı karâra alınmış olmasına binâen sagîr-i mûmâ-ileyhin sinni hadd-i nizâmîye vâsıl olarak bi'l-fi'il edâ-yı hizmete kesb ve isbât-ı liyâkat edinceye değin vazîfesi ricâl-i ilmiyyeden bulunan mûmâ-ileyh Mehmed Şerafeddin Efendi tarafından bi'n-niyâbe îfâ ve sagîrin tahsîl ve teslîkine i'tinâ olunmak üzere sâlifü'l-arz meşihat cihetinin sagîr Bayram Efendi b. Şükrü'ye tevcîhi tensib edilmekle rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyye îfâ ve berât-ı âlî tastîr ve i'tâ olunması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümayûn Nezâret-i celîlesine iş'âr buyurulması tezekkür kılındı ol bâbda.

Sîret, Cevdet, Remzî, Seyyid Mehmed es-Sükûti, Vahyî, Mustafa, Tevfik, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0026

Üsküdar'da Atik Vâlide Dergâhı şeyhi Mahmud Efendi'nin vefatı üzerine meşihat ve meşihate meşruta Atik Vâlide Camii vaizlik cihetinin, Meclis-i Meşâyih azasından Mustafa Sîret Efendi'ye tevcihi.

27 Şevvâl sene [1]338 / 14 Temmuz sene [1]336 / - / - / - / Mahmud / - / 22 / Fî 27 Şevvâl sene [1]338 [14 Temmuz 1920] / Fî 14 Temmuz sene [1]336

Mazbata

Üsküdar'da Vâlide-i Atik Câmî'-i şerîfi kurbünde kâin Vâlide-i Atik Dergâhı nâmıyla arîf tarikat-i Halvetiyye-i Şa'bâniyye Dergâh-ı şerîfi şeyhi Mahmud Efendi'nin irtihâl-i dâr-ı bekâ etmesine mebnî inhilâl eden dergâh-ı mezkûr meşihat ve meşihatine meşrûta câmî'-i şerîf-i mezkûrda vâ'izlik cihetleri için müsâbaka i'lân olundu ise de şürût-ı vâkıfa muvâfık tâlib bulunamamasına mebnî ciheteyn-i mezkûreteynin tarikat-i aliyye-i mezkûre kudemâ-yı meşâyihinden olup ehliyet ve liyâkatı ma'lûm ve imtîhânı mesbûk Mustafa Sîret Efendi'ye vekâleten tefvîzi husûsu 11 Cumâdelâhire sene [1]338 târihli ve 15 numaralı müzekkire ile lede'l-arz tasvîb-i sâmi-i Cenâb-ı Meşihat-penâhîlerine iktirân etmiş ve keyfiyyet bâ-müzekkire-i aliyye Evkâf-ı Hümâyûn Nezâret-i celîlesine iş'âr buyurulmuş idi. El-yevm Meclis-i dâ'iyânemiz a'zasından bulunan mûmâ-ileyh Şeyh Mustafa Sîret Efendi dâ'ileri vezâif-i mevdû'asını kemâ-hiye hakkuhâ edâ ve ifâ etmekte olmasına binâen sâlifü'l-arz meşihat ve meşrûta vâ'izlik cihetlerinin asâleten mûmâ-ileyh uhdesine tevcihi tensîb edilmekle rehîn-i tasvîb-i sâmi-i cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması husûsunun mazbata-i dâ'iyânemizin leffîyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Cevdet, Remzî, Vahyî, Mustafa, Tefvîk, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0027

Silivrikapı Karabaş Mahallesi Karagöz Mehmed Paşa Tekkesi Sadullah Çavuş Mescidi imamı Hafız Mustafa Efendi'nin vefatı üzerine, yerine dergâhın postnişini Şeyh Hüseyin Efendi'nin tayini.

20 Şevvâl sene [1]338 / 7 Temmuz sene [1]336 / - / - / - / Sîret / - / 21 / Fî 25 Şevvâl sene [1]338 [12 Temmuz 1920] / Fî 12 Temmuz sene [1]336

Mazbata

İstanbul'da Silivrikapı civârında Karabaş Mahallesi'nde kâin Karagöz Mehmed Paşa Tekkesi derûnunda kâin merhûm Sadullah Çavuş Mescid-i şerîfi imâmı Hâfız Mustafa Efendi'nin bilâveled vukû'-ı vefâtına mebnî inhilâl eden mescid-i mezkûr imâmet cihetine tâlib olacaklar için imtîhân icrâsı i'lân olunduktan mezkûr dergâh postnişini Şeyh Hüseyin Hüsnü Efendi'den başka tâlib zuhûr etmediğine ve mûmâ-ileyhin bi'l-imtîhân tebeyyün eden ehliyet ve liyâkatine binâen ânifü'l-arz imâmet cihetinin vazîfe-i mu'ayyenesiyle mûmâ-ileyhin uhdesine tevcihi tensîb edilmekle karîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması husûsunun mazbata-i dâ'iyânemizin leffîyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Cevdet, Remzî, Seyyid Mehmed es-Sükûtî, Vahyî, Mustafa, Mehmed Gülşen, Tefvîk

Yazılmıştır Hüsâm

IST_MFT_MSH_DFT02_01740_0001-0001-0028-29

Mevlevihânekapısı Şâbâniyye Dergâhı Hacı Mahmud Mescidi kayyım ve müezzin vekili Mehmed Efendi'nin görevini terk etmesi üzerine, cihetin Kızıltaş Camii müezzin vekili Asitaneli Hafız Cemâl Efendi b. Halim'e tevcihi.

17 Şevvâl sene [1]338 / 4 Temmuz sene [1]336 / - / - / 91 / Sîret / - / 20 / Fî 18 Şevvâl sene [1]338 [5 Temmuz 1920] / Fî 5 Temmuz sene [1]336

Mazbata

Mevlevihânekapısı hâricinde tarikat-i aliyye-i Şa'bâniyye Dergâhı derûnunda kâin merhûm Hacı Mahmud Mescid-i şerîfinin kayyım ve müezzin vekili Mehmed Efendi'nin terk-i hizmet ettiğinden bahisle ciheteyn-i mezkûreteynin uhdesine tevcihi istid'âsına dâir muhterik Kızıltaş Câmî-i şerîfi müezzin vekili Hâfız Cemâl Efendi tarafından takdîm olunup havâle buyurulan merbût arzuhâl kırâet olundu.

Kuyûda lede'l-mürâca'a mukaddemâ bâ-müzekkire vukû' bulan taleb üzerine Evkâf-ı Hümâyûn Nezâret-i celîlesi Kuyûd-ı Vakfiyye İdâresi'nden ihrâc ve irsâl olunan 12 Şubat sene [1]335 târihli ve 35/355 numaralı kayıd sûretinde evkâf-ı mülhakadan merhûm Hacı İsmâil Ağa Vakfından almak üzere İstanbul'da Mevlevihâne Yenikapısı hâricinde merhûm Hacı Mahmud Mescid-i Şerîfinde yevmî üçer akçe kadîm ve şehri seksener gurus zamm-ı vazife ile müezzin ve kayyım ve yevmî bir akçe vazife ile "Amenê'r-rasûl" hân cihetleri Abdülğafur Efendi'nin uhdesinde iken vefâtıyla mahlûlünden cihât-ı mebhûsenin bi'l-müsâbaka ehline tevcihine kadar Romanya muhâcirlerinden Hâfız Mehmed Efendi'nin 28 Mart sene [1]333 târihinde vekil ta'yîn olduğu beyân olduğu anlaşılmış ve mûmâ-ileyhin evvelce de hizmetine devam etmekte olduğu gibi Meclis-i dâ'iyânemizden me'zûniyet istihâl etmeksizin taşraya azîmet ettiğinden hizmeti metrûk ve mu'attal kaldığı dergâh-ı mezkûr şeyhi efendi tarafından i'tâ olunan 8 Kânûn-ı evvel sene [1]335 târihli takrîrde ifâde olunması üzerine icrâ kılınan tahkîkât neticesinde takrîrin mazmûnu mukârin-i hakikat idiği tebeyyün etmiş olmağla vazîfesi başına avdet etmesi için üç mâh mehil i'tâ olunarak keyfiyet o civârda sâkin âilesi vâsıtasıyla kendisine iblâğ ve hizmet-i metrûkesi ber-vech-i hasbî dergâh-ı mezkûr şeyhi Efendi'ye ifâ ettirilmiş ise de müddet-i mu'ayyenenin hitâmından bir hayli zaman daha mürûr eylediği hâlde avdet etmediğinden ve esâsen kendisi cihât-ı mezkûrenin ehline tevcihine kadar vekil olmakla beraber târik-i hizmet bulunduğu ol bâbdaki nizâmnâme ve ta'limâtnâme ahkâmına tevfiikan vekâletten azliyle cihât-ı mezkûrenin münâsibine tevcihi karâr-gîr olmağla tâlib olacaklar için müsâbaka imtihanı icrâ olunacağı i'lân olundukta müsted'î-i mûmâ-ileyhten başka tâlib [0029] zuhûr etmemesine ve hüsn-i hâl ashâbından olduğu tahkîkât-ı vâkı'adan müstebân olan müsted'î Âsitaneli Hâfız Cemâl Efendi b. Halim'in ehliyet ve kifâyeti bi'l-imtihan tebeyyün eylemesine binâen cihât-ı ma'rûzanın vezâif-i mu'ayyenesiyle asâleten mûmâ-ileyhin uhdesine tevcihi tensib edilmekle rehîn-i tasvib-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve berât-ı âlî tastîr ve i'tâ olunması zımnında mazbata-i dâ'iyânemizin bâ-tezkire-i aliyye nezâret-i müşârun-ileyhâya irsâl buyurulması bâbında.

Cevdet, Remzî, Vahyî, Mustafa, Tevfik, Mehmed Gülşen

Yazılmıştır Hüsâm

IST_MFT_MSH_DFT02_01740_0001-0001-0030

Kocamustafapaşa'da Mihrişah Hatun diğer adıyla Hacı Kadın Dergâhı Camii'nin imamet ve hitabetine tayin edilen Hafız Sâmî Efendi'nin görevine başlamaması üzerine, yerine Asitaneli Hafız Mustafa Efendi'nin tayini.

- / - / - / - / - / - / 19 / Fî 12 Ramazan sene [1]338 [30 Mayıs 1920] / Fî 31 Mayıs sene [1]336
Mazbata

Kocamustafapaşa civârında Mihrişah Hatun nâm-ı diğer Hacı Kadın Dergâh-ı şerîfî dâhilinde kâin câmi'-i şerîfin imâmet ve hitâbetine ta'yîn buyurulan Hâfız Sâmî Efendi'nin vazifesine mübâşeret etmeyerek terk-i hizmet eylediği tahkîkât-ı vâkî'adan anlaşılmasına binâen münhal addi ile müsâbaka imtihânı i'lân olunmuş idi. Müddet-i mu'ayyenenin hitâmında tâlib olan Âsitaneli Hâfız Mustafa Efendi müte'addid imâmet ve hitâbet vekâletinde hizmeti mesbûk ve hüsni hâl ashâbından bulunduğuna ve lede'l-imtihân ehliyeti tebeyyün etmesine binâen sâlifü'l-arz imâmet ve hitâbet cihetlerinin mûmâ-ileyhe tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhileri buyurulduğu takdîrde mu'âmele-i mukteziyye îfâ ve berât-ı âlî i'tâ olunması husûsunun Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Cevdet, Remzî, Seyyid Mehmed es-Sükûtî, Vahî, Mustafa, Mehmed Gülşen, Tevfik

Yazılmıştır

IST_MFT_MSH_DFT02_01740_0001-0001-0031

Sultan Abdülmecid Han Türbesi hatm-i hâcegânından Arnavut Ali Efendi'nin vefatı üzerine, yerine Hafız Hâlid Efendi'nin tayini.

Fî 29 Şa'bân sene [1]338 / Fî 19 Mayıs sene [1]336 / - / - / - / Sîret / - / 18 / Fî 7 Ramazan sene [1]338 [25 Mayıs 1920] / Fî 26 Mayıs sene [1]336

Mazbata

Cennet-mekân Sultân Abdülmecid Hân hazretleri Türbe-i şerîfesinde tarîkat-i aliyye-i Nakşibendiyye-i Hâlidiyye usûlü üzere beher hafta Cuma gecesî kırâeti meşrûta olan hatm-i şerîf-i hâcegânın muvazzaf müridânından Arnavud Ali Efendi'nin fî 12 Şubat sene [1]336 târihinde vukû'-ı vefâtına mebnî uhdesinden inhilâl eden hatm-i şerîf-i mezkûr cihetinin merhûm Şeyh İsmet Efendi akrabasından ve erbâb-ı ehliyetten Hâfız Halid Efendi uhdesine tevcihi hatm-i şerîf-i mezbûr şeyhi Nimetullah Efendi tarafından inhâ olunmasına ve sûret-i inhâ şürût-ı vakfiyyeye muvâfık görülmesine binâen cihet-i münhalle-i mezkûrenin mûmâ-ileyh Hâfız Halid Efendi uhdesine tevcihi tensîb edilmiş olmağla keyfiyyet rehîn-i tasvîb-i sâmi-i Cenâb-ı Meşîhat-penâhileri buyurulduğu takdîrde mu'âmele-i mukteziyye îfâ ve berât-ı âlî tastîr ve i'tâ olunması husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Cevdet, Remzî, Seyyid Mehmed es-Sükûtî, Vahî, Mustafa, Mehmed Gülşen, Tevfik

Yazılmıştır

IST_MFT_MSH_DFT02_01740_0001-0001-0032

Yedikule’de Hacı Evhadüddin Dergâhı postnişini Şeyh Hasan Vefâ Efendi’nin vefatı üzerine meşihate, Hasan Adlî Efendi’nin hissesi de eklenerek müteveffanın oğlu Yâkub Şemseddin Efendi’nin tayini.

27 Şa’bân sene [1]338 / 17 Mayıs sene [1]336 / - / - / - / Sîret / - / 17 / 27 minhü [16 Mayıs 1920] / 17 minhü

Mazbata

İstanbul’da Yedikule’de kâin tarikat-i Halvetiyye-i Sünbüliyye’den Hacı Evhadüddin Dergâh-ı şerîfi postnişini pederi Şeyh Hasan Vefa Efendi’nin vukû’-ı vefâtıyla inhilâl eden mezkûr postnişinlik cihetinin uhdesine tevcihi Ya’kûb Şemseddin Efendi tarafından taleb ve istidâ olunması üzerine Meclis-i dâ’iyânemiz ifâdesiyle sebk eden muhâbere neticesinde Evkâf-ı Hümâyûn Nezâret-i celîlesinden vârid olan kayıd sûretine nazaran mezkûr dergâh meşihat cihetinin münâsafaten ve müstereken bâ-berât-ı âlî müteveffâ-yı mûmâ-ileyh Hasan Vefa ve biraderzâdesi Hasan Adlî efendilerin uhdelinde olduğu anlaşılmıştır.

İcâbı lede’l-müzâkere müstağnî-i arz ve izâh olduğu üzere müstereken tasarruf olunan cihât hissedârânından birinin vefâtı vukû’unda hissesi müstereklerinden en ziyade ehil olana ilâveten tevcih olunacağı Tevcih-i Cihât Nizâm-nâmesi’nin on dokuzuncu maddesi ahkâmından olduğundan hisse-i mahlûle isbât-ı ehliyyet etmek şartıyla şerik-i mûmâ-ileyh Hasan Adlî Efendi’ye teklîf olundukta imtihândan ibâ etmesiyle gerek teveccüh eden ve gerek uhdesinde bulunan hisselerinden hakkını iskât ettiğine mebnî uhdesinde bulunan nısf hissenin dahi ref’i ile bu sûretle mezkûr dergâh meşihat cihetinin tamamı münhal addolunması takarrur etmiştir.

Müsted’î-i mûmâ-ileyh Ya’kûb Şemseddin Efendi tarikat-i aliyye-i mezkûre hulefâsından ve ashâb-ı zühed ve takvâdan olup bi’l-imtihân ehliyyet ve kifâyeti tebeyyün etmesine binâen ber-vech-i ma’rûz inhilâl eden dergâh-ı mezkûr meşihat cihetinin müstakillen mûmâ-ileyhe tevcihi tensîb edilmekle rehîn-i tasvîb-i sâmi’i Cenâb-ı Meşihat-penâhîleri buyurulduğu takdîrde mu’amele-i mukteziyye ifâ ve berât-ı âlî itâ olunmak üzere mazbata-i dâ’iyânemizin leffîyle nezâret-i müşârun-ileyhâya tezkire-i aliyye tasâtir buyurulması bâbında.

Cevdet, Remzî, Vahyî, Mustafa, Tevfik

Yazılmıştır

IST_MFT_MSH_DFT02_01740_0001-0001-0033

Fatih Topraşı Mahallesi’nde Şerbetçizâde Türbesi bitişiğindeki Rifâî Dergâhı’nın şeyhi Mehmed Arif Efendi’nin vefatı üzerine cihetin, yanan dergâhı yeniden ve kendi malından yaptırmak şartıyla Reîsülkurrâ Şeyh Mehmed Cemâleddin Efendi’ye tevcihi.

Fî 15 Şa’bân sene [1]338 / Fî 5 Mayıs sene [1]336 / - / - / - / Sîret / - / 16 / Fî 20 Şa’bân sene [1]338 [9 Mayıs 1920] / Fî 10 Mayıs sene [1]336

Mazbata

İstanbul’da Fenâî Dede Çeşmesi kurbünde Topraşı Mahallesi’nde Şerbetçizâde Türbesi ittisâlinde merhûm Nu’mân Bey’in binâ eylediği Rifâî Dergâh-ı şerîfinin şeyhi Mehmed Arif Efendi’nin bilâ-veled vukû’-ı vefâtına mebnî inhilâl eden cihet-i mezkûreye meşrûtün-lehi bulunduğundan

bahisle uhdesine tevcihi Şeyh Mehmed Cemâleddin Efendi tarafından istid'â olunması üzerine sebk eden iş'âr-ı âlî'ye cevâben Evkâf-ı Hümâyûn Nezâret-i celîlesinden vârid olup havâle buyurulan merbût fî 4 Şa'bân sene [1]338 ve fî 25 Nisan sene [1]336 târihli ve husûsî elli altı numaralı tezkireye melfûf vakfiye ve kuyûd-ı mütedâvile sûret-i musaddakalarının mütâla'asından dergâh-ı şerîf-i mezkûr meşîhat cihetinin vâkıfın evlâd ve hulefâsına ve ba'de'l-inkırâz mutlaka tarikat-i aliyye-i Rifâ'iyye hulefâsına meşrûta olduğu ve evlâdın inkırâzına mebnî hulefâyâ tevcih olunageldiği anlaşılmıştır.

Îcâbı lede'l-müzâkere dergâh-ı mezkûr Fâtih harîk-i kebîrinde muhterik ve el-yevm arsa hâlinde olup bu gibi dergâh arsalarının müceddeden inşâ ettirmek şartıyla ehil ve tâlibine tevcihi müte'amil olmasına ve müsted'î Şeyh Mehmed Cemâleddin Efendi reîsü'l-kurrâ ve tarikat-i aliyye-i Rifâ'iyye'nin ecille-i meşâyihinden olmasıyla ehil ve meşrûtün-lehi bulunmakla beraber si'a-i hâlinde kendi malından mezkûr arsa üzerine dergâh inşâsını dahi der'uhde eylemesine binâen cihet-i ma'rûzanın mûmâ-ileyhe tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i lâzimenin îfâsı zımında işbu mazbata-i dâ'iyânemizin leffîyle nezâret-i müşârun-ileyhâya tezkire-i cevâbiyye şeref-tastîr buyurulması bâbında.

Remzî, Cevdet, Vahyî, Seyyid Mehmed es-Sükûtî, Mustafa, Tevfik

Yazılmıştır Hüsâm

IST_MFT_MSH_DFT02_01740_0001-0001-0034

Yenikapı'da Merkez Efendi Hankahı Camii hatibi ve imam nâibi Silistreli Hafız Ahmed Efendi'nin vefatı üzerine, yerine Hafız Osman Efendi'nin vekâletiyle dergâhın şeyhi Mehmed Nûreddin Efendi b. Ahmed Mesud Efendi'nin tayini.

15 Şa'bân sene [1]338 / 5 Mayıs sene [1]336 / - / Kırmızı 71 / 149 Lef 1 / Sîret / - / 15 / Fî 18 Şa'bân sene [1]338 [7 Mayıs 1920] / Fî 8 Mayıs sene / [1]336

Mazbata

Evkâf-ı mazbûtadan cennet-mekân Sultân Selim Hân kerîmesi merhûme Şah Sultân Vakfından vazîfesi muhassas olan İstanbul'da Bâb-ı Cedîd hâricinde Hazret-i Merkez -kuddise sırruhu'l-e'az- hânkâhı câmi'-i şerîfî hatîbi ve imâm nâibi Silistreli Hâfız Ahmed Efendi'nin fî 28 Şubat sene [1]336 târihinde bilâ-veled vukû'-ı vefâtıyla inhilâl eden cihet-i hitâbetin uhdesine tevcihi dergâh-ı mezkûr şeyhi ve imâmı Mehmed Nureddin Efendi tarafından istid'â olunması üzerine Meclis-i dâ'iyânemiz ifâdesiyle sebk eden iş'âr-ı âlîye cevâben Evkâf-ı Hümâyûn Nezâret-i celîlesinden vârid olup havâle buyurulan merbût 6 Şa'bân sene [1]338 târihli ve 57 numaralı tezkire ve melfûf kuyûd-ı mütedâvile sûreti mütâla'a olundu.

Sûret-i müzekkire mündericâtına nazaran sâlifü'l-arz hitâbet ciheti müteveffâ Şeyh Ahmed Mes'ûd Efendi mahlûlünden 20 Cumâdelûlâ sene [1]332 târihinde asâleten ve imâmet ciheti 13 Mart sene [1]330 târihinde müsted'î Mehmed Nureddin Efendi'ye niyâbeten müteveffâ-yı mûmâ-ileyh Ahmed Efendi uhdesine müvecceh olduğu anlaşılmış ve ciheteyn-i mezkûreteynin şahs-ı vâhîde tevcihi ahîran kabûl olunan tasnîf kararı îcâbından olmasına mebnî münhal hitâbetin dahi müsted'î-i mûmâ-ileyhe tevcihi muktezî bulunmuş ise de kendisinin vazîfe-i askeriyyesini îfâ etmekte olması hasebiyle terhîsinden sonra isbât-ı ehliyyet etmek şartıyla el-yevm

vekâletinde bulunan Hâfız Osman Efendi tarafından vazîfe-i hitâbet bi'l-vekâle ve imâmet bi'n-niyâbe îfâ olunmak üzere hitâbet cihetinin dahi müsted'î-i mûmâ-ileyh Şeyh Mehmed Nuredin Efendi b. Ahmed Mes'ûd'a tevcihi tensîb edilmekle sûret-i ma'rûza karîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i lâzimenin icrâsı husûsunun cevâben nezâret-i müşârun-ileyhâya iş'âr ve işbu mazbata-i dâ'iyânemizin leffen tesyâr buyurulması bâbında.

Remzî, Cevdet, Seyyid Mehmed es-Sükûtî, Mustafa, Tevfik

Yazılmıştır Hüsâm

IST_MFT_MSH_DFT02_01740_0001-0001-0035

Kocamustafapaşa'da Mihrişah Hatun Zaviye ve Camii'nde müezzin ve kayyım olan Şeyh Sadeddin Efendi'nin vefatı üzerine, görevlerin oğullarından Receb Efendi'ye asaleten tevcihi.

13 Şa'bân sene [1]338 / 3 Mayıs sene [1]336 / - / - / - / Siret / - / 14 / 13 minhü [2 Mayıs 1920] / Fî 3 minhü

Mazbata

Kocamustafapaşa civârında kâin Mihrişah Hatun Zâviyesiyle câmi'-i şerîfnde müteveffâ Şeyh Sadeddin Efendi'den inhilâl eden müezzinlik ve kayyımlık cihetlerinin Mehmed Ali Efendi niyâbetiyle müteveffâ-yı mûmâ-ileyhin sagîr oğulları Receb ve Hayreddin efendilere tevcihi hakkında Meclis-i dâ'iyânemizden tanzîm ve takdîm kılınan 8 Rebî'ülevvel sene [1]338 ve 1 Kânûn-ı evvel sene [1]335 târihli ve 30 numaralı mazbatanın leffiyle şeref-tastîr buyurulan tezkire-i aliyye-i Meşîhat-penâhîlerine cevâben Evkâf-ı Hümâyûn Nezâret-i celîlesinden vârid olup havâle buyurulan 14 Cumâdelâhire sene [1]338 ve 6 Mart sene [1]336 târihli ve 31 numaralı merbût tezkirede câmi'-i şerîf-i mezkûrun inde't-tasnîf dâhil bulunduğu sınıfa nazaran ciheteyn-i mezkûreteynin şahs-ı vâhide tevcihi kabûl edilmiş olduğundan Tevcih-i Cihât Nizâmnâmesi'nin on birinci madde-i nizâmiyyesine tevfiikan sagîrân-ı mezbûrânın sinnen ekberine bi'n-niyâbe tevcihi muvâfık olacağı beyân ve iş'âr edilmiştir. İcâb-ı keyfiyyet lede'l-müzâkere sâlifü'l-arz icrâ kılınan mu'âmele-i tevcihiyye tasnîf kararının Meclis'e tebliğinden mukaddem olmasına nazaran iş'âr-ı vâki' muvâfık-ı maslahat görülmüş ve sagîrân-ı mezbûrânın sinnen ekberi bulunan Receb Efendi Meclis'e mürâca'atla mukaddemâ askerde iken sinninin henüz hadd-i nizâmîye vâsıl olmadığı ihbâr edilmiş ise de ibrâz ettiği tezkire-i Osmâniyye'nin nâtik olduğu vechile üç yüz on beş tevellüdlü olduğunu ve pederinden inhilâl eden ciheteyn-i mezkûreteynin îfâsına ehil bulunduğunu ve nâib ta'yîn edilmiş olan Mehmed Emin Efendi'nin terk-i hizmet etmesine mebnî bi'l-fi'il îfâ-yı hizmet etmekte olduğunu îfâde ve her iki cihetin uhdesine tevcihini istid'â etmesine mebnî icrâ kılınan tahkîkâtan müdde'âsı mukârin-i hakikat idiği anlaşılmış olduğundan mûmâ-ileyhin müsta'fi addi ile ciheteyn-i mezkûreteynin ehliyet ve kifâyeti bi'l-imtihan tebeyyün eden mûmâ-ileyh Receb Efendi uhdesine asâleten tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye îfâ ve berât-ı âlîsi i'tâ olunmak üzere mazbatanın leffiyle nezâret-i müşârun-ileyhâya tezkire-i cevâbiyye tastîr buyurulması bâbında.

Remzî, Vahyî, Seyyid Mehmed es-Sükûtî, Mustafa, Tevfik

Yazılmıştır

IST_MFT_MSH_DFT02_01740_0001-0001-0036

Eyüp'te Kâşgarî Abdullah Efendi diğer adıyla Murtaza Efendi Dergâh ve Mescidi müezzin, kayyım, devirhan, salâ ve bevvâblık cihetleri mutasarrıfları Şeyh Mehmed Bahâeddin Efendi, Mehmed Âşir Efendi ve Mehmed Nidâî Efendi'nin hisselerinin Hâlid Efendi b. Hacı İbrâhim'e tevcihi.

7 Şa'bân sene [1]338 / 26 Nisan sene [1]336 / - / - / 216 / Sîret / - / 13 / 13 Şa'bân minhü [2 Mayıs 1920] / 3 Mayıs sene-i minhü

(Mukaddemâ yazılan mazbatada gösterilen cihetler İstanbul Vilâyeti Evkâf Müdüriyyeti'nin iş'âr-ı cevâbîsine müstenid olduğu)

Mazbata

Hazret-i Ebâ Eyyûb el-Ensârî -radiye anhü'l-Bârî- civâr-ı rahmet-medârında kâin Kaşgarî Abdullah Efendi nâm-ı diğer Murtaza Efendi Dergâh ve Mescid-i Şerîfinin müezzinlik ve kayyım ve devirhân ve salâcılık cihetlerinin müteveffâ Şeyh Mehmed Bahâeddin Efendi mahlûlünden Şeyh Hasan Fehmî Efendi uhdesine vekâleten tevcihi hakkında takdîm olunup mazrûfen Evkâf-ı Hümâyûn Nezâret-i celîlesine irsâl buyurulmuş olan 11 Şa'bân sene [1]337 ve 12 Mayıs sene [1]335 târihli müzekkire-i dâ'iyânemiz üzerine icrâ kılınan tedkikât-ı kuyûdiyye neticesinde müezzin ve kayyım ve bevvâb cihetleri müteveffâ-yı mûmâ-ileyh Bahâeddin Efendi'ye ve iki aded devirhân ve bir aded müezzin-i salâ cihetleri de Seyyid Mehmed Âşir ve Seyyid Mehmed Nidâî efendilere müveccih olduğu anlaşıldığından evvel emirde nukât-ı mübâyinenin tedkikiyle neticesinin inbâsına dâir müzekkirenin i'âdesiyle vârid olup havâle buyurulan 11 Ramazan sene-i minhü ve 10 Haziran sene-i minhü târihli ve husûsî yetmiş iki numaralı merbût tezkire kırâet olundu. Tedkikât-ı lâzime lede'l-icrâ mûmâ-ileyhimâdan Âşir Efendi bilâ-veled ve Nidâî Efendi'nin oğlu mûmâ-ileyh Mehmed Bahâeddin Efendi'yi terk ile mukaddemâ vefâtları vukû'uyla uhdelerinde bulunan mezkûr cihetler inhilâl ettiği anlaşılmış ve Nidâî Efendi'den inhilâl eden müezzin-i salâ ciheti oğlu mûmâ-ileyhe tevcih olunmaksızın mûmâ-ileyh dahi vefât eylemiş olduğundan sâlifü'l-arz münhal bulunan cihâtın hidemâtı müzekkire-i sâbıkada arz olunan Şeyh Hasan Fehmî Efendi tarafından 17 Nisan sene-i minhü târihinden fi 14 Temmuz sene-i minhü târihine kadar vekâleten ifâ edilmiş ve târih-i mezkûrdan i'tibâren vekâletinden infikâk eylemiş olmağ- la ol vakitten beri kezâ bi'l-vekâle ifâ-yı vazife eden Halid Efendi'nin hüsn-i hizmet ve ehliyeti tebeyyün etmiş olmasına ve bu misilli vazîfesi mikdârı kalîl olan cihât-ı müte'addidenin şahs-ı vâhide tevcihi Tasnîf Kararnâmesi icâbından bulunmasına binâen sâlifü'l-arz müezzin ve kayyım ve bevvâb cihetlerinin müteveffâ Şeyh Mehmed Bahâeddin ve iki aded devirhân ve bir aded müezzin-i salâ cihetlerinin de Mehmed Âşir ve Mehmed Nidâî efendiler mahlûllerinden mûmâ-ileyh Halid Efendi b. Hacı İbrâhîm uhdesine tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhileri buyurulduğu takdirde mu'âmele-i mukteziyyesi ifâ ve mûmâ-ileyh Hasan Fehmî ve Halid efendilerin müddet-i vekâletlerine âid muhassasâtın dahi tam olarak tesviye ve i'tâ olunması husûsunun cevâben nezâret-i müşârun-ileyhâya iş'âr ve melfûf ma'rûza ile işbu mazbata-i dâ'iyânemizin leffen tesyâr buyurulması bâbında.

Remzî, Cevdet, Vahyî, Mustafa, Tefvik

Yazılmıştır

El ayağı sakat olduğundan ekalliyette bulunmakdayım.

Seyyid Mehmed es-Sükûtî

IST_MFT_MSH_DFT02_01740_0001-0001-0037

İstanbul'da Fatma Sultan Camii'nde hatm-i hâce vazifesi mutasarrıfı Şeyh İsmâil Necâti Efendi'nin vefatı üzerine, yerine caminin haremünde bulunan Nakşibendî Zaviyesi'nin şeyhi Ömer Ziyaeddin Efendi'nin tayini.

7 Şa'bân sene [1]338 / 26 Nisan sene [1]336 / - / - / - / Sîret / - / 12 / Fî 9 Şa'bân sene [1]338 [24 Nisan 1920] / Fî 27 Nisan sene [1]336

Mazbata

Der'aliyye'de Fatıma Sultan Câmi'-i şerîfinde ber-vech-i hasbî hatm-i hâcegân cihetinin mutasarrıfı Şeyh İsmâil Necâtî Efendi'nin vukû'-ı vefâtına mebnî inhilâl eden cihet-i mezkûreye tâlib zuhûr etmemesine ve câmi'-i şerîf-i mezkûr harîminde tarikat-i aliyye-i Nakşibendiyye-i Hâlidîyye meşâyihinden Gümüşhâneli merhûm Şeyh Ahmed Efendi Vakfından ve tarikat-i aliyye-i mezkûre erkânı üzere hatm-i hâcegâna mahsûs meşîhati Şeyh Ömer Ziyaeddin Efendi'ye müvecceh olan zâviye ile edâ-yı hizmet mahalleri akreb olup her iki cihetin vezâîfi bir zât tarafından ifâ olunagelmîş bulunmasına binâen Tevcîh-i Cihât Nizâmnâmesi'nin on dördüncü maddesinin fıkra-i âidesi mücebince mârru'l-arz ber-vech-i hasbî hatm-i hâce cihetinin dahi mûmâ-ileyh Şeyh Ömer Ziyaeddin Efendi uhdesine tevcîhi tensîb edilmekle karîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye ifâ ve berât-ı âlîsi i'tâ olunması zımında mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyye-i Fetvâ-penâhîleri şeref-tastîr buyurulması bâbında.

Remzî, Cevdet, Vahyî, Mustafa, Tevfik

Yazılmıştır

IST_MFT_MSH_DFT02_01740_0001-0001-0038

Üsküdar'da Kazasker Ahmetefendi Mahallesi'nde Keşfi Şeyh Ahmed Efendi Dergâhı meşîhat ve tevliyet cihetleri sahibi Şeyh Mehmed Hicâbî Efendi'nin vefatıyla, meşîhatin Seyyid Avni Efendizâde Şeyh Mehmed Hamid Efendi Dergâhı postnişini Şeyh Eşref Efendi niyâbetinde müteveffanın oğlu Ahmed Burhanullah Efendi'ye tevcihi.

28 Receb sene [1]338 / 19 Nisan sene [1]336 / - / - / - / Sîret / - / 11 / Fî 5 Şa'bân sene [1]338 [24 Nisan 1920] / Fî 24 Nisan sene [1]336

Mazbata

Üsküdar'da Kazasker Ahmedefendi Mahallesi'nde kâin tarikat-i aliyye-i Kâdiriyye'den Keşfi eş-Şeyh Ahmed Efendi Dergâh-ı şerîfinin bâ-berât-ı âlî meşîhat ve tevliyet cihetlerine mutasarrıf olan Şeyh Mehmed Hicabi Efendi'nin fî 17 Kânûn-ı sâni sene [1]336 târihinde vukû'-ı vefâtına mebnî inhilâl eden meşîhat cihetinin Şeyh Eşref Efendi niyâbetiyle müteveffâ-yı mûmâ-ileyhin on sekiz yaşında bulunan ekber evlâdı Ahmed Burhanullah Efendi'ye tevcîhi istid'â olunması üzerine Meclis-i dâ'iyânemiz ifâdesiyle sebk eden iş'âr-ı âliye cevâben vârid olup havâle buyurulan 19 Ramazan sene [1]336 târihli ve 45 husûsî numaralı tezkireye leffen Evkâf-ı Hümâyûn Nezâret-i celîlesinden mürsel dergâh-ı mezkûr vakfiyesiyle der'uhde kaydı sûretleri mütâlâ'a ve tedkîk olundu.

Meâllerine nazaran ber-vech-i hasbî meşîhat ciheti 10 Safer sene [1]317 târihinde müteveffâ-yı mûmâ-ileyh Şeyh Mehmed Hicabi Efendi'ye müvecceh olduğu anlaşılmış ve mûmâ-ileyhin terk ettiği iki nefer evlâd-ı zükûrundan ekberi olup tarîk-i tahsilde bulunan on sekiz yaşında Ahmed Burhanullah Efendi'nin Tevcih-i Cihât Nizâmnâmesi ahkâmına tevfiқан sinni hadd-i nizâmîye vâsıl olarak bi'n-nefs edâ-yı hizmete kesb-i liyâkat edinceye değin evvelce ifâ-yı vazîfeye vekîl ta'yîn olunan tarîk-i Kâdiriyye'den Seyyid Avni Efendizâde Şeyh Mehmed Hamid Efendi Dergâh-ı şerîfi postnişini Şeyh Eşref Efendi bi'n-niyâbe ve ber-vech-i hasbî ifâ-yı vazîfe etmek ve mûmâ-ileyhin tahsîl ve terbiyesine nezâret ve i'tinâ eylemek üzere mezkûr meşîhat cihetinin mûmâ-ileyh Ahmed Burhanullah Efendi uhdesine tevcihi tensîb edilmiş olmağla rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'amele-i mukteziyyesinin ifâsıyla berât-ı âlisinin ısdârı zımnında mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyye şeref-tastîr buyurulması bâbında.

Vahyî, Remzî, Cevdet, Mustafa, Ali, Tevfik

Yazılmıştır Hüsâm

IST_MFT_MSH_DFT02_01740_0001-0001-0039

İstanbul Yeniköy'de Raûfî Şeyh İsmâil Efendi Dergâhı şeyhi Niyazi Efendi'nin nâibi Servet Efendi'nin vefatı üzerine, yerine Beykoz Raûfî Dergâhı şeyhi Hafız Ahmed Cemâleddin Efendi tayin edildiğinden dergâh tahsisatının kendisine verilmesi.

29 Receb sene [1]338 / 19 Nisan sene [1]336 / - / - / 293 / Sîret / - / 10 / Fî 29 Receb sene [1]338 [18 Nisan 1920] / Fî 19 Nisan sene [1]336

Mazbata

Der'aliyye'de Yeniköy'de kâin tarîkat-i aliyye-i Halvetiyye'den Raûfî Şeyh İsmâil Efendi Dergâh-ı şerîfi şeyhi sagîr mahdûmu Niyazi Efendi'nin nâibi Servet Efendi'nin 3 Receb sene [1]338 târihinde vukû'-ı vefâtına mebnî yerine Beykoz'da Raûfî Dergâhı postnişini Hâfız Ahmed Cemâleddin Efendi'nin naib ta'yîni istid'âsına dâir Fatıma Hanım tarafından takdîm olunup havâle buyurulan merbût arzuhâl kırâet olundu.

Kuyûda lede'l-mürâca'a sâlifü'l-arz Şeyh İsmâil Efendi Dergâhı meşîhat cihetinin bâ-berât-ı âlî mutasarrıfı sagîr Niyazi Efendi tarafından bi'n-niyâbe ifâ-yı vazîfeye Şeyh Servet Efendi'nin ta'yîn olunduğu 8 Safer sene [1]335 ve 24 Teşrîn-i sâni sene [1]333 târihli ve 96 numaralı mazbata kaydından ve mûmâ-ileyhin bu kere vukû'-ı vefâtı ve sagîr-i merkûmun sinni henüz hadd-i nizâmîye vâsıl olmadığı tahkîkât-ı vâkı'adan anlaşılmış olduğundan merkûmun sinni hadd-i nizâmîye vâsıl olarak bi'l-fi'il ifâ-yı hizmete iktisâb ve isbât-ı ehliyyet edinceye değin tarafından bi'n-niyâbe edâ-yı hizmet etmek ve sagîrin tahsîl ve terbiyesine nezâret ve ihtimâm eylemek üzere akrabâsından ve tarîkat-i mezkûre meşâyihinden olup hüsn-i sülûk ashâbından bulunan mûmâ-ileyh Şeyh Hâfız Ahmed Cemâleddin Efendi'nin nâib ta'yîni bi't-tensîb keyfiyyet kendisine tebliğ olundukta ber-vech-i hasbî ol vechile niyâbet-i mezkûreyi kabûl eylemiş olmağla sûret-i ma'rûza rehîn-i tasvîb-i sâmi-i Cenâb-ı Fetvâ-penâhîleri buyurulduğu takdîrde tashîh-i kaydı ile muhassasât ve mu'ayyenâtının kemâ-kân sagîr-i merkûm nâmına tesviyesi husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyi, Remzî, Cevdet, Seyyid Mehmed es-Sükûtî Mustafa, AliMu‘ayyenâtın müsted‘iye nâmına tesviyesi hilâf-ı usûl olup nâib nâmıyla tesviyesi lâzım gelir.

Seyyid Mehmed es-Sükûtî

IST_MFT_MSH_DFT02_01740_0001-0001-0040

Eyyûb'te Mihrişah Vâlide Sultan Türbesi hatm-i hâce ciheti mutasarrıflarından Şeyh Mehmed Bahâeddin Efendi'nin vefatıyla, görevlerinin Ahmed Mekkî Efendi'ye tevcihi.

- / - / - / - / - / - / - / - / 9 / Fî 29 Receb sene [1]338 [18 Nisan 1920] / Fî 19 Nisan sene [1]336

Mazbata

Hazret-i Ebâ Eyyûb el-Ensârî -radiye anhü'l-Bârî- civâr-ı rahmet-medârında kâin firdevs-âşiyân Vâlide Mihrişah Sultân Türbe-i şerîfesinde beher hafta Pazar ve Perşembe günleri ba'de edâ-yı salâti'l-asr kırâeti meşrût olan hatm-i hâcegân cihâtı ashâbından Şeyh Mehmed Bahâeddin Efendi'nin vukû'-ı vefâtıyla inhilâl eden hatm-i hâcegân cihetinin şart-ı vâkıf mücebince Ahmed Mekkî Efendi'ye tevcihi Kaşgârî Dergâh-ı şerîfi postnişinliği tarafından inhâ olunmuş ve dergâh-ı mezkûr seknesinden bulunan mûmâ-ileyhin ifâ-yı vazîfeye ehliyeti tebeyyün etmiş olmasına binâen sâlifü'l-arz hatm-i hâce cihetinin Şeyh Mehmed Bahâeddin Efendi mahlûlünden mûmâ-ileyh Ahmed Mekkî Efendi'ye tevcihi şart-ı vâkıfa muvâfık görölerek tensib edilmekle rehîn-i tasvîb-i sâmi-i Cenâb-ı Meşihat-penâhileri buyurulduğu takdirde mu'âmele-i kaydiyyesi ifâ ve berât-ı âlîsi tastîr ve i'tâ olunması zımınında mazbata-i dâ'iyânemizin leffiyle Evkâf-ı Hümayûn Nezâret-i celîlesine tezkire-i aliyye tastîr buyurulması bâbında.

Vahyî, Remzî, Cevdet, Seyyid Mehmed es-Sükûtî, Mustafa, Ali, Tevfik

Yazılmıştır Hüsâm

IST_MFT_MSH_DFT02_01740_0001-0001-0041-42

Fatih Çarşamba'da Sebzebane kâtibi Mehmed Efendi Dergâhı Camii imamet ve kayyımlik ciheti mutasarrıfı, dergâhın postnişini Şeyh Tevfik Efendi'nin kayyımlik hizmetine son verilerek, cihetin caminin müezzini Hasan Hüsnü Efendi b. Mehmed'e tevcihi.

Fî 14 Receb sene [1]338 / Fî 5 Nisan sene [1]336 / - / - / - / - / Sîret / - / 8 / Fî 24 Receb sene [1]338 [13 Nisan 1920] / Fî 14 Nisan sene [1]336

Mazbata

Çarşamba civârında kâin Sebzebane kâtibi Mehmed Efendi'nin binâ-kerdesi olan Şa'bânî Dergâhı derûnundaki câmi'-i şerîfin imâmet cihetinin dergâh-ı mezkûr postnişini Şeyh Tevfik Efendi uhdesine tevcihi tensib olduğuna dâir takdîm kılınan fî 21 Kânûn-ı evvel sene [1]335 târihli ve 34 numaralı mazbata-i dâ'iyânemiz tasvîb-i sâmi-i Cenâb-ı Meşihat-penâhilerine iktirân etmiş ve icâbı icrâ buyurulmuş idi. Câmi'-i şerîf-i mezkûrun şehri kırk yedi guruş vazîfe ile kayyımlik ciheti dahi bâ-berât-ı âlî mûmâ-ileyhin uhdesinde bulunup ahîran Evkâf-ı Hümayûn Nezâret-i celîlesinden mürsel Tasnîf-i Cihât Komisyonu kararnâmesi mücebince tanzîm edilmiş olan defterde câmi'-i şerîf-i mezkûr muhterik ve münhedim cevâmî' kısmına derc edilmiş ise de câmi'-i mezkûr el-yevm ma'mûr ve küşâde bulunduğuna ve emsâli cevâmî'a nazaran sekizinci sınıf i'tibârıyla imâmet vazîfesinin üç yüz ve müezzinlik ile kayyımlik hizmetlerinin

tevîhî ile vazîfesinin iki yüz guruşa iblâğı iktizâ edeceğine binâen mezkûr kayyımlik cihetinin hasbe't-tasnîf mûmâ-ileyhin uhdesinden ref'iyle câmi'-i mezbûr müezzini olup ifâ-yı hizmete ehil ve muktedir bulunan Hasan Hüsnü Efendi b. Mehmed uhdesine tevcihi ve vazîfelerinin sâlifü'l-arz mikdâra iblâğı tensîb edilmekle rehîn-i tasvîb-i âlî-i Cenâb-ı Fetvâ-penâhîleri buyurulduğu takdîrde mu'âmele-i mukteziyyenin ifâsı husûsunun mazbata-i dâ'iyânemizin leffîyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Vahyî, Remzî, Cevdet, Mustafa, Ali

Yazılmıştır

[0042]

Fatih Çarşamba'da Sebze hane kâtibi Mehmed Efendi Dergâhı Camisi imamı Muharrem Efendi'nin izinsiz taşraya gitmesi sebebiyle uhdesindeki imamet cihetinin kaldırılarak görevin Mehmed Tefkîk Efendi'ye tevcihi.

Bihî

İstanbul Vilâyeti Evkâf Müdîriyeti

Vazîfe

Aded

178

749

Meclis-i Meşâyih Riyâset-i aliyyesine

Çarşamba'da Sebze hane kâtibi Mehmed Efendi Dergâhı derûnundaki câmi'-i şerîfin imâmı Muharrem Efendi'nin bilâ-me'zûniyet taşraya azîmet etmesine mebnî imâmet cihetinin mûmâ-ileyh uhdesinden ref'iyle müezzin vekâletini ifâ eden Mehmed Tefkîk Efendi uhdesine tevcihi hakkında meclis-i âlîlerinin fi 29 Kânûn-ı evvel sene [1]335 târihli mazbatası tasvîb-i sâmi-i Cenâb-ı nezâret-penâhîye iktirân ederek mu'âmele-i mukteziyyesi derdest ifâ bulunmuş ise de mûmâ-ileyh Tefkîk Efendi'nin uhdesinde kırk yedi guruş yirmi para vazîfe ile kayyımlik cihetinin bâ-berât-ı âlî müvecceh bulunmasına nazaran işbu vazîfenin dahi imâmet vazîfesiyle birlikte tesviyesi lâzım gelip gelmeyeceğinin tedkîk ve ta'yîniyle netîce-i hâsılasının inbâ buyurulması ma'a'l-ihtirâm temennî olunur efendim.

Fi 27 Mart sene [1]336 [27 Mart 1920]

Müdîr nâmına mu'âvin M. Sârim

Kaydıyla Meclis'e takdîm fi 9 Receb sene [1]336 [20 Nisan 1918]

Meclis 117

IST_MFT_MSH_DFT02_01740_0001-0001-0043-44-45

Bâbiâli civarında Fatma Sultan Camii'ndeki Nakşibendî Zaviyesi şeyhi İsmâil Necâti Efendi'nin vefatı üzerine, yerine Dağıstanlı Şeyh Ömer Ziyaeddin Efendi'nin tayini.

23 C. sene [1]338 / 15 Mart sene [1]336 / - / - / - / Siret / - / 7 / Fi 25 Cumâdelâhire sene [1]338 [16 Mart 1920] / Fi 17 Mart sene [1]336

Mazbata

Bâbîâlî civârında Fatıma Sultân -aleyhe'r-rahmeti ve'l-gufrân- Câmi'-i şerîfî derûnunda tarîkat-i aliyye-i Nakşibendiyye-i Hâlidîyye meşîhat cihetinin mutasarrıfı İsmâîl Necâtî Efendi'nin kebîr mahdûmu Hasan Fehmî Efendi'yi terk ederek vukû'-ı vefâtına mebnî inhilâl eden cihet-i mezkûrenin hulefâya meşrûta olduğundan ve kendisi meşrûtün-leh hulefâdan bulunduğu bahisle cihet-i mezkûrenin uhdesine tevcihi Ömer Ziyaeddin Efendi tarafından takdîm olunan arzuhâlde istid'â olunması üzerine Meclis-i dâ'iyânemiz ifâdesiyle sebk eden iş'âr-ı âlîye cevâben Evkâf-ı Hümâyûn Nezâret-i celîlesinden gönderilen kayıd ve iki kıt'a vakfiye sûret-i musaddakalarının birinde Abdiçelebi Mahallesi imâmı es-Seyyid Mustafa Efendi'nin üç bin gurus nukûdu vakfının bin iki yüz seksen târihli vakfiyesinde Bâbîâlî kurbünde Fatıma Sultan Câmi'-i Şerifinde beher hafta Salı gecesi ve Cuma günü beyne'z-zuhr ve'l-asr ve beher gün ba'de salâti'l-fecr vakt-i işrâkda meşâyih-i Nakşibendiyye-i Hâlidîyye'den Mahmud Paşa Medresesi'nde sakin Gümüşhâneli Hoca Ahmed Ziyaeddin Efendi b. el-Hâc Mustafa de'b-i ma'rûf üzere hasbeten lillâh hatm-i hâcegân-ı Nakşibendiyye ve hatim tertîbi vechile tilâvet-i Kur'an-ı azîmü's-şân edip hâsıl olan ecr ü müsevvebatı (İlh ve ba'de vefâtihî mûmâ-ileyhin yerine muktedir bir zât nasb ü ta'yîn olunarak icrâ-yı hatm-i Kur'an-ı azîmü's-şân ve hatm-i hâcegân edip sevâbını bâlâda muharrer olduğu üzere icrâ eyleye ve diğerinde merhûme Fatıma Sultân Câmi'-i şerîfî harîminde bir bâb odada şeref-mukîm tarîkat-i aliyye-i Nakşibendiyye-i Hâlidîyye Meşâyih-i kirâmından es-Seyyid eş-Şeyh el-Hâc Ahmed Efendi b. Mustafa ibn-i Abdurrahman'ın bin üç yüz altı târihli vakfiyesinde "Bâbîâlî nezdinde Nallımescid Mahallesi'nde Gülhâne Sokağı'nda vâki' iki tarafından müteveffâ Rauf Paşa Konağı demekle arîf konak ve iki tarafı tarîk-i âm ile mahdûd hâriciye ve dâhiliyede müştemilât-ı ma'lûmeyi hâvî mezkûr Gülhâne Sokağı'nda altı numara ile murakkam bir bâb menzili hasbeten lillâhi te'âlâ vakf u habs edip şu vech ile ta'yîn-i şürût eyledim ki menzil-i mezkûrda mütene'im-i ni'am-i hayât oldukça sâkin ve dileğim gibi mutasarrıf olam ve vâsıl-ı civâr-ı rahmet olduğumda dâhiliyesinde halîlem Havva Seher hanım sâkine olarak hâriciyesinde dahi hala Geyve'de sâkin hulefâmdan [0044] Şeyh Hasan Efendi sâkin olarak beher haftada Cuma ve Pazartesi günleri müridânıyla beraber tarîkat-i aliyye-i mezkûre âyîn-i icrâ ve zikrullâh edip hâsıl olan sevâbını (İlh ve mûmâ-ileyh Şeyh Hasan Efendi'nin vefâtından sonra kendi hulefâmdan ve ba'dehû hulefâ-i hulefâmdan eslah olanı sâkin ve mutasarrıf olarak minvâl-i muharrer üzere âyîn-i tarîkat-i aliyyeyi icrâ eyleye ve eğer hulefâ-i hulefâ-i hulefâmdan ehil ve erbâb kimesne bulunmazsa ve yâhûd hulefâ munkarız olur ise tarîkat-i aliyye-i mezkûreden müstahlef ehil ve erbâb bir kimesne sâkin ve mutasarrıf olup ber-vech-i muharrer icrâ-yı âyîn-i tarîkat eyleye ve iktizâ eden ta'mîr ve termîmi men lehû's-süknâ üzerine olup menzil-i mezkûrda meşrûtiyet üzere sâkin olanlar mallarından harc u sarf ile ta'mîr ve termîm eyleyeler ve halîlem mûmâ-ileyhânın vefâtından sonra dâhiliyye-i mezkûrede hâriciyesinde meşrûtiyet üzere sâkin olanların evlâd ü iyâleri sâkin olalar" deyu mastûr olup der'uhde kaydı sûretinde ise Bâbîâlî civârında Fatıma Sultan Câmi'-i şerîfînde beher hafta Salı gecesi ve Cuma günü beyne'z-zuhr ve'l-asr ve beher gün ba'de salâti'l-fecr vakt-i işrâkda hatm-i hâcegân-ı Nakşibendiyye ve hatim tertîbi vech ile tilâvet-i Kur'an-ı azîmü's-şân olunmak için Abdiçelebi Mahallesi imâmı Mustafa Efendi'nin üç bin gurus nukûd-ı mevkûfesinden almak üzere ber-vech-i hasbî hatm-i hâcegân ve senevî yirmi beş gurus vazîfe ile ber-vech-i meşrûta tevliyet cihetleri fî 4 Zilhicce sene [1]329 târihiyle mücîz ulemâdan İsmâîl Necâtî Efendi'ye tevcih olunduğu görülmüştür.

İcâbı lede'l-müzâkere sâlifü'l-arz vakfiyeler müfâdına nazaran câmi'-i şerîf-i mezkûr derûnunda İmâm Mustafa Efendi Vakfından ve cihât-ı gayr-i meşrûtadan ber-vech-i hasbî bir nakşî meşîhati ile meşîhate meşrûta tevliyet cihetleri ve câmi'-i mezkûr kurbünde kâin menzil-i mahsûs ve ma'yyetinde tarikat-i mezkûre usûl ve erkânınca hatm-i hâcegân icrâ olunması için Şeyh Ahmed Ziyaeddin Efendi Vakfı'ndan ve cihât-ı meşrûtadan diğer bir nakşî meşîhati ile meşîhate meşrûta tevliyet cihetleri mevcûd olup bu iki meşîhat cihetinden yalnız câmi'-i şerîf derûnundaki cihet-i meşîhatin müteveffâ-yı mûmâ-ileyh İsmâîl Necâtî Efendi uhdesine müvecceh ve diğerinden sükût edilmiş ise de ke-ennhû tevhitden mûmâ-ileyhe tevcîh olunmuş gibi menzil-i mezkûre dahi [0045] hasbe'l-meşîha tasarruf eylemiştir. Tevliyet cihetlerinin meclisimize ta'alluku olmayıp ancak mezkûr iki mahaldeki meşîhat cihetlerinden ber-vech-i ma'rûz cihât-ı gayr-i meşrûtadan olan câmi'-i şerîf derûnundaki meşîhat hasbe'n-nizâm müteveffâ-yı mûmâ-ileyhin kebîr mahdûmuna teklîf olunarak ta'rîfât-ı nizâmiyye vechile mu'âmele icrâsı zarûrî olduğundan ona dâir cereyân edecek mu'âmele ayrıca arz olunmak üzere cihât-ı meşrûtadan bulunan menzil-i mezkûredeki münhal Nakşibendiyye-i Hâlidîyye meşîhat cihetinin vâkıf-ı mûmâ-ileyh Gümüşhâneli merhûm Şeyh Ahmed Efendi'nin bizzât hulefâsından olup ilim ve irfânıyla ma'rûf ve zâviye-i mezkûre hulefâ ve mensûbûnince bâ-mazbata müntahab müsted'î Dağıstanlı Şeyh Ömer Ziyaeddin Efendi uhdesine tevcîhi şart-ı vâkıfa ve ahkâm-ı nizâmiyyeye muvâfık bulunmuş olduğundan mûmâ-ileyhin uhdesine tevcîhi tensîb edilmiş ve müteveffâ Şeyh İsmâîl Necâtî Efendi halîlesi hanımın dahi el-yevm sâkine bulunduğu menzil-i mezkûrun ba'demâ dahi bir tarafında iskân edilmesinin bazı emsâli vechile berât-ı âlî'ye derci muvâfık-ı hâl ve maslahat görülmüş olmağa rehîn-i tasvîb-i âlî-i Cenâb-ı Fetvâ-penâhîleri buyurulduğu takdîrde mu'âmele-i mukteziyye ifâ ve berât-ı âlîsi i'tâ olunması zımında mazbata-i dâ'iyânemizin leffîyle Evkâf-ı Hümayûn Nezâret-i celîlesine tezkire-i alîyye şeref-tastîr buyurulması bâbında.

Remzî, Cevdet, Vahyî, Seyyid Mehmed es-Sükûtî, Mustafa, Ali, Tevfik

Yazılmıştır

IST_MFT_MSH_DFT02_01740_0001-0001-0046

Beşiktaş'ta Yahya Efendi Hankahı Camii'nin hitabet, hatm-i han ve imamet cihetlerinin mutasarrıfı Hüseyin Şevki Efendi'nin vefatı üzerine, yerine vekâleten tayin edilen caminin müezzini Hafız Fahreddin Efendi b. Sıdkı'nın asaleten tayiniyle, kendisinden münhal kalan müezzinliğe de Halil İbrâhim Efendi b. Şükrü'nün tayini.

15 C. sene [1]338 / 7 Mart sene [1]336 / - / - / 71 / Sîret / - / 6 / Fî 18 Cumâdelâhire sene [1]338 [9 Mart 1920] / Fî 10 Mart sene [1]336

Mazbata

Cennet-mekân Bezmiâlem Vâlide Sultân hazretleri Evkâf-ı şerîfesinden almak üzere kadîm ma'a zam şehri yüz yetmiş guruş vazîfe ile Beşiktaş'ta Yahya Efendi hazretlerinin Hânkâh-ı Câmi'-i şerîfinde hitâbet ve ber-vech-i meşrûta hatm-i hân ve şehri yüz yetmiş beş guruş vazîfe ile imâmet ve ber-vech-i meşrûta hatm-i hân cihetlerinin mutasarrıfı Hüseyin Şevki Efendi'nin vukû'-ı vefâtına mebnî inhilâl eden mezkûr cihetlerin câmi'-i şerîf-i mezkûr müezzini olup Şûrâ-yı Evkâfca ehliyeti tebeyyün etmesine mebnî fî 8 Teşrîn-i sâni sene [1]332 târihinde vekâleten uhdesine tevcîh buyurulan Hâfız Fahreddin Efendi b. Sıdkî uhdesinde bulunan müezzinlik

cihetini terk ederek sâlifü'l-arz cihâtın asâleten uhdesine tevcîhini istid'â etmesine ve lede'l-imtihân ehliyet ve liyâkati nümâyân olmasına binâen cihât-ı ma'rûzanın bi'l-asâle mûmâ-ileyhin ve ondan inhilâl eden müezzinlik cihetinin dahi kezâlik bi'l-imtihân ehliyeti tebeyyün eden dergâh-ı mezkûr mürîdânından Halil İbrâhîm Efendi b. Şükrü'nün uhdelere tevcîhi tensîb edilmekle sûret-i ma'rûza rehîn-i tasvîb-i sâmi-i Cenâb-ı Meşîhat-penâhîleri buyurulduğu takdirde mu'âmele-i mukteziyye ifâ ve berât-ı âlîleri i'tâ olunması zımnında mazbata-i dâ'iyânemizin leffiyle Evkâf-ı Hümayûn Nezâret-i celîlesine tezkire-i aliyye şeref-tastîr buyurulması bâbında.

Remzî, Cevdet, Seyyid Mehmed es-Sükûtî, Vahyî, Mustafa, Ali, Tefîk
Yazılmıştır

IST_MFT_MSH_DFT02_01740_0001-0001-0047-48

Kocamustafapaşa'da Hâce Mihrişah Hatun Zaviyesi'ndeki caminin imam ve hatibi Yusuf Ziyaeddin Efendi'nin istifasıyla, yerine Sirozlu Hafız Mehmed Sâmî Efendi b. Abdullah'ın tayini.

24 Ca. sene [1]338 / 15 Şubat sene [1]336 / - / - / - / Sîret / - / 5 / Fî 25 Cumâdelûlâ sene [1]338 [15 Şubat 1920] / Fî 16 Şubat sene [1]336

Mazbata

Kocamustafapaşa civârında merhûme Hâce Mihrişah Hatun Zâviyesi derûnunda kâin câmi'-i şerîfin imâm ve hatibi Yusuf Ziyaeddin Efendi'nin fî 10 Ca. sene [1]338 târihinde vukû'-ı isti'fâsına mebnî inhilâl eden ciheteyn-i mezkûreteyn için müsâbaka imtihânı icrâ olunacağı lede'l-i'lân müddet-i mu'ayyene zarfında mürâca'at eden talebe-i ulûmdan Sirozlu Hâfız Mehmed Sâmî Efendi b. Abdullah'tan başka tâlib zuhûr etmeyip mûmâ-ileyhin üç yüz on tevellüdlü olduğu tezkire-i Osmâniyyesi'nden ve hüsn-i hâl ashâbından bulunduğunu zevât-ı ma'rûfe tarafından mu'tâ şehâdetnâmeden müstebân olmağla Tevcîh-i Cihât Nizâmnamesi ahkâmına tevfikân imtihânı bi'l-icrâ ehliyet ve liyâkati tebeyyün etmesine binâen ciheteyn-i mezkûreteynin mûmâ-ileyhin uhdesine tevcîh ve berât-ı âlîsi sâdır oluncaya değin vazîfe-i hitâbeti şimdiden ifâ için me'zûniyet i'tâ buyurulması tensîb edilmekle nezd-i sâmi-i Cenâb-ı Meşîhat-penâhîlerinde rehîn-i tasvîb-i âlî buyurulduğu takdirde mu'âmele-i mukteziyye icrâ ve berât-ı âlîsi i'tâ olunması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümayûn Nezâreti Vekâlet-i celîlesine iş'âr buyurulması bâbında.

Vahyî, Remzî, Cevdet, Seyyid Mehmed es-Sükûtî, Mustafa, Reis Efendi nâ-mizâc
[0048]

Kocamustafapaşa'da Hâce Mihrişah Hatun Zaviyesi'ndeki caminin imam ve hatibine tayin edilen Medresetü'l-kuzât ikinci sınıf talebesi Sirozlu Hafız Mehmed Sâmî Efendi b. Abdullah'ın hüsnühal şehadetnamesi.

Medresetü'l-kuzât ikinci sınıf talebesinden Sirozî Hâfız Mehmed Sâmî Efendi b. Abdullah ashâb-ı iffet ve nâmûstan olduğu gibi bir gûnâ cünha ve cinâyetle müttehem ve mahkûm olmadığının mübeyyin işbu varaka tarafımızdan tasdik olunur.

Fî 25 Cumâdelûlâ sene 1338

Fetvâhâne müsevvidlerinden Mayadağî-zâde Abdullah, Fetvâhâne müsevvidlerinden Alaşehirli Sâlih Zeki, Fetvâhâne müsevvidlerinden Sirozî Hâfız Abdurrahim

IST_MFT_MSH_DFT02_01740_0001-0001-0049

İstanbul'da Mehmed Paşa Camii civarında İskendergazi Mahallesi'nde Özbekî Dergâhı şeyhi Hoca Ubeydullah Ahrâr Hazretleri sülalesinden Buharalı Şeyh Abdülmecid Efendi'nin vefatı üzerine, meşihate oğlu Şeyh Abdurrahman Efendi'nin tayini.

9 Ca. sene [1]338 / Fî 31 Kânûn-ı sâni sene [1]336 / - / - / - / Sîret / - / 4 / Fî 11 Cumâdelülâ sene [1]338 [1 Şubat 1920] / Fî 2 Şubat sene [1]336

Mazbata

Evkâf-ı mülhakadan İstanbul'da Mehmed Paşa Câmi'-i şerifi civârında İskendergâzî Mahallesi'nde tarikat-i aliyye-i Nakşibendiyye'ye mahsûs Özbekî Dergâh-ı Şerîfinin meşihat cihetine bâ-berât-ı âlî mutasarrıf olan Buhârâ ulemâ ve eşrâfından ve Hoca Ubeydullah Ahrâr hazretlerinin sülâlesinden Şeyh Abdülmecid Efendi fî Kânûn-ı sâni sene [1]336 târihinde bir nefer kebîr oğlu Şeyh Abdurrahman Efendi'yi terk ederek irtihâl-i dâr-ı bekâ eylemesine mebnî inhilâl eden cihet-i mezkûrenin uhdesine tevcîhini istid'â eden mûmâ-ileyh Abdurrahman Efendi dersten me'zûn ve tarikat-i aliyye-i Nakşibendiyye'den müstahlef olup hilâfet icâzetnâmesi ol bâbdaki ta'limâtname ahkâmına tevfiқан ehliyeti Meclis-i Meşâyihce tahakkuk ederek ale'l-usûl musaddak olmasına ve hüsn-i sülûk ve sîreti ma'lûm ve müsellemler olduğu gibi civârında bulunan dört mahalle ahâlîsi tarafından dahi ayrı ayrı mahzarlar ile kendisinin hüsn-i hâline şehâdet ve meşihat-i mezkûreye ta'yini istid'â olunmasına binâen sâlifü'l-arz cihet-i meşihatın pederi mahlûlünden mûmâ-ileyh Şeyh Abdurrahman Efendi dâ'ileri uhdesine tevcîhi tensib edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'amele-i mukteziyye ifâ ve berât-ı âlî tastîr ve i'tâ olunması husûsunun bâ-tezkire-i aliyye Evkâf-ı Hümâyûn Nezâreti Vekâlet-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Vahyî, Ahmed Remzî, Cevdet, Mustafa, Ali, Tevfik

Yazılmıştır

IST_MFT_MSH_DFT02_01740_0001-0001-0050

Kocamustafapaşa'da Mihrişah Hatun Zaviyesi'ndeki caminin imam ve hatibi Mustafa Hulûsî Efendi'nin vefatı üzerine, yerine Nevrekoplu Hafız Yusuf Ziya Efendi b. Ahmed'in tayini.

13 R. sene [1]338 / 5 Kânûn-ı sâni sene [1]336 / - / - / - / Sîret / - / 3 / Fî 13 Rebî'ülâhîr sene [1]338 [5 Ocak 1920] / Fî 5 Kânûn-ı sâni sene [1]336

Mazbata

Kocamustafapaşa civârında kâin merhûme Mihrişah Hatun Zâviyesi derûnundaki câmi'-i şerîfin hitâbet ve imâmet cihetlerinin mutasarrıfı Mustafa Hulûsî Efendi'nin bilâ-veled-i zükûr vukû'-ı vefâtına mebnî inhilâl eden ciheteyn-i mezkûreteynin bi'l-müsâbaka ehil ve tâlibine tefvîz olunacağı nizâmı dâiresinde lede'l-i'lân Dârü'l-hilâfeti'l-aliyye Medresesinden me'zûn olduğu ibrâz

eylediği vesîkadan anlaşılan Nevrekoblu ve 1299 tevellüdlü Hâfız Yusuf Ziya Efendi mürâca'at ile ciheteyn-i mezkûreteyne münferiden tâlib olup başka tâlib zuhûr etmediğine ve kendisi medrese-i mezkûreden me'zûn olmasına nazaran tekrar imtihânına lüzûm görülmemekle yalnız Kur'ân-ı Kerîm tilâvet ettirilerek ilm-i kırâete vâkıf ve hüsn-i savt ve edâya mâlik olduğu anlaşılmaya binâen sâlifü'l-arz hitâbet ve imâmet cihetlerinin şehri yüz gurus vazîfe-i hâzıra-i mu'ayyenesiyle mûmâ-ileyh Hâfız Yusuf Ziya Efendi b. Ahmed'e tevcîhi ve berât-ı âlîsi sâdır oluncaya değin şimdiden vazîfe-i hitâbeti ifâya izn-i şer'î i'tâsı tensib edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve berât-ı âlî i'tâ olunması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâreti Vekâlet-i celîlesine iş'âr buyurulması bâbında.

Vahyî, Ahmed Remzî, Mustafa, Tevfik

Yazılmıştır

IST_MFT_MSH_DFT02_01740_0001-0001-0051

Üsküdar'da Ahmediye Camii'nde Rifâiyye tarikatı şeyhi Mehmed İzzet Râci Efendi'nin vefatı üzerine, yerine İhsan Efendi b. Abdullah'ın tayini.

13 R. sene [1]338 / 5 Kânûn-ı sâni sene [1]336 / - / - / - / Sîret / - / 2 / Fî 13 R. sene [1]338 [5 Ocak 1920] / Fî 5 Kânûn-ı sâni sene [1]336

Mazbata

Üsküdar'da Ahmediye Câmî-i şerîfi derûnunda tarikat-i aliyye-i Rifâ'iyye'den meşihat cihetinin mutasarrıfı Mahmud İzzet Râci Efendi'nin bilâ-veled mukaddemâ vukû'-ı vefâtına mebnî inhilâl eden cihet-i mezkûrenin uhdesine tevcîhi tarikat-i mezkûre hulefâsından İhsan Efendi tarafından bâ-arzuhâl istid'â ve cihet-i mezkûrenin mûmâ-ileyhe tevcîhi şart-ı vâkıf mücebince Üsküdar'da kâin Âsitâne-i Rifâ'î Postnişinliğinden inhâ olunmasına ve ehliyet ve kifâyeti ve salâh-ı hâlî ma'lûm bulunmasına binâen cihet-i ma'rûzanın vazîfe-i mu'ayyenesiyle mûmâ-ileyh İhsan Efendi b. Abdullah'a tevcîhi tensib edilmekle karîn-i tasvîb-i sâmi-i Cenâb-ı Meşihat-penâhîleri buyurulduğu takdîrde icrâ-yı icâbı husûsunun bâ-tezkire-i aliyye Evkâf-ı Hümâyûn Nezâreti Vekâlet-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Vahyî, Ahmed Remzî, Mustafa, Tevfik

Yazılmıştır

IST_MFT_MSH_DFT02_01740_0001-0001-0052-56

Sultan Selim Camii civarında Cebecibaşı Mahallesi'nde, Yanyalı Şeyh Mustafa İsmet Efendi Dergâhı postnişini Mustafa Hâki Efendi'nin azliyle, yerine Şeyh Ali Haydar Efendi b. Mehmed Şerif'in tayini.

4 R. sene [1]338 / 27 Kânûn-ı evvel sene [1]335 / - / - / - / - / - / 1 / Fî 11 Rebî'ülâhir sene [1]338 [3 Ocak 1920] / Fî 3 Kânûn-ı sâni sene [1]336

Mazbata

İstanbul'da cennet-mekân Sultân Selim Hân Câmî-i şerîfi civârında Cebecibaşı Mahallesi'nde kâin tarikat-i aliyye-i Nakşibendiyye-i Hâlidîyye'den Yanyalı merhûm Şeyh Mustafa İsmet

Efendi Dergâh-ı şerîfi postnişinlik cihetinin uhdesinden ref'i ve Şeyh Mustafa Hakî Efendi uhdesine tevcihi hakkındaki Şûrâ-yı Evkâfın kararı muvâfık-ı şer' ve kânûn olmadığından bahisle Ahmed Nimetullah ve vâkıfın oğlu olup bi'l-imtihân isbât-ı ehliyyet ettiğinden cihetin kendisine âidiyeti iddi'âsıyla İsmet Efendizâde Sıddık efendiler tarafından vukû' bulan müsted'âyât üzerine husûs-ı mezkûra dâir Evkâf-ı Hümâyûn Nezâret-i celîlesiyle bi'd-defe'ât cereyân eden muhâberâtı şâmil evrâkın takımıyla irsâliyle meâllerine ve müsted'âyât-ı vâkı'aya nazaran Meclis-i Meşâyihce vâkı' olacak mütâla'anın iş'arı hakkında Şûrâ-yı Devlet Riyâset-i celîlesinden vârid olup havâle buyurulan 6 Teşrîn-i evvel sene [1]334 târihli ve husûsî dört numaralı tezkireye binâen Meclis-i dâ'iyânemizden tanzim ve takdîm olunup evrâkıyla beraber şûrâ-yı müşârun-ileyhâya irsâl buyurulan 28 Teşrîn-i evvel sene [1]334 târihli ve kırk sekiz numaralı mufassal ve müdellel mütâla'a-nâmede cihet-i mezkûrenin Ahmed Nimetullah Efendi'ye tevcihinde ber-mûceb-i şart-ı vâkıf mürîdânın intihâbı resmen tahakkuk etmediği ve bi'l-âhare Mustafa Hakî Efendi'ye tevcihte dahi mürîdânın intihâbnâmesi bulunmamakla beraber vâkıfın kendi hulefâsı ve Meclis-i Meşâyih'te isbât-ı iktidâr eden [0053] mahdûmu mevcûd olmağla şûrût-ı vakfiyyeye ve ahkâm-ı nizâmiyyeye muhâlif idiği cihetle evvelen ve sâniyen vukû' bulan tevcih mu'amelelerinin keen lem yekûn addiyle şûrût-ı vakfiyyeye ve ahkâm-ı nizâmiyyeye tatbîkan ve müceddeden meşîhat-i mezkûrenin müstahık olan zâta tevcihi mütâla'ası arz ve beyân olunmuş idi.

Mütâla'a-i ma'rûza Şûrâ-yı Devletce muvâfık-ı usûl ve nizâm görölerek cihet-i mezkûrenin Nimetullah Efendi'den ref'iyle Mustafa Hakî Efendi'ye tefvizi hakkında Şûrâ-yı Evkâfca müttehaz karar fesh olunarak ahkâm-ı vakıfnâme ile usûl ve nizâmına tevfiikan ıslâh-ı mu'amele olunmak üzere işin el-yevm merci'-i tedkiki olan Meclis-i Meşâyihce tevdî'i bâ-mazbata ifâde ve evrâk-ı mevcûde i'ade edilmiş olduğu muhavvel 7 Nisan sene [1]335 târihli ve 21 husûsî numaralı tezkire-i sâmiye ile tebliğ buyurulmuş olmasına binâen keyfiyyet yeniden mevkî'-i tedkike vaz' olunduğu sırada Hoca Ali Haydar Efendi tarafından takdîm olunup havâle buyurulan arzuhalde kendisinin vâkıf İsmet Efendi silsile-i tarikatinden müstahlef ve cihet-i meşîhate ehil olduğundan ve şart-ı vâkıf mûcebince silsile-i mezkûre hulefâ ve mürîdânı tarafından müntahab olduğundan cihetin uhdesine tevcihi istid'â olunmağla vâkıf kendinden sonra hulefâsına şart etmiş olduğu vakfiyesinde musarrah olan cihet-i mezkûrenin [0054] vâkıfın bizzât halîfesi mevcûd iken hulefâ-i hulefâsına tefvîz olunup olunamayacağı Meclis-i dâ'iyânemizce bâ-müzekkire Fetvâhâne-i âliden istifsâr olunacağı gibi makâm-ı sâmi-i Fetvâ-penâhîlerinden dahi evrâkın kâffesi Fetvâhâne-i âliye havâle buyurulması üzerine iki kıt'a derkenârla sâdır olan muktezâyı şer'ide (Örf-i câriye nazaran vâkıf-ı mûmâ-ileyhe mensûb bizzât halîfeler mevcûde iken halîfelerinin halîfelerinden birinin dahi mezkûr cihetin meşîhatini iddi'aya salâhiyeti vardır) ve (vâkıf İsmet Efendi Dergâhının meşîhatine ber-mûceb-i şart-ı vâkıf mûmâ-ileyhe mensûb olan mürîdân ile hulefâdan ekserîsi bizzât halîfeleri ile halîfelerinin halîfelerinden her hangisi tezvîrden sâlim olmak şartıyla intihâb ederlerse o kimsenin cihet-i meşîhate müstahık olur) deyu cevâb verilmiş olduğundan mûcebince intihâb icrâ olunacağı Takvîm-i Vekâyî' ve evrâk-ı sâire-i havâdisle i'lân olunup yevm-i mu'ayyeninde gelen müntehiblerin intihâbnâmeleri alınarak zâtları dahi yekdiğerine şehâdetleri ile ta'ayyün ettikten sonra ferden ferdâ ifâdeleri istimâ' olunmak sûretiyle icrâ kılınan intihâb ber-vech-i âtî netice-pezîr olmuştur.

Tâliblerden Nimetullah Efendi gerçi Fetvâhâne-i Âlî'den sâlifü'l-arz muktezânın sudûrundan evvel bir kıt'a intihâbnâme getirmiş ise de müntehibleri İsmet Efendi silsile-i tarikatine mensûb

olmadıkları gibi ahîran intihâba iştirâk etmediğinden ve Sıddık Efendi tarafından ancak üç müntehib gelerek ekalliyette [0055] kaldığından ve Mustafa Hakî Efendi gerçi intihâbnâme getirmiş ve bir hayli müntahibleri gelmiş ise de müntahiblerin kâffesi kendi mürîdânı olup kendisinin İsmet Efendi silsilesinden ikmâl-i seyr u sülûk etmemiş olmasına ve gerçi o silsileden dahi iki sene evvel bir icâzetnâme almış ise de o icâzetnâmenin sırf bir teberrük icâzetnâmesi olarak i'tâ olunduğu müciz Şeyh Zühüdî Efendi tarafından ifâde ve beyân edilmesine ve kendisinin mezkûr icâzetnâmeyi sonradan istihsâl etmesi şart-ı vâkıf vechile cihet-i meşîhatin uhdesine tevcîhine medâr olamamasına binâen mûmâ-ileyhim sâkıt olup ancak münferid kalan müsted'î-i mûmâ-ileyh Ali Haydar Efendi için gelen intihâbnâme ve müntahiblerin adedi yüzü mütecâviz olduğu gibi cümlesi vâkıf-ı mûmâ-ileyhin silsile-i tarîkatî hulefâ ve mürîdânından olduğundan şart-ı vâkıfa ve Fetvâhâne-i Âlî'den sâdır olan muktezâ-yı şer'îye tamamen muvâfık ve kendisi ulemâdan ve vâkıfın halîfesinin halîfesinin halîfesi olmak i'tibârıyla cihet-i mezkûreye ehil ve müstahık olacağı ve bi'l-intihâb meşrûtün-leh bulunması hasebiyle me'mûriyeti dahi uhdesine cihet-i tevcîhine mâni' olamayacağına binâen şûrâ-yı müşârun-ileyhâ kararı vechile münhal addolunan sâlifü'l-arz İsmet Efendi Dergâhı meşîhat cihetinin şart-ı vâkıfa ve muktezâ-yı şer'îye tevfiikan müsted'î-i mûmâ-ileyh Şeyh Ali Haydar Efendi b. Mehmed Şerîf uhdesine tevcîhi ekseriyyet-i ârâ ile tensib edilmekle sûret-i ma'rûza rehîn-i tasvîb-i sâmi-i [0056] Cenâb-ı Meşîhat-penâhîleri buyurulduğu takdîrde mu'âmele-i mukteziyye ifâ ve icâb eden berât-ı âlî i'tâ olunması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâreti Vekâlet-i celîlesine iş'âr buyurulması bâbında.

Vahyî, Ahmed Remzî, Mustafa, Ali, Mehmed Gülşen, Tefvik

İnde'l-lüzûm mufassalan arz olunmak üzere hakîkate muvâfık olan kanâ'atim sebebiyle muvâfakatten ma'zûrum.

Seyyid Mehmed es-Sükûtî

Yazılmıştır

IST_MFT_MSH_DFT02_01740_0001-0001-0057

Fatih yangınında yanan Küçükmustafapaşa'da Karasarıklı Dergâhı'nın şeyhi Şevket Efendi'nin, İzmit'te Şerîf Efendi Dergâhı meşîhatine tayini.

5 R. sene [1]338 / 28 Kânûn-ı evvel sene [1]335 / - / - / - / Sîret / - / 35 / 6 R. sene-i minhü [29 Aralık 1919] / 29 sene-i minhü

Mazbata

İzmit sancağının nefsi İzmit kasabasında kâin tarîkat-i aliyye-i Rifâ'iyye'den Şerîf Efendi Dergâh-ı şerîfî meşîhat cihetinin bir müddetten beri münhal olup mahallince ehil bir tâlib zuhûr etmediğinden vazîfesi mu'attal kaldığı livâ-i mezkûr encümen-i meşâyihinden iş'âr olunması üzerine Meclis-i dâ'iyânemiz ifâdesiyle cereyân eden muhâberât neticesinde mezkûr dergâhın Kuyûd-ı Vakfiyye İdâresince kaydı olmadığı ve ancak Hazîne-i Mâliyeden müdevver tahsisât-ı hayriyye miyânında şehîr doksan yedi guruh ma'âşı bulunduğu Evkâf-ı Hümâyûn Nezâret-i celîlesinin tezkire-i cevâbiyesinden anlaşılmış ve Der'aliyye'de Küçükmustafapaşa civârında Karasarıklı Dergâhı şeyhi Şevket Efendi uhdesinde bulunan dergâhın Fâtih harîk-i kebîrinde muhterik olduğundan mensûb olduğu tarîkten bulunan İzmit'teki münhal dergâh-ı

mezkûr meşihatının uhdesine tevcihini muhavvel arzuhâl ile istid'â ve tevcih buyurulduğu takdîrde uhdesindeki cihet-i meşihatten fâriğ olacağını şifâhen ifâde etmiş ve kendisi tarikat-i aliyye-i Rifâ'iyye meşâyihinden ve hüsn-i sülûk ashâbından bulunmuş olmağla uhdesinde bulunan cihet-i meşihatın nez'î ile sâlifü'l-arz İzmir'te kâin Şerif Efendi Dergâh-ı şerîfi meşihatının Mâliye'den müdevver ta'âmiyye ile meşihat cihetinin usûl ve emsâline tevfiikan Kuyûd-ı Vakfiyye Kalemine müceddeden kayd ile mûmâ-ileyh uhdesine tevcihi tensib edilmekle rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde icrâ-yı îcâbı husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve mazbata-i dâ'iyânemizin leffen tesyâr buyurulması bâbında.

Vahyî, Mustafa, Ali, Mehmed Gülşen, Tevfik

IST_MFT_MSH_DFT02_01740_0001-0001-0058-59

Sultan Selim Camii civarında Koğacıdede Mahallesi'nde Refet Efendi Dergâhı diğer ismiyle Sebzebane kâtibi Mahmud Efendi Mescidi imamı Hafız Muharrem Efendi b. Mehmed'in hizmetini terk etmesiyle; imamlığa, müezzin Şeyh Mehmed Tevfik Efendi b. Şeyh Hayri Efendi'nin asaleten, onun yerine de Hasan Hüsnü Efendi b. Mehmed'in tayini.

4 Rebî'ülâhîr sene [1]338 / 27 Kânûn-ı evvel sene [1]335 / - / - / - / Sîret / - / 34 / Fî 6 R. sene [1]338 [29 Aralık 1919] / Fî 29 Kânûn-ı evvel sene [1]335

Mazbata

İstanbul'da cennet-mekân Sultân Selim Hân hazretleri câmi'-i şerîfi civârında Koğacıdede Mahallesi'nde kâin tarikat-i aliyye-i Halvetiyye-i Şa'bâniyye'den Refet Efendi Dergâhı nâm-ı diğer Sebzebane kâtibi merhûm Mahmud Efendi Mescid-i şerîfi imâmı Hâfız Muharrem Efendi'nin yedi ay mukaddem bilâ-me'zûniyet Akhisar'a azîmetle orada bir karyenin imâmetini der'uhde etmiş olduğundan ve mûmâ-ileyhin gaybûbetinden beri hizmetini vekâleten ifâ etmekte bulunduğundan bahisle mezkûr imâmet cihetinin kendisine ve uhdesinde bulunan mescid-i şerîf-i mezkûr müezzinlik ciheti vekâletinden fâriğ olduğundan onun dahi ehil ve münâsibine asâleten tevcihi dergâh-ı mezkûr postnişini Şeyh Mehmed Tevfik Efendi tarafından bâ-arzuhâl vukû' bulan taleb üzerine Meclis-i dâ'iyânemiz ifâdesiyle sebk eden iş'âr-ı âlîye cevâben Evkâf-ı Hümâyûn Nezâret-i celîlesinin 3 Kânûn-ı evvel sene [1]335 târîhli ve 167 husûsî numaralı tezkiresiyle vârid olan der'uhde kayıtları sûretine nazaran Mahmud Efendi Vakfından şehri yüz guruş vazîfe-i hâzıra ile mescid-i mezkûr imâmeti 10 Rebî'ülevvel sene [1]326 târihinde Hâfız Muharrem Efendi b. Mehmed'e müveccih ve müezzinlik vazîfesi dahi hasbe'l-vekâle mûmâ-ileyh Mehmed Tevfik Efendi'ye tesviye ve i'tâ edilmekte olduğu müstebân olmuş ve mûmâ-ileyh Muharrem Efendi'nin ber-vech-i ma'rûz terk-i hizmet eylediği tahkîkât-ı vâkı'adan ve mahallesi hey'et-i ihtiyâriyyesi tarafından mu'tâ ilmühaber mûndericâtından anlaşılmış olmağla meclis nizâmnamesiyle ol bâbdaki ta'lîmâtname ahkâmınca mûmâ-ileyh Muharrem Efendi müsta'fî ve uhdesinde bulunan imâmet ciheti münhal addedilmiştir.

Îcâbı lede'l-müzâkere sâlifü'l-arz imâmet ve müezzinlik cihetlerinin vazîfeleri kalîl olduğundan bu gibi vezâifi kalîl olan cihâta ehliyetli tâlib zuhûr etmemekte olduğu emsâl-i adîdesiyle sübût bulduğundan müsâbaka i'lânına lüzûm olmayıp imâmet cihetinin vekâletinde bulunan ve ehliyet ve liyâkati müsellemler olan mesbûku'l-imtîhân müsted'î-i mûmâ-ileyh Şeyh Mehmed Tevfik

Efendi b. Şeyh Hayri Efendi'ye ve mûmâ-ileyhin ferâğından inhilâl eden mezkûr müezzinlik cihetinin tâlibi olup bi'l-imtihan [0059] kifâyeti nümâyân olan Hasan Hüsnü Efendi b. Mehmed uhdelerine asâleten tevcihi tensib edilmekle sûret-i ma'rûza rehîn-i tasvib-i âlî-i Cenâb-ı Meşihat-penâhileri buyurulduğu takdîrde mu'âmele-i mukteziyyeleri ifâ ve berât-ı âlileri i'tâ olunması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Ahmed Remzî, Mustafa Hakî, Mustafa, Ali, Mehmed Gülşen, Tevfik

Yazılmıştır

IST_MFT_MSH_DFT02_01740_0001-0001-0060-61

Eyüp'te Mihrişah Vâlide Sultan Türbesi hatm-i hâce ciheti görevlisi Rıza Efendi'nin vefatıyla, yerine Şeyh Hafız Mehmed Hâşim Efendi b. Ahmed ve vefat eden Âşirhan Mehmed Efendi'nin yerine de Hafız Abdülbâkî Efendi b. Hafız Halîm Efendi'nin tayini.

20 Ra. sene [1]338 / 13 Kânûn-ı evvel sene [1]335 / - / - / - / Sîret / - / 33 / Fî 20 Rebî'ülevvel sene [1]338 [13 Aralık 1919] / Fî 13 Kânûn-ı evvel sene [1]335

Mazbata

Hazret-i Ebâ Eyyûb el-Ensârî -radiye anhü'l-Bârî- civâr-ı rahmet-medârında kâin firdevs-âşiyân Vâlide Mihrişah Sultân Türbe-i şerîfesinde beher hafta Pazar ve Perşembe günleri ba'de edâ-yı salâti'l-asr kırâet ve icrâsı meşrût olan hatm-i hâcegân ve zikir ve tevhîd-i Yezdân cihâtı ashâbından Rıza ve hatm-i şerîfin bidâyet ve nihâyetinde kârî-i aşr-i şerîf ciheti sâhibi Mehmed Efendilerin vukû'-ı vefâtlarıyla inhilâl eden ciheteyn-i mezkûreteynden hatm-i hâce cihetinin Şah Sultân Dergâh-ı şerîfi mensûbîn-i kadîmesinden Şeyh Hâfız Mehmed Hâşim ve aşr-i şerîf cihetinin Şeyh Murad Dergâh-ı şerîfi dervîşânından Hâfız Abdülbâkî efendilere tevcihi mezkûr iki dergâh-ı şerîf postnişinleri tarafından bâ-takrîr inhâ olunması üzerine mezkûr cihetler der'uhde kayıdları Meclis-i dâ'iyânemiz ifâdesiyle Evkâf-ı Hümâyûn Nezâreti Vekâlet-i aliyyesinden isti'lâm buyurulmuş idi.

9 Teşrîn-i sâni sene [1]335 târihli vârid olan tezkire-i cevâbiyyede türbe-i müşârun-ileyhâda aşırhân ciheti Mehmed Efendi'ye müvecceh ise de Rıza Efendi'ye müvecceh hatm-i hâcegân cihetine dâir kayıd bulunmadığı iş'âr olunmuş ve lede'l-istifsâr İstanbul Evkâf Müdiriyyeti'nin müzekkire-i cevâbiyyesinde türbe-i müşârun-ileyhâda hatm-i hâcegân vezâifi miyânında Rıza Efendi nâmına vazîfe muhassas olup mûmâ-ileyhin vukû'-ı vefâtına binâen 1 Mart sene [1]334 târihinden beri el-yevm mevkûf bulunduğu inbâ kılınmış ve müteveffâ-yı mûmâ-ileyhin takrîben yirmi seneden beri ifâ-yı vazîfe ettiği sâlifü'z-zikr Şeyh Murad Dergâhı postnişini ve türbe-i müşârun-ileyhâda hatm-i hâcegân şeyhi efendinin cümle-i iş'arından ve Aşırhân Yarımcı Mehmed Efendi'nin İzmit'te vefât ettiği 8 Teşrîn-i evvel sene [1]335 târihli musaddak şehâdetnâmeden anlaşılmıştır.

İcâbı lede'l-müzâkere merhûme-i müşârun-ileyhâ türbe-i şerîfesindeki cihât-ı mezbûrenin inhilâl edenleri civâr-ı Hazret-i Hâlid'de kâin ma'lûmül-esâmî dört dergâh-ı şerîfin dervîşânından ehline tevfiז olunması vakfiye-i ma'mûlün-bihâsı ahkâmından olup müteveffâ-yı mûmâ-ileyh Rıza Efendi uhdesinden münhal olan hatm-i hâcegân cihetinin bi'l-imtihan ehliyeti tebeyyün eden mûmâ-ileyh Şeyh Mehmed Hâşim Efendi b. Ahmed ve müteveffâ Mehmed Efendi'den inhilâl

eden sâlifü'l-arz [0061] aşr-i şerîf-hân cihetinin dahi kezâlik bi'l-imtihân ehliyeti nümâyân olan Hâfız Abdülbâki Efendi b. Hâfız Halîm Efendi uhdeslerine vazîfe-i mu'ayyeneleri ile tevcih buyurulması tensib edilmekle sûret-i ma'rûza nezd-i sâmî-i Cenâb-ı Meşihat-penâhilerinde karîn-i tasvib-i âlî buyurulduğu takdîrde mu'amele-i mukteziyyeleri icrâ ve berât-ı âlîleri i'tâ olunması hakkında mazbata-i dâ'iyânemizin leffiyile nezâret-i müşârun-ileyhâya tezkire-i aliyye tastîr buyurulması bâbında.

Vahyî, Mustafa Hakî, Ahmed Remzî, Seyyid Mehmed es-Sükûtî, Mustafa, Tevfik

Yazılmıştır

IST_MFT_MSH_DFT02_01740_0001-0001-0062-63

Beylerbeyi'nde Abdullağa Mahallesi Tekke Meydanı'nda, Mehmed Efendi Camii imam ve hatibi Seyyid Hacı Hüseyin Kâzım Efendi b. Mehmed Efendi'nin ihdas edeceği meşihat cihetine ait vakfiyesinin tescili ve kendisinin de meşihate tayini.

17 Ra. sene [1]338 / 10 Kânûn-ı evvel sene [1]335 / - / 447 / Sîret / - / 32 / Fî 20 Rebî'ülevvel sene [1]338 [13 Aralık 1919] / Fî 13 Kânûn-ı evvel sene [1]335

Mazbata

Üsküdar'a tâbi' Beylerbeyi'nde Abdullağa Mahallesi'nde Tekke Meydanı nâm mahalde kâin mevâlî-i i'zâmdan merhûm Mehmed Emin Efendi nâm sâhib-i hayrın binâ ve ihyâ-kerdesi olan câmi'-i şerîfine müceddeden vaz' edeceği meşihat cihetinin uhdesine tevcihi istid'âsına dâir câmi'-i şerîf mezkûr hatîb ve imâmı Hüseyin Kâzım Efendi tarafından evvelce takdîm olup havâle buyurulan istid'ânâme üzerine evvel emirde lâzımgelen vakfiyenin tanzîmi zımnında keyfiyyetin Evkâf-ı Hümâyûn Mahkemesine iş'âr buyurulması arz olunmuş idi.

Mahkeme-i mezkûrenin fî gurre-i Rebî'ülevvel sene [1]338 ve fî 24 Teşrîn-i sâni sene [1]335 târihli ve 2333 dosya numaralı müzekkiresine merbûtan vârid olan 2 Safer sene 1338 târihli vakfiyede müsted'î-i mûmâ-ileyh câmi'-i şerîf-i mezkûrda beher hafta salât-ı Cuma'nın edâsını müt'eâkıb tarikat-i aliyye-i Kâdiriyye usûlü vechile zikrullâh edilmek üzere müceddeden vaz' edeceği meşihat cihetiyle şûrût-ı sâire-i vakfiyye için atyeb-i mâlından on bin gurus râyic akçesini vakf-ı sahih-i şer'î ile vakf ve meşihat ve tevliyet cihetlerini kendisine şart eylediği musarrah bulunmuştur.

Îcâbı lede'l-müzâkere müsted'î-i mûmâ-ileyh tarikat-i aliyye-i Kâdiriyye hulefâsından ve dâimâ mevâ'iz-i dîniyye ifâsıyla meşgûl ulemâ ve sulehâ-yı ümmetten bulunduğu Meclis-i dâ'iyânemizce ma'lûm olmasına ve böyle bir emr-i hayra muvaffakiyeti şâyân-ı takdîr olmağla beraber cihetin meşrûtün-lehi ve mesbûkü'l-imtihân bulunmasına [0063] binâen vâkıf-ı mûmâ-ileyh es-Seyyid el-Hâc Hüseyin Kâzım Efendi b. Mehmed Efendi uhdesine tevcihi tensib edilmekle sûret-i ma'rûza rehîn-i tasvib-i sâmî-i Cenâb-ı Meşihat-penâhileri buyurulduğu takdîrde mu'amele-i mukteziyye ifâ ve hasbe'l-meşrûtiyye tevliyetin dahi nezâretce mûmâ-ileyhe tevcihiyle lâzım gelen berât-ı âlîsi tastîr ve i'tâ olunması husûsunun Evkâf-ı Hümâyûn Nezâreti Vekâlet-i aliyyesine iş'âr ve matviyyen takdîm kılınan vakfiye-i ma'rûzanın Kuyûd-ı Vakfiyye İdâresi'ne mücedded kaydı ile i'âdesi zımnında mazbata-i dâ'iyânemizle ma'an ba's ve tesyâr buyurulması tezekkür kılındı ol bâbda.

Vahyî, Ahmed Remzî, Mustafa Hakî, Seyyid Mehmed es-Sükûtî, Mustafa, Ali, Tevfik

Yazılmıştır

IST_MFT_MSH_DFT02_01740_0001-0001-0064-65

Yedikule'de Hacı Evhadüddin Dergâhı imamet, hitabet, kayyımlik ve diğer vazifelerin mutasarrıfı Hafız Ali Efendi'nin vefatı üzerine cihetlerin, Hafız Mehmed Fahri Efendi niyâbetinde müteveffanın çocukları Ahmed Safi ve Nasûhî efendilere tevcihi.

16 Za. sene [1]337 / 13 Ağustos sene [1]335 / - / - / - / Sîret / - / 31 / 19 minhü [13 Ağustos 1919] / 16 minhü

Mazbata

İstanbul'da Yedikule civârında kâin merhûm Hacı Evhadüddin Dergâh-ı şerîfi imâmet ve hitâbet ve kayyımlik gibi cihât-ı sâirenin bâ-berât-ı âlî mutasarrıfı Hâfız Ali Efendi'nin iki nefer sagîr mahdûmları Ahmed Safi ve Nasuhi efendileri terk ile vukû'-ı vefâtına mebnî inhilâl eden cihâtın sagîrân-ı mezbûrânın sinn-i rüşde vâsıl olup isbât-ı ehliyyet etmelerine değin müteveffâ-yı mûmâ-ileyh ile hukûk-ı kadîmesine binâen taraflarından bi'n-niyâbe ve vazîfesi tamamen mûmâ-ileyhimâya âid olmak üzere fahrî olarak ifâ-yı hizmet edeceğinden bahisle cihât-ı mezkûrenin bi'n-niyâbe uhdesine tevcihi Hâfız Mehmed Fahri Efendi tarafından istid'â olunması üzerine der'uhde ve şerâit-i tevcihiye kayıdlarının inbâsı hakkında Meclis-i dâ'iyânemiz ifâdesiyle sebk eden iş'âr-ı âliye cevâben vârid olup havâle buyurulan Evkâf-ı Hümâyûn Nezâret-i celîlesinin merbût 29 Şevvâl sene [1]337 ve 28 Temmuz sene [1]335 târihli ve 1288 umûmî 95 husûsî numaralı tezkiresi ve melfûfâtı kırâet olundu.

Melfûfât-ı mezkûre miyânında mevcûd Kuyûd-ı Vakfiyye İdâresi'nin 22 Haziran sene [1]335 târihli ve 2566 numaralı derkenârında dergâh-ı mezkûr câmi'-i şerîfi imâmet ve hitâbet ve imâmete meşrûta cüzhân ve kayyım ve sirâcî-i câmi' ve minâre vazîfesi dahi birlikte ifâ olunmak üzere diğer kayyım ve devirhân cihetleri müteveffâ-yı mûmâ-ileyh Hâfız Ali Efendi'nin uhdesinde bulunduğu ve vakfiyesi mukayyed olmadığından şürût-ı vâkıfa dâir ma'lûmât-ı kaydiyye mevcûd olmadığı beyân edilmiş ve imâmetin yüz ve hitâbetin yetmiş beş ve iki kayyımlıktan birinin yetmiş ve diğerinin elli ve iki devirhânlığın onar gurus vezâif-i hâzıra-i şehriyyesi bulunduğu İstanbul Evkâf Müdüriyyeti'nin 24 Temmuz sene [1]335 târihli ve 6065 numaralı derkenârından ve müteveffâ-yı mûmâ-ileyh Ali Efendi'nin fi'l-hakîka Ahmed Safi ve Nasûhî nâmında iki nefer sagîr mahdûmunu terk ettiği ve mezbûrân el-yevm ber-hayât bulundukları mahallesi hey'et-i ihtiyâriyyesinden mu'tâ ilmühaberden anlaşılmıştır.

İcâbı lede'l-müzâkere sagîrân-ı merkûmân sinn-i rüşde vâsıl olarak cihât-ı mezkûre [0065] hidemâtını bizzât ifâya kesb-i iktidâr edinceye kadar hidemât-ı mezkûrenin bi'n-niyâbe ifâ ettirilmesi Tevcih-i Cihât Nizâm-nâmesi ahkâmından bulunmasına ve vezâifi sagîrân-ı merkûmâna âid olmak üzere fahrî olarak niyâbete tâlib olan ve el-yevm vekâleten hidemât-ı mezkûreyi hüsn-i ifâ etmekte bulunan Hâfız Mehmed Fahri Efendi usûl ve nizâmına tevfikân lede'l-imtihân ehliyyet ve liyâkati nümâyân olmasına binâen cihât-ı münhalle-i mezkûreden imâmet ve elli gurus vazîfeli kayyımlik ve bir devirhânlik cihetlerinin mûmâ-ileyh niyâbetiyle sagîr-i mezbûr Ahmed Safi ve hitâbet ile sâlifü'z-zikr sirâc-ı câmi' ve minâre vazîfesi dahi birlikte ifâ olunmak üzere yetmiş gurus vazîfeli diğer kayyımlik ve bir devirhânlik cihetlerinin kezâlik mûmâ-ileyh niyâbetiyle sagîr-i merkûm Nasûhî uhdelarına tevcihi tensîb edilmiş olmağla sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve icâb eden berât-ı âlileri tastîr ve i'tâ olunması husûsunun işbu mazbata-i dâ'iyânemizin leffîyle nezâret-i müşârun-ileyhâya cevâben iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST_MFT_MSH_DFT02_01740_0001-0001-0066

Kocamustafapaşa'da Hâce Kadın diğer adıyla Mihrişah Hatun Zaviyesi ve Camii'nin müezzini ve kayyımı Sadeddin Efendi'nin vefatıyla, cihetin Mehmed Ali Efendi b. Osman Nûri'nin niyâbetinde müteveffanın çocukları Receb ve Hayreddin efendilere tevcihi.

6 Ra. sene [1]338 / 29 Teşrîn-i sâni sene [1]335 / - / - / 413 / Sîret / - / 30 / Fî 8 Rebî'ülevvel sene [1]338 [1 Aralık 1919] / Fî 1 Kânûn-ı evvel sene [1]335

Mazbata

Kocamustafapaşa'da Hâce Kadın nâm-ı diğer Mihrişah Hatun Zâviye ve Câmî'-i şerîfinin müteveffâ Şeyh Sadeddin Efendi'den inhilâl eden müezzinlik ve kayyımlık cihetlerinin bi'n-niyâbe uhdesine tevcihi istid'âsına dâir Mehmed Ali imzâ ve mührüyle takdîm olunup havâle buyurulan istid'ânâme üzerine cereyân eden mu'âmele neticesinde Evkâf-ı Hümâyûn Nezâret-i aliyyesinden vârid olan kayıt sûret-i musaddakalarına nazaran ciheteyn-i mezbûreteynin müteveffâ-yı mûmâ-ileyhin uhdesinde olduğu ve iki cihet için yüz guruş vazîfe muhassas bulunduğu müstebân olmuş ve müteveffâ-yı mûmâ-ileyhin Receb ve Hayrullah [Hayreddin] nâmında iki nefer sagîr mahdûmu olduğundan ve müsted'inin ahâlî-i mahalliyenin intihâbıyla vekâleten ifâ-yı vazîfe ettirilmekte ve kendisi askerlikten murahhas bulunduğu tahkîkât-ı vâkî'adan anlaşılmıştır.

İcâbı lede'l-müzâkere bu misilli evlâd-ı sığarını terk ile vefât eden ashâb-ı cihâtın uhdelерinden inhilâl eden cihetlerin bi'n-niyâbe ehil ve münâsibine tevcihi nizâmname-i mahsûs ahkâmından olmasına ve müsted'i-i mûmâ-ileyhin ciheteyn-i mezkûreteyn için ehliyeti bi'l-imtihan tebeyyün etmesine binâen sagîrân-ı merkûmânın sinni hadd-i nizâmîye vâsıl olup da bi'l-fi'il edâ ve ifâya kesb-i liyâkat etmelerine değin taraflarından bi'n-niyâbe mûmâ-ileyh Mehmed Emin [Ali] Efendi b. Osman Nûri tarafından ifâ-yı vazîfe olunmak üzere sâlifü'l-arz cihetlerden müezzinliğin sagîr-i merkûm Receb ve kayyımlığın Hayreddin efendiler uhdelерine tevcihi tensib edilmekle sûret-i ma' rûza rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyye ifâ ve berât-ı âlî i'tâ olunması husûsunun mazbata-i dâ'iyânemizin lef'iyle bâ-müzekkire-i aliyye nezâret-i müşârun-ileyhâya iş'âr buyurulması bâbında.

Ahmed Remzî, Vahyî, Seyyid Mehmed es-Sükûtî, Mustafa, Mehmed Gülşen, Tevfik

Yazılmıştır

IST_MFT_MSH_DFT02_01740_0001-0001-0067

Kocamustafapaşa Ağaçekan'da Feyziye diğer adıyla Küçük Reşid Efendi Dergâhı Camii müezzini Hafız Ahmed Sâlih Efendi'nin Büyükada'da Hamidiye Camii müezzinliğine tayiniyle, yerine Ali Efendi b. Mustafa'nın asaleten tevcihi.

6 Ra. sene [1]338 / 29 Teşrîn-i sâni sene [1]335 / - / - / - / Sîret / - / 29 / Fî 8 Rebî'ülevvel sene [1]338 [1 Aralık 1919] / Fî 1 Kânûn-ı evvel sene [1]335

Kocamustafapaşa civârında Feyziye nâm-ı diğer Küçük Reşid Efendi Dergâhı Câmî'-i şerîfinin münhal müezzinlik cihetinin uhdesine tevcihi dergâh-ı mezkûr sâkinlerinden Ali Efendi tarafından bâ-arzuhâl talep edilmesine binâen cihet-i mezkûrenin der'uhde ve vazîfesi mikdârı kayıdları Meclis-i dâ'iyânemiz ifâdesiyle Evkâf-ı Hümâyûn Nezâret-i aliyyesinden isti'lâm

buyurulmuş idi. Cevâben vârid olup havâle buyurulan 16 Teşrîn-i evvel sene [1]335 târihli ve 141 husûsî numaralı tezkireye melfûf Kuyûd-ı Vakfiyye ve İstanbul Evkâf idârelerinden muhrec kayıd sûretlerinden evkâf-ı mazbûtadan cennet-mekân Sultân Mahmud Hân-ı sâni hazretleri evkâf-ı şerîfesinden almak üzere şehri yüz elli gurus vazîfe ile Kocamustafapaşa civârında Ağaçekan nâm mahalde Feyziye Zâviyesinde müezzinlik ciheti 16 Cemâziyelâhir sene [1]329 târihiyle uhdesine tevcih olunan Hâfız Ahmed Sâlih Efendi'nin 3 Eylûl sene [1]335 târihinde Büyükkada'da Hamidiye Câmi'-i şerîfi müezzinliğine ta'yîn kılınmasına mebnî uhdesinde bulunan dergâh-ı mezkûr müezzinliği inhilâl ettiği anlaşılmıştır.

Tevcih-i Cihât Nizâm-nâmesi ahkâmına tevfiğe müsbaka imtihanı lede'l-i'lân üç yüz dokuz revellüdlü ve askerden murahhas müsted'î Ali Efendi'den mâ'adâ tâlib zuhûr etmeyip mûmâ-ileyhin cihet-i mezkûreye ehliyeti bi'l-imtihan tebeyyün etmiş ve hüsn-i hâl ashâbından olup cihetin târih-i inhilâlinden beri hizmeti vekâleten ifa etmekte olduğu dergâh-ı mezkûr postnişini efendi tarafından mu'tâ şehâdetnâmede beyân edilmiş olmasına binâen sâlifü'l-arz müezzinlik cihetinin mûmâ-ileyh Ali Efendi b. Mustafa'nın uhdesine tevcihi tensib edilmekle rehîn-i tasvib-i sâmi-i Cenâb-ı Meşihat-penâhileri buyurulduğu takdîrde mu'âmele-i kaydiyye ifâ ve berât-ı âlîsi i'tâ olunması zımında mazbatanın leffiyle nezâret-i müşârun-ileyhâya tezkire-i aliyye tastîr buyurulması bâbında.

Vahyî, Ahmed Remzî, Mustafa Hakî, Seyyid Mehmed es-Sükûtî, Mustafa, Mehmed

Gülşen, Tefîk

Yazılmıştır

IST_MFT_MSH_DFT02_01740_0001-0001-0068-69

Üsküdar'da Hazret-i Hüdâyî Asitanesi'nde "ve'l-asr" ve iki adet cüzhanlık vazifeleri mutasarrıfı Evliya Hoca Mescidi imamı Emin Efendi'nin görevini bırakmasıyla yerine, asitanenin müezzinini Evliya Hoca Mescidi imamlığına vekâleten Abdülvahid Dede'nin tayini ve ondan münhal müezzinliğe de asitanenin türbedarlarından Ömer Dede Efendi'nin tevcihi.

9 Safer sene [1]338 / 3 Teşrîn-i sâni sene [1]335 / - / - / - / Sîret / - / 28 / Fî 9 S. sene [1]338 [3 Kasım 1919] / Fî 3 Teşrîn-i sâni sene [1]335

Mazbata

Üsküdar'da kâin Hazret-i Hüdâî -kuddise sırrıhu'l-âlî- âsitânesinde ba'de's-subh ve'l-asr iki aded cüzhanlık cihetleri mutasarrıfı Evliyâ Hoca Mescidi imâmı Emin Efendi'nin mezkûr cihetleri terk etmesine ve âsitâne-i müşârun-ileyh müezzinlerinden olup uhdesine bu kere mezkûr Evliyâ Hoca Mescidi imâmet vekâleti tevcih edilmiş olan Abdülvahid Dede bi'l-mürâca'a imâmetle müezzinlik vazîfelerinin ifâsı bir vakte tesâdüf ettiği cihetle cem'î câiz olamayacağından mezkûr müezzinlikten isti'fâ eylemesine binâen inhilâl eden mezkûr iki cüzhanlık ve bir müezzinlikten cüzhanlıkların mûmâ-ileyh Abdülvahid Dede Efendi'ye ve müezzinliğin âsitâne-i pîr-i müşârun-ileyh türbedâr ve cüzhanlarından Ömer Dede Efendi'ye tevcihi hakkında âsitâne-i mezkûr seccâde-nişinliğinden takdîm olunan takrîr üzerine Evkâf-ı Hümâyûn Nezâret-i celîlesinden der'uhde kayıtları isti'lâm buyurulmuş idi.

Nezâret-i müşârun-ileyhâdan 10 Muharrem sene [1]338 târihli ve 134 husûsî numaralı tezkireye leffen irsâl olunup havâle buyurulan takrîr-i mezkûr zahrına Kuyûd-ı Vakfiyye İdâresi'nden muharrer derkenâr ve Üsküdar Evkâf Me'mûrluğunun merbût müzekkiresine nazaran pîr-i müşârun-ileyh vakfı mülhakâtından Cağalzâde merhûm Sinan Paşa Vakfından almak üzere şehri otuz gurus atık elli gurus vazîfe-i hâzıra ile pîr-i müşârun-ileyhin Üsküdar'da kâin câmi'-i şerîfinde müezzin-i râbî' ciheti 4 Zilhicce sene [1]329 târihiyle Hâfız Vahid Dede'ye ve yine pîr-i müşârun-ileyh vakfından şehri yirmişer gurus vazîfelerle ba'de salâtî's-subh ve'l-asr iki aded cüzhânlık cihetleri 5 Zilka'de sene [1]328 târihiyle Hâfız Emin Dede b. Ahmed'e müvecceh olduğu sâlifü'l-beyân Evliyâ Hoca Mescidi imâmeti vekâleti 23 Nisan sene [1]335 târihinde mûmâ-ileyh Abdülvahid Dede Efendi'nin uhdesinde ibkâ edildiği anlaşılmıştır.

İcâbı lede't-teemmül imâmet ve müezzinlik vazîfelerinin şahs-ı vâhid uhdesinde cem'î câiz olamaz ise de imâmet ve cüzhânlığa mâni' teşkil etmeyeceğinden mûmâ-ileyh Emin Efendi'nin terk ve keff-i yedinden inhilâl eden [0069] sâlifü'l-arz iki cüzhânlığın mesbûku'l-imtihan olan mûmâ-ileyh Abdülvahid Dede Efendi ve onun isti'fâsıyla münhal olan mezkûr müezzinliğin de mûmâ-ileyh Ömer Dede Efendi uhdelerine ber-mûceb-i inhâ tevcihi tensib edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'amele-i kaydiyyelerinin icrâ ve berât-ı âlîlerinin itâsı husûsunun mazbata-i dâ'iyânemizin leffiyâ bâ-tezkire-i cevâbiyye nezâret-i müşârun-ileyhâya iş'âr buyurulması bâbında.

Vahyî, Mustafa Hakî, Mustafa, Ali, Mehmed Gülşen

IST_MFT_MSH_DFT02_01740_0001-0001-0070-71

Silivri'de Said [Sadî] Baba Dergâhı postnişini Şeyh Hacı Hafız Hüseyin Talat Efendi'nin şehit olması üzerine, meşihatın biraderi İstanbul'da yanan Kubbe Dergâhı'nın şeyhi Haydar Efendi'nin niyâbetiyle müteveffanın oğlu Abdülvahid Efendi'ye tevcihi.

4 Safer sene [1]338 / 29 Teşrîn-i evvel sene [1]335 / - / - / - / Sîret / - / 27 / Fî 7 S. sene [1]338 [1 Kasım 1919] / Fî 1 Teşrîn-i sâni sene [1]335

Mazbata

Silivri'de kâin Said [Sa'dî] Baba Dergâh-ı şerîfi postnişini iken şehîden vefât eden biraderi Şeyh Talat Efendi'den münhal olan dergâh-ı mezkûr meşihat cihetinin kendi niyâbetiyle müteveffâ-yı mûmâ-ileyhin üç nefer sagîr evlâd-ı zükûrunun ekberi bulunan Abdülvahid Efendi uhdesine tevcihi istid'âsına dâir tarikat-i aliyye-i Rifâ'iyye meşâyhinden Haydar Efendi tarafından takdîm olunup havâle buyurulan istid'ânâme ve merbûtâtı Silivri Kazâsı Meclis-i İdâre mazbatası ve bir kıt'a mu'ameleli arzuhâl ve mübrez berât-ı âlî kırâet olundu.

Kuyûda ve mezkûr berât-ı âlî mündericâtına nazaran Silivri'de Sadi Baba Zâviyesi vakfından almak üzere vazîfe-i mu'ayyene ile tekke-nişinlik cihetinin dergâh-ı mezkûr meşihat hizmetini dergâhta ikâmetle hüsn-i ifâya bezl-i ikdâm ve icrâ-yı âyîn-i tarikat edeceğini ta'ahhüd etmiş olan tarikat-i aliyye-i Rifâ'iyye meşâyhinden Hacı Hâfız Hüseyin Talat Efendi uhdesine 25 Zilhicce sene [1]323 târihinde tevcih buyurulmuş olduğu anlaşılmış ve mûmâ-ileyh Şeyh Talat Efendi'nin berâ-yı vazîfe Çanta karyesine azîmet edip orada bulunduğu sırada Rum eşkiyası tarafından şehîd edilmiş olduğu ve dergâh harâb ve türbe binâsı mevcûd bulunduğu ve biraderi Haydar Efendi niyâbetiyle cihet-i mezkûrenin müteveffânın ekber evlâdı olan üç

yüz yirmi tevellüdlü Abdülvahid Efendi'ye tevcihi muvâfık olacağı kazâ-yı mezkûr meclis-i idâresinden mu'tâ sâlifü'z-zikr fî 5 Teşrîn-i evvel sene [1]335 târihli mazbatada ve nizâmnâme-i cedîd ahkâmınca husûs-ı mezkûrun mahallî encümen-i meşâyihi tarafından taht-ı karâra alınması lâzım gelir ise de a'zânın mevcûd olmaması hasebiyle müsted'inin Dersaâdetde Meclis-i Meşâyihi'e mürâca'at etmesi mahallî evkâf komisyonu reisi müftî efendi tarafından muharrer muktezâda dermiyân olunmuştur.

Îcâb-ı keyfiyyet lede'l-müzâkere müsted'î Şeyh Haydar Efendi gerçi Der'aliyye'de Kubbe Tekkesi şeyhi ise de tekkesinin muhterik ve kendisinin mütekâ'idinden ve vazîfe-i meşîhati îfâya ehil ve muktedir olmasına ve Silivri'de ikâmet ile dergâhı ta'mîr ve ihyâ ve niyâbet-i mezkûreyi bizzât [0071] îfâ ve biraderi müteveffâ-yı mûmâ-ileyhin evlâd ve âilesinin vesâyet ve emr-i i'âşelerini der'uhde edeceğini mecliste şifâhen îfâde ve ta'ahhüd etmesine binâen sagîr-i mezbûrun tahsîl-i ilm ve teslîkine sa'y ü gayret etmek ve sinni hadd-i nizâmîye vâsıl olup da bi'n-nefs eda-yı hizmete kesb-i iktidâr edinceye değin tarîkat-i aliyye-i Rifâ'iyye erkânıyla bi'n-niyâbe ve bilâ-kusûr vazîfe-i meşîhati edâ ve îfâ eylemek şartıyla mârru'l-arz tekke-nişînlik cihetinin vazîfe-i mu'ayyenesiyle sagîr Abdülvahid Efendi uhdesine tevcihi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyye icrâ ve berât-ı âlîsi i'tâ buyurulması husûsunun mazbata-i dâ'iyânemizin leffîyle bâ-tezkire-i aliyye Evkâf-ı Hümâyûn Nezâreti Vekâlet-i aliyyesine iş'âr buyurulması bâbında.

Ahmed Remzî, Mustafa Hakî, Seyyid Mehmed es-Sükûtî, Mustafa, Mehmed Gülşen,
Tevfik

IST_MFT_MSH_DFT02_01740_0001-0001-0072

İzmit Başçeşme Mahallesi'nde Kâdirî Dergâhı şeyhi Hacı Abdullah ile daha sonraki vekili Şeyh Hüseyin Efendi'nin vefatları üzerine, meşîhate Ahmed Efendi b. Hüseyin'in tayini.

- / - / - / - / - / - / - / 26 / Fî 3 Muharrem sene [1]338 [28 Eylül 1919] / Fî 29 Eylül sene [1]335 Mucebince Fî 5 Muharrem sene [1]338 / İşâret-i aliyye târihi

İzmit'te kâin Kâdirî Dergâhı şeyhi Hacı Abdullah Efendi'nin yirmi sene mukaddem ve vekâletinde bulunan Şeyh Hüseyin Efendi'nin ahîran vukû'-ı vefâtlarına mebnî inhilâl edip oraca tâlibi bulunmadığı İzmit Ecnümen-i Meşâyihi'nden vârid olan 5 Mart sene [1]335 târihli ve altı numaralı mazbata mündericâtından anlaşılmış ve Meclis-i dâ'iyânemiz îfâdesiyle sebk eden iş'âr-ı âliye cevâben Evkâf-ı Hümâyûn Nezâret-i celîlesinden vârid olup havâle buyurulan 15 Eylül sene [1]335 târihli tezkirede İzmit'te Başçeşme Mahallesi sâkinlerinden Molla Mehmed oğlu es-Seyyid el-Hâc Hâfız Abdullah Efendi b. Ahmed'in mahalle-i mezkûrede kâin Kâdiriyye Zâviyesinin fukarâ ve dervîşânına it'âm-ı ta'âm olunmak üzere bağ ve bahçe ve dekâkîniyle beş bin guruş nukûd-ı mevkûfesinin şehri yüz para vazîfeli tevliyeti 2 Muharrem sene 1279 târihinde vâkıf-ı mûmâ-ileyhe tevcih olduğu kayden anlaşıldığı ve ancak meşîhat ve vakfiyesi kaydına destres olunamadığı beyân ve iş'âr olunmuş ise de zâviye-i mezkûrenin ber-vech-i ma'rûz şeyhi bulunduğu mahallî Encümen-i meşâyihi'nin iş'arından müstebân olup bazı emsâli misilli kayd ettirilmemiş olduğundan cihet-i meşîhatın Kuyûd-ı Vakfiyye İdâresince kaydının icrâsıyla zâviye-i mezkûre meşîhatını bâ-istid'â taleb eden Kâdirîhâne Hânkâh-ı şerîfi hulefâsından Ahmed Efendi b. Hüseyin tarîkat-i aliyye-i Kâdiriyye hulefâsından ve îfâ-yı

vazîfeye ehil ve hüsn-i hâl ashâbından olmasına ve zâviye-i mezkûrenin şehri doksan altı gurus ta'âmiyyeden başka bir şeyi bulunmamasına binâen sâlifü'l-arz cihet-i meşihatın mûmâ-ileyhe tevcihi ekseriyyet-i ârâ ile tensib edilmekle rehîn-i tasvib-i âlî-i Cenâb-ı Meşihat-penâhileri buyurulduğu takdîrde mu'âmele-i mukteziyye icrâ ve berât-ı âlisi tastîr ve i'tâ olunması husûsunun mazbata-i dâ'iyânemizin leffiyle bâ-tezkire Evkâf-ı Hümâyûn Nezâret-i celîlesine/aliyyesine iş'âr buyurulması bâbında.

Ahmed Remzî, Mustafa Hakî, Seyyid Mehmed es-Sükûtî, Mustafa, Ali, Tevfik

IST_MFT_MSH_DFT02_01740_0001-0001-0073

Üsküdar'da Şeyh Camii adıyla bilinen Devâtizâde Şeyh Mustafa Efendi Dergâhı meşihat, imamet ve hitabet cihetleri mutasarrıfı Seyyid Mehmed Tâlib Efendi'nin vefatıyla, yerine Şeyh Hüseyin Haydar Efendi b. Abdurrahman Aziz'in tayini.

Gurre-i Muharrem sene [1]338 / 27 Eylül sene [1]335 / - / - / - / Sîret / - / 25 / Fî 3 Muharrem sene [1]338 [28 Eylül 1919] / Fî 29 Eylül sene [1]335 Mûcebince Fî 5 Muharrem sene [1]338 İşâret-i aliyye târihi

Mazbata

Üsküdar'da Şeyh Câmi'i nâmıyla ma'rûf Devâtizâde Şeyh Mustafa Efendi hazretleri dergâh-ı şerîfinin meşihat cihetiyle cihât-ı sâiresi mutasarrıfı Şeyh Talib Efendi'nin bilâ-veled-i zükûr vukû'-ı vefâtına mebnî inhilâl eden cihât-ı mezkûrenin uhdesine tevcihi hulefâ-yı Celvetiyye'den Hüseyin Haydar Efendi tarafından bâ-arzuhâl taleb ve istid'â olunması üzerine Meclis-i dâ'iyânemiz ifâdesiyle sebk eden iş'âr-ı âliye cevâben Evkâf-ı Hümâyûn Nezâret-i celîlesinden vârid olup havâle buyurulan 24 Zilhicce sene [1]337 ve 20 Eylül sene [1]335 târihli ve 122670 umûmî 125 husûsî numaralı tezkirede merhûm Hüdâî Mahmud Efendi hazretleri evkâfı mülhakâtından Üsküdar'da Selmanağa Mahallesi'nde Vâlîde Sultân kedhüdâsı merhûm Arslan Ağa Câmi'-i şerîfinde şehri yetmiş beş gurus vazîfeli hitâbet ve yüz gurus vazîfeli imâmet ve meşihat ve câmi'-i şerîf-i mezkûrda Devâtizâde eş-Şeyh Mustafa Efendi Zâviyesinin bilâ-vazîfe zâviyedârlık cihetleri 21 Zilkâ'de sene 1275 ve 3 Rebî'ülevvel sene [1]310 târihleriyle Seyyid Mehmed Talib Efendi'ye müvecceh olduğu ve cihât-ı ânîfenin mine'l-kadîm müşârun-ileyh Hüdâî eş-Şeyh Mahmud Efendi hazretleri dergâhı seccâde-nişînlerinin inhâlarıyla tevcih oluna geldiği bi't-tedkîk anlaşıp vakfeyn-i mezkûreynin vakfiyeleri mukayyed olmadığı beyân ve iş'âr olunmuştur. Îcâbı lede'l-müzâkere dergâh-ı şerîf-i mezkûr meşihat ve cihât-ı sâiresinin mine'l-kadîm Hazret-i Pîr Hüdâî -kuddise sırruhu'l-âlî- Hânkâh-ı şerîfi seccâde-nişînlerinin inhâlarıyla tevcihi müte'amil bulunduğu mârru'l-arz müzekkire müeddâsından anlaşılmış ve müsted'i-i mûmâ-ileyh Şeyh Hüseyin Haydar Efendi'nin âsitâne-i pîr-i müşârun-ileyh fukarâsından ve erbâb-ı fazl ve iktidâr sulehâ-yı dâ'iyândan bulunduğundan cihât-ı ânîfenin mûmâ-ileyhe tevcihi azîz-i müşârun-ileyh hânkâh-ı şerîfi seccâde-nişîni reşâdetlü eş-Şeyh Mehmed Gülşen Efendi dâ'ileri tarafından inhâ edilmiş olmasına ve nizâmnâme ahkâmına tevfikân müsted'i-i mûmâ-ileyhin icrâ kılınan imtihanında ehliyet ve liyâkati tebeyyün etmesine binâen sâlifü'l-arz meşihat ve imâmet ve hitâbet cihetlerinin mûmâ-ileyh Şeyh Hüseyin Haydar Efendi b. Abdurrahman Aziz uhdesine tevcihi tensib edilmekle sûret-i ma'rûza rehîn-i tasvib-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyye îfâ ve berât-ı âlîleri i'tâ olunması

husûsunun mazbata-i dâ'iyânemizin leffiyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Vahyî, Ahmed Remzî, Mustafa Hakî, Seyyid Mehmed es-Sükûtî, Mustafa, Ali, Tevfik
Yazılmıştır

IST_MFT_MSH_DFT02_01740_0001-0001-0074

Halıcılar Köşkü'nde Şeyh Hacı Feyzullah Efendi Dergâhı şeyhi Mehmed Sâdık Efendi'nin vefatı üzerine, yanan dergâhı yeniden inşa etmek şartıyla meşihatın büyük oğlu İhsan Efendi'ye tevcihi.

19 Z. sene [1]337 / 15 Eylül sene [1]335 / - / - / - / Sîret / - / 24 / Fî 19 Z. sene [1]337 [15 Eylül 1919] / Fî 29 Eylül sene [1]335

Mücebince İşâret-i aliyye târihi fî 25 Zilhicce sene [1]337

Mazbata

Der'aliyye'de Halıcılar Köşkü nâm mahalde kâin tarikat-i aliyye-i Nakşiyye-i Hâlidîyye'den merhûm el-Hâc Şeyh Feyzullah Efendi hazretleri dergâh-ı şerîfi meşihat cihetinin mutasarrıfı pederi Şeyh Mehmed Sâdık Efendi'nin vukû'-ı vefâtına mebnî inhilâl eden cihet-i mezkûrenin hasbe'l-meşrûtiyye uhdesine tevcihi istid'âsına dâir İhsan Efendi tarafından takdîm olup havâle buyurulan arzuhâl kırâet olundu.

Kuyûda lede'l-mürâca'a dergâh-ı şerîf-i mezkûr şeyhi mûmâ-ileyh Sâdık Efendi bundan akdem vefât edip dergâhın dahi muhterik olduğu ve vakfiye kaydına nazaran cihet-i mezkûre evlâda ve tevliyeti meşihate meşrûta bulunduğu anlaşılmış ve meşihatın uhdesine tevcihiyle hasbe'l-meşrûtiyye tasarruf edeceği tevliyetten tahsîl eyleyeceği mebâligi ile dergâhı yeniden binâ ve inşâ eyleyeceği mezkûr istid'ânâmenin cümle-i mündericâtından bulunmuştur.

Îcâbî müzâkere olundukda müsted'î-i mûmâ-ileyh müteveffâ Şeyh Sâdık Efendi'nin ekber ve erşed mahdûmu olmağla mezkûr cihet-i meşihatın meşrûtün-lehi ve tarikat-i aliyye-i mezkûreden mücâz olup meclisçe dahi ehliyeti tezâhür etmesine binâen cihet-i meşihat-i ma'rûzanın mûmâ-ileyhe tevcihi tensib edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye ifâ ve berât-ı âlisi i'tâ buyurulması husûsunun mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâret-i aliyyesine iş'âr buyurulması bâbında.

Vahyî, Mustafa Hakî, Mustafa, Tevfik
Yazılmıştır

IST_MFT_MSH_DFT02_01740_0001-0001-0075

Üsküdar'da Hazret-i Hüdâyî Asitanesi cüzhanlık ve türbedarlık cihetlerinin mutasarrıfı Mahmud Dede b. Said'in vefat eden nâibi Hafız Hasan Dede'nin yerine, Aziz Mahmud Dede'nin tayini.

12 Za. sene 1337 / 9 Ağustos sene [1]335 / - / - / - / Sîret / - / 23 / 12 minhü [9 Ağustos 1919] / 9 minhü

Mazbata

Üsküdar'da kâin Hazret-i Hüdâî -kuddise sırruhu'l-âî- Âsitânesinde cüzhânlık ve türbedârlık cihetlerinin mutasarrıfı sagîr Mahmud Dede b Said'e mezkûr cihetler için mukaddemâ nâib ta'yîn kılınmış olan Hâfız Hasan Dede'nin vukû'-ı vefâtına ve sagîr-i mezbûr henüz sinn-i rüşde vâsıl olmamış idiğine binâen sagîr-i mezbûr kebîr olup da bi'l-fi'îl ifâ-yı hizmete kesb-i iktidâr edinceye değin hizmetleri mu'attal kalmamak üzere Aziz Mahmud Dede'nin nâib ta'yîni âsitâne-i mezkûr postnişinliği tarafından inhâ olunmuş ve mûmâ-ileyh Aziz Mahmud Dede'nin lede'l-imtihân ehliyeti tebeyyün etmiş olduğundan ol vechile nâib ta'yîni tensib edilmekle rehîn-i tasvib-i sâmi-i Cenâb-ı Meşihat-penâhileri buyurulduğu takdîrde mu'âmele-i lâzimenin icrâsı zımnında mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Gülşen, Tevfik

IST_MFT_MSH_DFT02_01740_0001-0001-0076

Beşiktaş'ta Şeyh Yahya Efendi Türbesi'nin vefat eden "şifâ-i şerif kârîi" Şeyh Hüseyin Şevki Efendi'nin yerine oğlu Sadeddin Efendi'nin tayini.

4 Zilka'de sene [1]337 / 2 Ağustos sene [1]335 / - / - / - / Sîret / - / 22 / 8 minhü [5 Ağustos 1919] / 6 minhü

Mazbata

Beşiktaş'ta kâin Yahya Efendi hazretleri türbe-i şerîfesinde "Kâri-i şifâ-i şerif" cihetinin mutasarrıfı pederi Şeyh Hüseyin Şevkî Efendi'nin vukû'-ı vefâtına mebnî inhilâl eden cihet-i mezkûrenin uhdesine tevcihi Sadeddin Efendi tarafından istid'â olunması üzerine cihet-i mezkûrenin der'uhde ve şart-ı tevcih kaydıyla vazîfesi mikdârının inbâsı hakkında Meclis-i dâ'iyânemiz ifâdesiyle sebk eden iş'âr-ı âliye cevâben Evkâf-ı Hümâyûn Nezâret-i celîlesinden vârid olup havâle buyurulan 21 Şevvâl sene [1]337 ve 21 Temmuz sene [1]335 târîhli ve 121078 umûmî, 91 husûsî numaralı merbût tezkire kırâet olundu.

Cennet-mekân Sultân Mahmud Hân-ı Sâni hazretleri evkâf-ı şerîfesinden almak üzere şehri iki yüz elli gurus vazîfe ile Beşiktaş'ta kâin Yahya Efendi Türbesinden kârî-i şifâ-i şerif ciheti 15 Şevvâl sene [1]309 târihiyle Hüseyin Şevkî Efendi'ye müvecceh olduğu bi't-tedkik anlaşıldığı ve cihet-i mezkûrenin el-yevm üç yüz on iki gurus yirmi para vazîfesi bulunduğu mezkûr tezkire müfâdından ve mûmâ-ileyh Hüseyin Şevkî Efendi'nin 30 Ağustos sene [1]333 târihinde vefât ettiği ve târih-i mezkûrdan şimdiye kadar vazîfe-i kırâet terk ve ihmâl edilmeyip ifâ ettirildiği ve kebîr mahdûmu müsted'î-i mûmâ-ileyh Sadeddin Efendi Yahya Efendi hazretleri dergâh-ı şerîfi sekenesinden ve salâh-ı hâl ashâbından bulunduğu tekâyâ merkezlerinden olan mezkûr dergâh postnişinliğinden mu'tâ ilmühaber mündericâtından anlaşılmasına ve Tevcih-i Cihât Nizâmnamesi ahkâmına tevfikân imtihânı icrâ kılınan mûmâ-ileyh Sadeddin Efendi'nin ehliyeti nümâyân olmasına binâen sâlifü'l-arz kârî-i şifâ-i şerif cihetinin pederi mahlûlünden mûmâ-ileyh Sadeddin Efendi uhdesine tevcihi ve müteveffâ Hüseyin Şevkî Efendi'nin târih-i vefâtından işbu târih-i tevcihe kadar güzêrân olan eyyâma âid olup dâire-i Evkâfca mevkûf tutulan vazîfe ve ma'âşının emsâli vechile tam olarak tesviye ve itâsı tensib edilmekle rehîn-i tasvib-i sâmi-i Cenâb-ı Meşihat-penâhileri buyurulduğu takdîrde mu'âmele-i mukteziyyenin ifâsı husûsunun mazbata-i dâ'iyânemizin leffiyle nezâret-i müşârun-ileyhâya cevâben iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mehmed Gülşen, Mustafa, Tevfik

IST_MFT_MSH_DFT02_01740_0001-0001-0077

Üsküdar Aziz Mahmud Hüdâyi Asitanesi'nde cüzhan ve türbesinde müstahfız olan Nûri Efendi'nin azliyle yerine, Ömer Dede Efendi b. Dursun'un tayini.

20 Şevvâl sene [1]337 / 19 Temmuz sene [1]335 / - / - / - / Sîret / - / 21 / 20 minhü [19 Temmuz 1919] / 19 minhü

Mazbata

Üsküdar'da Cenâb-ı Pîr Azîz Mahmûd Hüdâî -kuddise sırruhu'l-âlî- hazretleri Âsitânelerinde ba'de's-subh ve'l-asr cüzhânlık ve türbe-i şerîfelerinde müstahfızlık cihetlerine mutasarrıf olan Nûri Efendi öteden beri ne hizmetlerine ve ne de usûl ve mukâbeleye devam etmemekte ve kendisine vukû' bulan teblîgât ve ihtârâtı ısgâ etmemekte olduğundan ve mûmâ-ileyh esâsen Üsküdar'da Cedîd Vâlide ve Davud Paşa Câmi'-i şerîflerinde vekâleten ve asâleten birkaç cihet der'uhde ederek hânkâh-ı pîrdeki cihetlerinin vezâif-i kalîlesine pek de mütenezzil bulunmadığından mezkûr cihetlerin emsâli için mûcib-i intibâh olmak üzere mûmâ-ileyh uhdesinden ref'iyle dergâh-ı şerîf dedegânından olup salâh-ı hâl ile me'lûf bulunan Ömer Dede Efendi b. Dursun uhdesine tevcihi hakkında hânkâh-ı mezkûr postnişîni eş-Şeyh Mehmed Gülşen Efendi tarafından takdîm olunup havâle buyurulan 27 Şubat sene [1]335 târihli istid'ânâmeye binâen ol bâbdaki ta'lîmâtname ahkâmına tevfiikan mûmâ-ileyh Nûri Efendi'ye tenbîh ve ihtâr icrâsı Meclis-i dâ'iyânemiz a'zâsından bulunan mûmâ-ileyh şeyh efendiye tavsiye edilmişidi. Bu defa dahi şeyh-i mûmâ-ileyh tarafından verilen takrîrde icrâ edilen tenbîhât ve ihtârâta rağmen hâlâ vazîfesine devam etmeyip adem-i devâm ve terk-i hizmette temerrüd etmekte ve bu hâl emsâline de sû-i te'sîr hâsıl eylemekte olduğu beyân edilmiştir. Keyfiyyet lede'l-müzâkere hânkâh-ı pîr-i müşârun-ileyhte bulunan bi'l-cümle cihât-ı ilmiyye ve bedeniyenin tevcih ve ref'i husûsatı postnişîn bulunan zevâtın inhâlarıyla icrâ olunması vakfiye ve ferâmîn-i âliye ile kuyûd-ı resmiyye iktizâsından ve bilâ-özü-i şer'î hizmetini muntazaman îfâ etmemeyi i'tiyâd edenlerin uhdesindeki cihâtın ref' olunması Meclis-i Meşâyih Nizâmnâmesi'nin on üçüncü maddesi ahkâmından olmasına ve ta'lîmâtname mücebince icrâ kılınan tenbîh ve ihtârı dahi ısgâ etmemesine binâen madde-i mezkûre ahkâmına tevfiikan cihât-ı mezbûrenin mûmâ-ileyh Nûri Efendi uhdesinden ref'iyle Ömer Dede Efendi b. Dursun uhdesine tevcihi tensîb edilmekle rehîn-i tasvîb-i sâmi-i Cenâb-ı Meşihat-penâhîleri buyurulduğu takdirde mu'âmele-i mukteziyye îfâ olunmak üzere mazbata-i dâ'iyânemizin leffiyle Evkâf-ı Hümâyûn Nezâret-i celîlesine tezkire-i aliyeye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Mehmed Gülşen, Tevfik

IST_MFT_MSH_DFT02_01740_0001-0001-0078

Eyüp'te Abdullah Kâşgarî diğer adıyla Murtaza Efendi Dergâhı şeyhi Mehmed Bahâeddin Efendi'nin vefatıyla, yerine Hakkârî ulemasından Şeyh Abdülhakîm Efendi'nin tayini.

15 Şevvâl sene [1]337 / Fî 14 Temmuz sene [1]335 / - / - / - / Sîret / - / 20 / 15 minhü [14 Temmuz 1919] / 14 minhü

Sûret-i işâret-i aliyeye mücebince fî 15 Şevvâl sene [1]337

Mazbata

Hazret-i Ebâ Eyyûb el-Ensârî -radiye anhu'l-Bârî- civâr-ı rahmet-medârında kâin Abdullah Kaşgarî ve nâm-ı diğeri Murtaza Efendi Dergâh-ı şerîfinin münhal bulunan meşîhat cihetinin uhdesine tevcihi istid'âsına dâir Hakkârî ulemâ ve meşâyihinden Abdülhakîm Efendi tarafından takdîm olunup havâle buyurulan arzuhâl kırâet ve kuyûda mürâca'at olundu. Dergâh-ı mezkûr şeyhi Mehmed Bahâeddin Efendi'nin 19 Teşrîn-i sâni sene [1]334 târihinde vukû'-ı vefâtına mebnî taht-ı silâhta bulunup ol vakit hayat ve memâtı meçhûl olan bir nefer oğlunun âkibeti tahakkuk edinceye değin mezkûr meşîhat cihetine evvelâ Şeyh Sadeddin ve ahîran Şeyh Hasan Fehmî efendiler vekîl ta'yîn buyurulmuş idi. Bi'l-âhare icrâ kılınan muhâbere neticesinde müteveffâ-yı mûmâ-ileyhin oğlu Ziyaeddin Efendi askerde iken 9 Ağustos sene [1]332 târihinde vefât ettiği Fâtih Ahz-ı Asker Şu'besi Riyâsetinden bildirilmiş ve bu sûretle meşîhat-i mezkûre ile meşîhate meşrûta dergâh-ı mezkûr imâmet ve hitâbet cihetleri münhal olmuştur.

Cihât-ı mezkûre der'uhde ve şürût-ı tevcihiyye kayıtları hakkında Kuyûd-ı Vakfiyye İdâre-i behiyyesinin 8 Kânûn-ı evvel sene [1]334 târihli ve 3707 numaralı müzekkire-i cevâbiyesinde Rûznâmçe-i evvel el-Hâc Murtaza Efendi Vakfından almak üzere yevmî on akçe vazîfe ile Eyüb'de kâin Nakşibendî Zâviyesinde meşîhat ve şehri yetmiş sekiz gurus vazîfe ile meşîhate meşrûta imâmet cihetleri 16 Şa'bân sene [1]319 ve 27 Zilka'de sene [1]321 târihlerinde Mehmed Bahâeddin Efendi ve yevmî altı akçe vazîfe ile kezâ meşîhate meşrûta hitâbet ciheti 6 Cumâdelâhire sene [12]58 ve 4 Safer sene [12]79 târihlerinde es-Seyyid Mehmed Âşir Efendi uhdelere müveccih olduğu ve meşîhat-i mezkûrenin hîn-i inhilâlinde meşâyih-i Nakşibendiyye'nin münâsib gördükleri bir kâmil-i tarîk ve okur-yazar mezheb-i Hanefiyye'den bir ehl-i takvâ kimesne mütevellî arz ile şeyh ta'yîn olunması vâkıf-ı mûmâ-ileyhin mukayyed vakfiyesi cümle-i şürûtundan bulunduğu beyân olunmuş ve cihet-i hitâbetin mutasarrıfı Mehmed Âşir Efendi dergâh-ı mezkûr şeyh-i esbakı olup vefâtına mebnî hitâbet-i mezkûre dahi münhal bulunmuştur.

İcâbı lede'l-müzâkere müsted'î Şeyh Abdülhakim Efendi Hakkârî ulemâ ve meşâyihinden olup Der'aliye'ye hicret ederek külle-yevm cevâmî'-i şerîfede ifâ-yı va'z u nasihatle meşgûl ve kendisinin bir şeyh-i kâmil olduğu cümlece ma'lûm bulunduğu şart-ı vâkıf mücebince meşâyih-i Nakşibendiyye tarafından tanzîm olunan intihâbnâmeden anlaşıldığı gibi meclisçe dahi ehliyet ve liyâkati müsellemler olduğuna ve arzuhâli üzerine keşide buyurulan (mûmâ-ileyh Abdülhakim Efendi ehil ve münâsib olmağla icrâ-yı icâbı) işâret-i aliyye-i Cenâb-ı Meşîhat-penâhîleriyle bir kat daha kadri tebci buyurulmuş olmasına binâen dergâh-ı mezkûr meşîhat cihetiyle hasbe'l-meşrûtiyye imâmet ve hitâbet cihetlerinin mûmâ-ileyh Şeyh Abdülhakim Efendi uhdesine tevcihi tensib edilmekle rehîn-i tasvib-i âlî-i Cenâb-ı Fetvâ-penâhîleri buyurulduğu takdîrde mu'âmele-i mukteziyye ifâ ve berât-ı âlîleri i'tâ olunmak üzere mazbata-i dâ'iyânemizin leffiyle Evkâf-ı Hümayûn Nezâret-i celîlesine tezkire-i aliyye şeref-tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST_MFT_MSH_DFT02_01740_0001-0001-0079

Üsküdar Selimiye'de Selimiye Dergâhı mutasarrıfı Mehmed Hidayet Efendi'nin nâibi Şeyh Esad Efendi'nin aziliyle, niyâbete Meclis-i Meşâyih reisi Mehmed Tevfik Efendi'nin tayini.

10 Şevvâl sene [1]337 / 9 Temmuz sene [1]335 / - / - / - / Sîret / - / 19 / 10 minhü [9 Temmuz 1919] / 9 minhü

Mazbata

Cennet-mekân Sultân Selim Hân-ı Sâlis hazretlerinin ihyâ-kerdeleri olan Üsküdar'da Selimiye'de kâin hânkâh-ı Nakşibendiyye meşihat cihetinin bi'n-niyâbe mutasarrıfı sagır Mehmed Hidayet Efendi'nin nâibi Şeyh Es'ad Efendi'nin şürût-ı vâkıfa tevfikân îfâsını ta'ahhüd ettiği vezâîfi terk ve dergâhı hâlî bıraktığı Evkâf-ı Hümayûn Nezâret-i celîlesinden makâm-ı sâmi-i Cenâb-ı Fetvâ-penâhîlerine vârid olan tezkire mündericâtından anlaşılmasına mebnî vazîfesini kemâhiye hakkuhâ îfâ edecek münâsibi ta'yîn olunmak üzere mûmâ-ileyhin azli hakkında takdîm kılınan 19 Ramazan sene [1]337 târihli ve 72 numaralı müzekkireye binâen azl buyurulmuş idi. Hânkâh-ı mezkûrda şeyh olacak zâtın âlim ve fâzıl ve müttekî ve kâmil sülûk-ı Nakşibendiyye ile mevsûf bir zât-ı sûtûde-sıfât olması vâkıf-ı müşârun-ileyhin vakfiyye-i ma'mûlün-bihâlarında mastûr olmasına ve Meclis-i dâ'iyânemiz reisi meşâiyih-i Nakşibendiyye'den reşâdetlü Şeyh Mehmed Tevfik Efendi dâ'îlerinin evsâf-ı mezkûreyi tamâmen hâiz ve vazîfe-i meşihati kemâhiye hakkuhâ îfâya kâdir bulunmasına binâen ber-vech-i ma'rûz inhilâl eden hânkâh-ı mezkûr şeyh niyâbetinin mûmâ-ileyhin uhdesine tevcihi tensîb edilmekle rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'amele-i mukteziyye îfâ ve berât-ı âli i'tâ olunması zımında mazbata-i dâ'iyânemizin leffiyle nezâret-i müşârun-ileyhâya tezkire-i aliyye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa

Yazılmıştır

IST_MFT_MSH_DFT02_01740_0001-0001-0080-81-82

Silivrikapı'da Seyyid Nizâmeddin Dergâhı meşihat cihetiyle imamet, hitabet, türbedarlık ve haffâr-ı kabir cihetlerinin Seyyid Kenan b. Servet'e ve Emîrler Tekkesi diğer adıyla Seyyid Seyfullah Efendi Dergâhı meşihatının de Turhan b. Servet'e tevcihine, Meclis-i Meşâiyih azasından Ali Efendi'nin muhalefet şerhi koymasının sebepleri.

- / - / - / - / - / - / - / - / - /

[0080] Bu kere Meclis-i Meşâiyih-i Kirâm taraflarından bir vakıf beyyinesi i'lâmına istinâden i'tâ buyurulan derûn-ı mazbatada muharrer karâr-ı vâki' kendi fikir ve ictihâdına muhâlif tir.

Esbâb-ı muhâlefetin ber-vech-i âtî beyânına ibtidâr kılındı. Şöyle ki evvelâ Meclis-i Meşâiyihce ibrâz edilen 998 târihli i'lâm bilâ-beyyine mazmûnuyla amel olunacak tezvîr ve tasnî'den sâlim usûl-i nizâmîsi dâiresinde müseccel kuyûd-ı mu'tebere ile müeyyed hücec-i şer'îyye metin değildir ve şu şürût ve kuyûd mazmûnuyla amel olunmak üzere evvel emirde meclis-i mezkûrce tahkîkât-ı lâzime icrâ edilmemiştir. Sâniyen mazmûnuyla amel edilen hücec-i şer'îyyeden olduğu farz edildiği sûrette dahi i'lâm-ı mezkûrun ihtivâ eylediği menât-ı hüküm bizzât Seyfullah Efendi Dergâhının dâhil olduğu kıt'a-i arâzînin vakfiyetine münhasır bulunmağla şerâit-i vâkıfı ta'yîn ve tesbît husûsunda bir gûne te'siri olamaz. Sâlisen şürût-ı vâkıfa ta'alluku farz edilse bile metn-i i'lâmda zikredilen şartın nasıl bir vazîfeye âid olduğu gayr-i sarîh olduğundan bi-tarîki'l-istitrâd zikredilen mübhem bir şartın meşihat vazîfesine haml ve isnâdî şer'an ve nizâmen aslâ câiz olamaz. Râbi'an evvelce Meclis-i Meşâiyih tarafından kaleme alınan ve Şûrâ-yı Devletce tasdik edilen mütâlâ'anâmede mufassalan zikr edildiği üzere Defter-i Hâkânî Kuyûdât-ı Kadîmesinden müstahrec Bayram Dede zâviyelerine âid ihbârnameye nazaran Bayram Dede'nin sur dâhilindeki zâviyesinin el-yevm Seyyid Seyfullah Zâviyesi denmekle ma'rûf

olan zâviye olmayıp o civârda sâhib-i vakfın türbesini hâvî diğer bir zâviye olduğu [0081] ve Seyyid Seyfullah Efendi hazretlerinin medfûn oldukları zâviyelerinin bânisi kendileri olduğuna dâir elde bir emâre olmamakla beraber kadîmden beri zâviye-i mezkûre nâmlarına nisbet edildiğinden Seyyid Seyfullah Zâviyesi başka ve Bayram Dede Zâviyesi başka olması lâzım gelir. Kezâlik kayd-ı mezkûrun diğer bir fıkrasında hâlâ vâkıfı derûnunda medfûn zâviyeye on bin akçe sarf ile i'mârına muvaffak olduğu kaydına nazaran zâviye-i mezkûrenin vâkıfı Seyyid Seyfullah Efendi olması farz edilse Seyyid Seyfullah bânî-i evvel ve Bayram Dede'nin bânî-i sâni olması lâzım geleceği ve şu hâlde Bayram Dede'nin 950 târihinde ve Seyyid Seyfullah'ın dahi 1010 târihlerinde vefâtları hasebiyle böyle bir faraziyyeye imkân dahi olamayacağı bedîhîdir. İhbârname-i mezkûre ise Defter-i hâkânî kuyûduna müstenid olmağa i'lâm-ı mezkûra nisbetle daha ziyâde ihticâca sâlih bulunduğu cihetle i'lâm-ı mezkûrun karar ittihâzına medâr olamayacağı emr-i zâhirdir. Hâmisen gerek Seyyid Nizâmeddin ve gerek Seyyid Seyfullah zâviyelerinin meşîhat cihetleri bi'l-asâle Hasan Adlî ve Hâfız Mustafa efendilere tevcihi lüzûmu Fetvâhâne-i âlînin fetvâsına ve Mahkeme-i Evkâfın hükmüne ve Tedkîkât-ı Şer'îyye'nin tasdikine iktirân eylediği ve her ne kadar şekle âid bazı nevâkısdan nâşî Temyîz-i Şer'î dâiresince nakz edilmiş ise de asıl hükm-i şer'îye i'tirâz olunmadığı ve bu husûsa dâir evvelce Meclis-i Meşâyih'ten beyân edilen mütâlâ'anın Şûrâ-yı Devletce bi't-tensîb niyâbet sûretiyle tevcihe âid Şûrâ-yı Evkâfın mukarrerâtı nakz edildiği ve Meclis-i Meşâyih'in Temyîz-i Şer'î dâiresiyle Şûrâ-yı Devlet'in kabûl etmiş olduğu bir hükmün hilâfına bir karar ittihâzına salâhiyet-dâr olmadığı cihetle bi'n-niyâbe tevcih kararı usûl ve nizâma muvâfık ve mutâbık değildir. Sâdisen, ihticâca sâlih olmayan ihbâr vakıf i'lâmına istinâden Seyyid Nizâmeddin Zâviyesiyle Seyyid Seyfullah Zâviyesinin meşîhat cihetlerinin Seyyid Nizâmeddin evlâdına meşrûtiyeti cihetine gitmek evvelâ Seyyid Nizâmeddin Türbesinde kadîmen bir meşîhat-i meşrûta-i mevkûfenin kabûlü ahîran merhûm Âdile Sultân'ın vaz' ve ihdâs eylediği vakıf ve şûrûtnun ibtâlını istilzâm edeceği ve sâniyen Seyyid Seyfullah Zâviyesi meşîhatının cihât-ı meşrûtadan olmadığı hâlde [0082] cihât-ı meşrûtaya tahvîlini icâb eyleyeceği ve şu ibtâl ve tahvîl keyfiyyetlerinin ancak birer hükm-i şer'î ile mümkün olabileceği cihetle Meclis-i Meşâyih'in husûsât-ı mezkûre hakkında ittihâz-ı karâr edemeyeceği umûr-ı bedîhiyyendendir. Sâbi'an Meclis-i Meşâyih'in istinâd eylediği şu ihbâr-ı vakıf i'lâmının hüccet-i makbûle-i şer'îyyeden olduğu farz ve takdîrinde i'lâm-ı mezkûrda Bayram Dede vakf-ı mezkûru evvelâ kendi nefsine ve evlâd-ı evlâdına şart eylediğine nazaran mûmâ-ileyhin evlâdının inkirâz ve inkitâ'ı Meclis-i Meşâyihce tahakkuk etmedikçe Seyyid Nizâmeddin evlâdına âid ikinci şartıyla amel edilemez. Sâminen ikinci derecede Seyyid Nizâmeddin evlâdına meşrûta olduğu hâlde el-yevm Seyyid Nizâm sülâlesinden evlâd-ı kibâr mevcûd iken Seyyid Nizâmeddin sülâlesinden merhûm Şücâ Efendi'nin biraderzâdesi sagîre meşîhat tevcihi min külli'l-vücûh sahîh olamaz. Tâsi'an ânifen beyân olunduğu üzere Seyyid Nizâm sülâlesinden evlâd-ı kibâr mevcûd iken Şücâ Efendi'nin biraderzâdesi sagîrlere tevcihi ancak Seyyid Nizâm Zâviyesine münhasır bulunan ve mûmâ-ileyh Şücâ Efendi'yle biraderlerinin evlâdına meşrûtiyeti nâtik olan Âdile Sultân'ın vakfiyesine müstenid olabilir ki bu husûsta dahi bir zühûl eseri vardır. Çünkü Âdile Sultân'ın vakfiyesinin Seyyid Seyfullah Zâviyesine kat'îyyen ta'alluku olmadığı cihetle karâr-ı vâkı'de re'yim bulunmadığının esbâb-ı mûcibesini beyân ma'razında zîr-i mazbataya vaz'-ı imzâ eyledim.

An a'zâ-yı Meclis-i Meşâyih Ali

IST_MFT_MSH_DFT02_01740_0001-0001-0083-84-85-86-87

Silivrikapı'da Emîrler Tekkesi ismiyle anılan Seyyid Seyfullah Efendi Dergâhı, Seyyid Nizâmeddin Dergâhı ve Bayram Dede Dergâhı meşihat cihetleriyle ilgili görülen davalar neticesinde; Seyyid Nizâmeddin Dergâhı meşihat cihetiyle imamet, hitabet, türbedarlık ve haffâr-ı kabir cihetlerinin Seyyid Kenan b. Servet'e ve Emîrler Tekkesi diğer adıyla Seyyid Seyfullah Efendi Dergâhı meşihatının de Turhan b. Servet'e tevcihine dair Meclis-i Meşâyihi'nin kararı.

5 Ramazan sene [1]337 /4 Haziran sene [1]335 / - / - / - / Sîret / - / 18 / Fî selh-i Ramazan sene [1]337 [29 Haziran 1919] / Fî 1 Temmuz sene [1]335

Mazbata

Silivrikapısı hâricinde kâin kutbü'l-ârifin Seyyid Nizâmeddin -kuddise sırruhu'l-Metîn- hazretleri hânkâh-ı şerîfinin meşihat ve cihât-ı sâiresiyle bâb-ı mezkûr dâhilinde kâin Emîrler Tekkesi denilmekle ma'rûf Seyyid Seyfullah Efendi Dergâh-ı şerîfi meşihat cihetinin bâ-berât-ı âlî mutasarrıfı seyyid-i müşârun-ileyh evlâdından Şeyh İbrâhîm Şücâeddin Efendi'nin bin üç yüz otuz iki senesinde bilâ-veled-i zükûr vukû'-ı vefâtıyla münhal addolunan Seyyid Nizâmeddin Hânkâhı'nın meşihat ve cihât-ı sâiresi tarikat-i aliyeye-i Halvetiyye'den Şeyh Hasan Adlî ve Seyyid Seyfullah Efendi Dergâh-ı şerîfi meşihati tarikat-i mezkûreden Şeyh Mustafa Nûri efendiler uhdeslerine asâleten tevcih olunduktan sonra cihât-ı mezkûrenin Seyyid Nizâmeddin hazretleri evlâdına meşrûtiyeti iddi'â olunması üzerine keyfiyyet Şûrâ-yı Evkâfca tedkik olunarak Kuyûd-ı Vakfiyye İdâresi'nin derkenârlarında mahkî Bayram Dede ve muahharen yapılan merhûme Âdile Sultân vakfiyeleriyle ta'âmüle istinâden cihât-ı mezkûre Seyyid Nizâmeddin ve Seyyid Seyfullah evlâd ve sülâlesine batnen ba'de batnin meşrûta olduğu ve sülâle-i müşârun-ileyhimâdan müteveffâ Şeyh Şücâeddin Efendi'nin biraderleri ve Âdile Sultân vakfiyesinde muhassas bi'z-zikr Talat ve Lütfullah efendiler ahfâdından sâbitü'n-neseb sagîr Kenan ve Seyyid Turhan mevcûd bulunduğu anlaşıldığından evrâkın i'ade olunmasına ve Meclis-i Meşâyihi'ten verilen ikinci bir mazbataya binâen ber-vech-i meşrûtiyet Seyyid Nizâmeddin Hânkâhı meşihat ve cihât-ı sâiresinin mûmâ-ileyh Hasan Adlî Efendi uhdesinden ref'i ve mûmâ-ileyhin niyâbetiyle evlâd-ı müşârun-ileyhten olduğu hükmen sâbit olan sagîr Kenan ve Seyfullah Efendi Dergâhı meşihatının Mustafa Nûri Efendi uhdesinden ref'i ve yine mûmâ-ileyhin niyâbetiyle kezâ evlâd-ı müşârun-ileyhten sagîr Turhan'a tevcih ve berâtları i'tâ olunmuştur.

Mûmâ-ileyhimâ Hasan Adlî ve Mustafa Nûri efendiler Mahkeme-i Evkâfta ikâme eyledikleri da'vâda Âdile Sultân vakfiyesindeki cihât-ı mezkûre Seyyid Nizâmeddin evlâdından Şücâeddin Efendi'ye ve evlâdına ve inde'l-inkırâz biraderlerinin batnen ba'de batnin evlâdlarından babalarının tarîkine sâlik âbid ve zühd ve irşâda kâdir olmak şürûtunu sagîrân-ı mezbûrân hâiz olmadıklarından inde'l-bülûğ kesb-i ehliyyet ve taleb eyledikleri hâlde icâbına bakılmak üzere cihât-ı mezkûrenin asâleten uhdeslerinde ibkâsını iddi'â ve ol vechile i'lâm istihsâl ederek Seyyid Seyfullah Efendi Dergâhı meşihati hakkındaki i'lâm Fetvâhâne-i Âlî ve Meclis-i Tedkikât-ı Şer'iyyece görüldükten sonra Şûrâ-yı Evkâf'a lede'l-havâle [0084] mahkemece istinâd olunan nukât başlıca Seyyid Seyfullah Efendi'nin vakfiyesi mukayyed olmadığından şart-ı tevcih bilinemediği gibi cihet-i mezkûrenin te'âmülen Seyyid Nizâmeddin evlâdına tevcih olunageldiğine dâir murâfa'a-i şer'iyye cereyân etmemesinden ve sagîr-i merkûm Turhan'ın müteveffâ

Şücâeddin Efendi'nin mahdûmu olmayıp biraderinin hafidi bulunmasından ibâret olduğu anlaşılmış ve hâlbuki Kuyûd-ı Vakfiyye İdâresi'nden muhrec kayıdda merhûm Seyyid Seyfullah Efendi'nin İstanbul'da Silivrikapısı dâhilinde Arabacıbayezid Mahallesi'nde Emirler Tekkesi demekle şehîr tekkesinin Seyyid Nizâmeddin evlâdına meşrût meşihat ciheti Seyyid Nizâmeddin evlâdından Mehmed Necib Efendi uhdesinde iken 1264 târihinde biraderzâdesi evlâd-ı seyyid-i müşârun-ileyhten Seyyid Ali ve hafidi sagîr Hasan'a ve onun vefâtıyla nisf hissesi 1266 târihinde uhdesindeki hisseye ilhâken mûmâ-ileyh Seyyid Ali'ye ve onun vefâtıyla 1292 târihinde Seyyid Şücâeddin Efendi'ye tevcih olduğu gösterilmekle beraber Şeyh Bayram Dede Vakfı hakkında ihbâra müsteniden 987 târihinde tanzim edilmiş olup Kuyûd-ı Vakfiyyece vakfiye makâmında müseccel bulunan hüccet-i şer'iyede İstanbul'da mahalle-i mezkûrede binâ eylediği zâviyesiyle Silivrikapısı hâricinde binâ eylediği zâviyesi hayatta oldukça kendisine ba'dehû neslen ba'de neslin evlâda ve inkırâzlarında es-Seyyid Nizâmeddin Efendi'ye ve ba'dehû neslen ba'de neslin bunun evlâdına vakf eylediği musarrah bulunduğu anlaşılmış olup ber-vech-i muharrer Kuyûd-ı Vakfiyye kaydı evlâd-ı müşârun-ileyhe yekdiğerini müte'akıb üç tevcihi ihtivâ ederek mertebe-i te'âmüle çıktığı gibi sâlifü'z-zikr hüccet mündericâtı te'âmül ile teyyüd etmekte bulunmasına ve sagîr-i mûmâ-ileyhin Seyyid Nizâmeddin evlâdından olduğu Mahkeme-i Evkâfın kaziyeye-i mahkeme hâlini iktisâb eden i'lâmı mündericâtıyla rehîn-i rütbe-i sübût olmasına binâen dergâh-ı mezkûr meşihat cihetinin Mustafa Nûri Efendi'den ref'iyle mûmâ-ileyh niyâbetiyle seyyid-i müşârun-ileyh evlâdından sagîr Turhan'a tevcihi hakkındaki kararın ittihâza şûrâca zarûret görüldüğü ve aynı sûretle mu'ameleye ma'rûz kalmış olan Seyyid Nizâmeddin Dergâhı meşihati hakkındaki evrâk üzerine dahi ittihâz olunan kararda mu'amelât-ı ma'rûza Tevcih-i Cihât Nizâmnâmesi'yle münhasıran Şûrâ-yı Evkâfa mevdû' bulunan salâhiyete istinâden ve Bayram Dede Vakfı hakkında mevzû'-ı bahis olan hüccet mündericâtıyla meşihat-i mezkûrenin seyyid-i müşârun-ileyh evlâdı uhdesinde te'âmül mertebesine varan tedâvülünü müsbit Kuyûd-ı Vakfiyye kaydına tebe'an ifâ edilmiş olmasına ve hükkâmın münferiden tevcih-i cihât emrindeki salâhiyetleri ol bâbdaki nizâmnâme mücebince mürtefi' olduğundan dolayı bahs olunan i'lâm-ı ahîrde hilâf-ı salâhiyyet i'tâ edilmiş olmağla beraber esâsen bir hükmü tazammun edemeyeceği tabî'î olup inhâ mâhiyetinde olmağla Mahkeme-i Temyîz-i Şer'iyeye dâiresince görülmüş olması da bu mâhiyeti tağyîr ve tebdil etmeyeceği cihetle vâcibü't-tenfiz bir kat'iyet-i hükmiyyeyi ifâde edemeyeceği fi 16 Mayıs sene [1]333 târihli ve 814 numaralı müzekkirede beyân ve Tevcih-i Cihât Nizâmnâmesi'nin gayr-i meşrûta cihâta mutasarrıf iken vefât edenlerin bıraktıkları evlâd-ı sığârın muhâfaza-i hukûku zımnında [0085] usûl-i niyâbeti kabûl ve te'yîd ve şimdye kadar da mu'amele o yolda cereyân ettiği hâlde evlâdiyet vechile meşrûta cihâta henüz isbât-ı ehliyetle mükellef tutulacak sinn-i nizâmîye vâsıl olmamış sığâr için nizâmnâme-i mezkûrun bu usûlü adem-i tatbîke âmir telakkî edilmesi ahkâm-ı umûmiyyeden müstanbat rûh-ı nizâma külliyyen münâfi olduğundan bahisle iki kıt'a derkenârla i'lâm-ı mezkûr ve evrâk-ı sâire mahkemeye i'ade edilmiştir.

Bi'l-âhare keyfiyyet temyîz olundukta vakfiye ve vesâik-i sâire müeddâlarına nazaran imâmetten mâ'adâ meşihat ve tevlîyet ve cihât-ı sâire ez-kadîm Seyyid Nizâmeddin evlâdına tevcih edile geldiği ve o miyânda sagîr de bulunduğu müstefâd olmağla Âdile Sultân Vakfiyesinin şûrûtu ancak kendi vakfı ve ihdâs eylediği cihâtın tevcihi hakkında i'mâliyle dergâh-ı mezkûr meşihati mine'l-kadîm evlâd-ı müşârun-ileyhâya tevcihi müte'âmil olduğu münfehim olan cihât-ı

sâirenin tevcihinde te'âmül-i kadîmin muhâfazası muktezî bulunduğundan istinâfen tedkîk ve faslı zımnında kazaskerlik mahkemesine tevdî'ine mahkeme-i temyîz-i şer'iden 31 Kânûn-ı sâni sene [1]334 târihinde karar verildiği dosyasında mahfûz i'lâm-ı mezkûr zahrında muharrer derkenârdan anlaşılmıştır. Mûmâ-ileyh Mustafa Nûri Efendi'nin meşihat-i mezkûrenin uhdesinden ref'i muhâlif-i nizâm tahakkuk ederek uhdesinde ibkâsı lüzûmuna dâir verilen i'lâm Mahkeme-i Temyîz-i Şer'îye dâiresince tasdik edildiğinden bahs ile istid'â-yı ma'delet zımnında Şûrâ-yı Devlet'e mürâca'atı üzerine Şûrâ-yı Evkâf ve Meclis-i Meşâyih'in bu bâbdaki mütâla'aları lede'l-istifsâr Şûrâ-yı Evkâf sâlifü'l-arz müzekkire ve derkenârlarından bahisle evlâd-ı sıgâra meşrûta olduğunu beyân etmiş ve Meclis-i Meşâyih'te Şûrâ-yı Evkâfca istinâd olunan Bayram Dede vakfiyesinin gerek Seyyid Nizâmeddin ve gerek Seyyid Seyfullah zâviyelerine ta'alluku olmayıp Bayram Dede Zâviyesi ile mevzû'-ı bahs olan Seyyid Nizâm ve Seyyid Seyfullah efendiler zâviyelerinin başka başka olduğunun inde't-tahkîk nümâyân olduğunu bâ-müzekkire arz eylemiştir.

Ber-vech-i ma'rûz cereyân etmiş olan mu'âmelât neticesinde Şûrâ-yı Devlet'ten tanzim kılınan mazbatada sâlifü'z-zikr Mahkeme-i Teftiş-i Evkâftan i'tâ olunan i'lâmın Mahkeme-i Temyîz-i Şer'îye dâiresince nakz edildiği anlaşılmışa binâen ahîran neşr olunan Meclis-i Meşâyih Nizâmnâmesi mücebince işin mercî'-i tedkiki olan meclis-i mezkûrda yeniden tedkiki ile hâsıl olacak neticeye göre bir karar ittihazı lüzûmu beyân kılındığından evrâk dosyasının leffiyile vârid olup Meclis-i Meşâyih'e havâle buyurulan fi 11 Rebî'ülâhîr sene [1]337 ve fi 14 Kânûn-ı sâni sene [1]335 târihli ve husûsî yirmi numaralı tezkire-i sâmiye üzerine kemâ fi's-sâbık [0086] Bayram Dede vakfiyesi Seyyid Seyfullah Efendi Dergâhı için medâr-ı istinâd olamayacağından cihet-i mezkûre için dahi cihât-ı gayr-i meşrûta hakkındaki ahkâmın tatbikiyle tevcih-i evvel vechile meşihatın asâleten Mustafa Efendi uhdesinde ibkâsı lüzûmuna dâir üçüncü defa olarak tanzim ve takdim kılınan 19 Rebî'ülâhîr sene [1]337 târihli ve üç numaralı mazbata makâm-ı sâmi-i Cenâb-ı Meşihat-penâhîlerinden mûcib-i âliye iktirân etmeyip husûs-ı mebhûs hakkındaki te'âmül ve merbûtât miyânında bulunan Kuyûd-ı Kadîme-i Vakfiyye'nin kuyûd-ı resmiyesi nazar-ı dikkate alınarak icâbı beyân buyurulmak üzere Fetvâhâne-i âlî'ye havâle buyurulması üzerine "Bu gibi cihâtın tevcihi ve ona mûte'allik husûsâtın tedkiki Meclis-i Meşâyih'e âid olmağla işâret buyurulan te'âmül ciheti tedkîk ve icâb eden karar ittihaz olunmak üzere" 28 Cumâdelâhire sene [1]337 târihli ve 26 numaralı derkenârla mezkûr mazbata ve evrâk-ı müteferri'a takımıyla Meclis'e tevdî' edilmiştir.

İcâb-ı maslahat lede't-teemmül işâret-i aliyye-i Cenâb-ı Fetvâ-penâhîleriyle Fetvâhâne-i âlî'nin kararı mücebince husûs-ı mebhûsün-anh hakkındaki te'âmül ve kuyûd-ı resmiye nokta-i nazarından bu husûsa dâir olan dosya be-tekrar tedkîk ve mütâla'a olundukta Şûrâ-yı Devletce dahi hükmü fesh edilmeyen Şûrâ-yı Evkâfın sâlifü'l-arz 16 Mayıs sene [1]333 târihli müzekkiresinde bast u beyân edilmiş olduğu üzere Seyyid Nizâmeddin ve oğlu Seyyid Seyfullah efendiler hazerâtı dergâhları meşihat ve cihât-ı sâiresinin mine'l-kadîm azîz-i müşârun-ileyh evlâdına meşrûta ve ol vechile tevcihi mûte'âmil olduğu Kuyûd-ı Vakfiyye İdâresi'nin kuyûd-ı resmiyesiyle sâbit ve mûtehakkık olmasına ve ahîran sagîr Kenan ve Turhan'ın vasîleri tarafından ibrâz olunup mütâla'a ve birer kıt'a sûret-i musaddakaları dosyaya vaz' olunan birisi Seyyid Seyfullah Efendi'nin sulbi sıgâr evlâdı aleyhine dergâhın mebnî bulunduğu havâli bâ-berât uhdesine tefvîz olunan Bekir Paşa tarafından ikâme edilen da'vâsı üzerine evâsıt-ı Cumâdelûlâ sene 998

târihinde bizzât Seyyid Seyfullah Efendi huzûr-ı mahkemede isbât ettiği vakfiyeyi nâtık i'lamı hâkî olmağa tedkikât-ı lâzime bi'l-icrâ hükm-i mezkûru te'kiden verilmiş ve diğeri seyyid-i müşârun-ileyhin evlâdı beyninde zuhûr eden cihet münâza'ası üzerine 18 Şa'bân sene [1]145 "1145 târihinden muhtasar olacak" târihinde sâdır olmuş hükmü hâvî iki kıt'a i'lam-ı şer'ide Silivrikapısı dâhilinde Arabacıbayezid Mahallesi'nde ve bâb-ı mezkûr hâricinde Bayram Dede tarafından binâ edilip kendisine ba'dehû evlâdına ve inkırâzında Seyyid Nizâmeddin Efendi'ye ve ba'dehû neslen ba'de neslin müşârun-ileyhin evlâdına meşrûta olduğu beyân olunan zâviyeler el-yevm Seyyid Nizâmeddin hazretlerinin medfûn bulunduğu bâb-ı mezkûr hâricindeki hânkâh ile dâhilinde bulunan ve Emirler Tekkesi denilmekle ma'rûf olan Seyyid Seyfullah Dergâhı olduğu tasrîh ve tavzîh edilmiş olduğundan bu sûretle de mes'ele bir kat daha tenevvür etmiş ve Şûrâ-yı Devlet ile Fetvâhâne-i âlî'nin kararlarında tasrîh edilmiş olduğu vechile tekâyâya müte'allık bi'l-cümle cihâtın tevcih ve ref'i salâhiyyeti fi 6 Şevvâl sene [1]336 târihli Meclis-i Meşâyih Nizâmnâmesi ahkâmıyla Meclis-i dâ'iyânemize mevdû' bulunmasına binâen [0087] Seyyid Nizâmeddin Hânkâh-ı şerîfi meşihat cihetiyle imâmet ve hitâbet ve türbedârlık ve haffâr-ı kabr cihetlerinin mûmâ-ileyh Şeyh Hasan Adlî Efendi niyâbetiyle ve şart-ı vâkıf ve te'âmül-i kadîm vechile bâ-berât-ı âlî mutasarrıfı evlâd-ı müşârun-ileyhten sagîr Seyyid Kenan b. Servet'in ve Seyyid Seyfullah Efendi Dergâh-ı şerîfi meşihatının mûmâ-ileyh Şeyh Mustafa Nûri Efendi niyâbetiyle ve kezâ şart-ı vâkıf ve te'âmül-i kadîm vechile bâ-berât-ı âlî mutasarrıfı bulunan evlâd-ı müşârun-ileyhten sagîr Turhan b. Servet'in uhdelerinde kemâ-kân ibkâlarına bir re'y-i muhâlîfe karşı ekseriyyet-i ârâ ile karar verilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhileri buyurulduğu takdîrde mu'amele-i kaydiyye ifâ ve tecdîden icâb eden berâtları tastîr ve i'tâ olunmak üzere mazbata-i dâ'iyânemizin ve matviyyen takdîm kılınan dosyanın leffiyle Evkâf-ı Hümâyûn Nezâret-i celîlesine tezkire-i aliyye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik
Muhâlif-i re'yim, esbâb-ı muhâlefetim merbût varakada muharrerdir.

Ali

IST_MFT_MSH_DFT02_01740_0001-0001-0088

İstanbul'da Şeyh Ebülvefâ Dergâhı türbedarlarından Ahmed Münif Efendi'nin vefatı üzerine, yerine Ahmed Efendi'nin tayini.

Fî 10 Ramazan sene [1]337 / Fî 9 Haziran sene [1]335 / - / - / - / Sîret / - / 17 / Fî 15 Ramazan sene [1]337 [14 Haziran 1919] / Fî 14 Haziran sene [1]335

Mazbata

Der'aliyye'de Şeyh Ebülvefâ hazretleri dergâh-ı şerîfi dâhilinde türbe-i şerîfeleri türbedarlarından Ahmed Münir Efendi'nin vukû'-ı vefâtına mebnî inhilâl eden türbedârlık cihetinin uhdelerine tevcihi dergâh-ı mezkûr postnişini Mehmed Sâlih ve tarikat-i aliyye-i Halvetiyye hulefâsından Ahmed efendiler tarafından istid'â olunması üzerine lede't-tahkîk Türbedâr Ahmed Münir Efendi'nin fî 17 Nisan sene [1]335 târihinde bilâ-veled vefât ettiği mahallesi hey'et-i ihtiyâriyyesinden mu'tâ ilmühaberden ve türbe-i mezkûrenin üç aded türbedârlık cihetlerinden biri elli guruş vazîfe-i şehriyye ile müteveffâ-yı mûmâ-ileyhin ve yüz guruş vazîfeli diğerinin

müsted'î Şeyh Mehmed Sâlih Efendi'nin uhdelerinde bulunduğu İstanbul Vilâyeti Evkâf Müdiriyyeti'nin fî 5 Haziran sene [1]335 târihli tezkire-i cevâbiyyesinden anlaşılmıştır.

İcâbı teemmül olundukta müsted'ilerden Şeyh Sâlih Efendi uhdesinde aynı hizmet ile imâmet ve meşihat ve cihât-ı sâire bulunduğundan vezâifine hâlel gelmemek için cihet-i mahlûlenin kendisine tevcihi münâsib olamayacağına ve türbedârlığın vaz'-ı aslîsi üzere üç kimse uhdelerde kalması hizmetin terk ve tekâsülden vikâyesini mûcib olacağına binâen hizmet-i münhallem-i mezkûreyi bi-hakkın ifâya ehil ve muktedir bulunan müsted'î Ahmed Efendi uhdesine tevcihi tensib edilmekle rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'amele-i kaydiyyenin icrâsıyla berât-ı âlî i'tâ olunması husûsunun mazbata-i dâ'iyânemizin leffiyile bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa Sabri, Ali, Tevfik

Yazılmıştır

IST_MFT_MSH_DFT02_01740_0001-0001-0089

Sultan Abdülmecid Han Türbesi hatm-i hâcegân görevlilerinden İlbasanlı Süleyman b. Ahmed, Rifat b. İsmâil, Hafız Mustafa b. Arif ve Mûsâ b. Mahmud efendilere ayrı ayrı berat ve maaş cüzdanları verilmesi.

28 Şa'bân sene [1]337 / 28 Mayıs sene [1]335 / - / - / - / Sîret / - / 16 / 5 minhü [4 Haziran 1919] / 4 minhü

Mazbata

Cennet-mekân Sultân Abdülmecid Hân hazretlerinin türbe-i şerîfesinde icrâsı meşrûta olan kâri-i hatm-i hâcegân cihetleri hizmetleri muntazaman edâ ve ifâ olunduğundan bahisle emsâli vechile nâmlarına berât-ı âlî i'tâsı talebini hâvî verilen arzuhâller üzerine cereyân eden tedkikâtta cihât-ı mezkûrenin nevi' ve mâhiyetleri i'tibârıyla ahîran mevki'-i tatbika vaz' olunan nizâmname mücebince Meclis-i Meşâyih'e âid olduğundan iktizâsının Meclis-i dâ'iyânemizce ifâsı hakkında Şûrâ-yı Evkâf kararı ve ol bâbdaki evrâkın leffi ile Evkâf-ı Hümâyûn Nezâret-i celîlesinden vârid olan 19 Receb sene [1]337 ve 21 Nisan sene [1]335 târihli ve husûsî 52 numaralı tezkire ve melfûfâtı ve hatm-i şerîf kırâeti ma'âşlarının şimdiye kadar Şeyh Nimetullah Efendi'nin ma'âş cüzdanında mukayyed olarak tesviye edilegelmekte ise de bu sûret miyânelerinde karışıklığı ve müşkilâtı mûcib olmakta idiğinden ba'demâ diğer refikleri misilli her birerlerine ayrı ayrı birer cüzdan tanzîm ve i'tâ olunmasını müsted'î mürîdândan Hâfız Süleyman ve Musa ve Rifat ve Hâfız Mustafa efendiler tarafından bi't-takdîm havâle buyurulan arzuhâl birleştirilerek kırâet ve tedkik olundu.

Evrâk-ı mezkûre mündericâtına nazaran türbe-i müşârun-ileyhâda beher hafta Cuma geceleri on nefer mürîdânıyla hatm-i hâcegân şeyhi tarafından usûl-i Hâlidîyye üzere hatm-i hâce kırâet edilmek şart olup 16 Zilhicce sene [1]325 târihinde meşihat-i mezkûre şehri doksan guruş vazîfe ile uhdesine tevcih olunmuş olan Ahmed Nimetullah Efendi'nin kırk guruş vazîfe-i şehriyyeleri bulunan Hacı Sâlih ve Mustafa Âsım ve Hâfız Mustafa ve Ali ve Dâim ve sagîr Süleyman'a niyâbeten Ali ve İlbasanlı Süleyman ve Rifat ve Hâfız Mustafa ve Musa efendiler nâmlarında on nefer mürîdânla şart-ı vâkıf mücebince hatm-i hâcegân kırâet etmekte oldukları ve mûmâ-ileyhimden İlbasanlı Süleyman b. Ahmed ve Rifat b. İsmâil ve Hâfız Mustafa b. Arif ve Musa

b. Mahmud efendilere henüz berât verilmediği ve mâ'adâsının yedlerinde berâtları ve ayrı ayrı vazîfe cüzdânları bulunduğu anlaşılmış ve icrâ edilen tahkîkât dahi sûret-i ma'rûzayı müeyyed bulunmuş olmasına binâen mûmâ-ileyhim dört nefer mürîdâna dahi emsâli vechile ayrı ayrı berât-ı âlî ve vazîfe cüzdânları i'tâsı tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde icrâ-yı îcâbı husûsunun bâ-tezkire-i aliyye cevâben iş'âr ve evrâk-ı mezkûre ile işbu mazbatanın leffen tesyâr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki, Tevfik

IST_MFT_MSH_DFT02_01740_0001-0001-0090

İstanbul'da Sünbül Sinan Dergâhı'nda Vezir Koca Mustafa Paşa-yı Atik Camii ikinci imamı Ahmed Efendi'nin vefatıyla, yerine Bayezid Camii dersiâmı ve huzur dersi muhatabı Gelibolulu Hafız Mehmed Murad Efendi'nin tayini ve dergâhtaki diğer cihetlerin tevcihi.

10 Şa'bân sene [1]337 / 10 Mayıs sene [1]335 / - / - / - / Sîret / - / 15 / 12 minhü [13 Mayıs 1919] / 12 minhü

Mazbata

Âsitâne-i aliyyede Hazret-i Sünbül Sinan -kuddise sirruhu'l-Mennân- Hânkâh-ı şerîfi derûnunda kâin Vezîr-i esbak Koca Mustafa Paşa-yı Atik Câmî'-i şerîfi imâm-ı sânisî Ahmed Efendi'nin vefâtıyla inhilâl eden imâm-ı sânilîğin Bâyezid Câmî'-i şerîfi mücîz dersi'âmlarından ve huzûr-ı hümâyûn ders-i şerîfi muhâtablarından Gelibolulu Hâfız Mehmed Murad Efendi'ye ve müteveffâ Mehmed Hurşid Dede Efendi'den inhilâl eden kayyım-ı sânilik cihetinin câmî'-i şerîf-i mezkûr müezzin-i akşamî Seyfeddin Dede Efendi'ye ve müezzin ve devirhân ve na'athân müteveffâ Hâfız Tevfik Efendi'den münhal müezzinlik hânkâh-ı mezkûr mürîdânından Mustafa Sâlih Efendi b. Mehmed'e ve devirhânlığın kezâ dergâh-ı mezkûr müntesibânından Hâfız Abdullah Fevzî Efendi b. Hâfız Hasan'a ve na'athânlık ile şehîden vefât eden Hâfız Mustafa Efendi'den inhilâl eden devirhânlığın câmî'-i şerîf-i mezkûr müezzinlerinden Hâfız Hasan Fehmî Efendi ibn. İbrâhîm'e tevcihleri ehliyetlerine binâen hânkâh-ı mezkûr postnişini vekîli reşâdetlü eş-Şeyh Mehmed Vahyî Efendi tarafından huzûr-ı sâmi-i Cenâb-ı Meşîhat-penâhîlerine takdîm olunup Meclis-i dâ'iyânemize havâle buyurulan üç kıt'a istid'ânâme ile arz ve inhâ olunması üzerine lede'l-havâle Evkâf-ı Hümâyûn Kuyûd-ı Vakfıyye ve İstanbul Evkâf müdîriyyetlerinden yazılan 15 Mart sene [1]335 ve 16 Nisan sene-i minhü târihli ve 729 ve 1381 numaralı derkenârlardan cihât-ı mezkûrenin müteveffâ-yı mûmâ-ileyhim uhdelinde bulunduğu anlaşılmıştır.

Îcâbı lede'l-müzâkere câmî'-i şerîf-i mezkûrda bulunan cihât-ı ilmiyye ve bedeniyyenin hânkâh-ı mezkûrda postnişin bulunan zevâtın inhâları ile ehil ve müstahıklarına tevcih olunması fermân-ı hümâyûn iktizâ-yı âlisinden olmağla sâbika icrâsına lüzûm olmayıp yalnız ehliyet imtihânlarının icrâsı karâr-gîr olmuş ve Hâfız Mehmed Murad Efendi'nin sâlifü'l-arz ulemâ-yı kirâmdan ve mesbûku'l-imtihân zevâtından olmağla beraber ilm-i kırâetten ve mâ'adâ Seyfeddin ve Mustafa Sâlih ve Abdullah Fevzî ve Hâfız Hasan Fehmî efendilerin Tevcih-i Cihât Nizâm-nâmesi ahkâmına tevfiқан îcâb eden ulûmdan imtihânları bi'l-icrâ her birerlerinin inhâ olunan vezâifi hüsn-i ifâya ehil ve muktedir bulundukları tebeyyün ettiğine binâen cihât-ı münhal-ı ânifenin vezâif-i mu'ayyene-i hâzıralarıyla ber-vech-i inhâ mûmâ-ileyhim uhdeline tevcihi tensîb

edilmekle sûret-i ma'rûza nezd-i sâmî-i Cenâb-ı Fetvâ-penâhîlerinde rehîn-i tasvîb buyurulduğu hâlde mu'âmele-i mukteziyyenin icrâ ve lâzım gelen berât-ı âlileri tastîr ve i'tâ olunması husûsunun mazbata-i dâ'iyânemizin leffiyle Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Tefîk
Yazılmıştır

IST_MFT_MSH_DFT02_01740_0001-0001-0091

Yedikule'de Mirahor İlyas Bey Dergâhı'ndaki caminin bevvâbı Ali Rıza Efendi'nin vefatı üzerine, yerine biraderi Mehmed b. Mehmed Velî'nin tayini.

26 Receb sene [1]337 / 27 Nisan sene [1]335 / - / - / 75 / Sîret / - / 14 / 29 minhü [30 Nisan 1919] / 30 minhü

Mazbata

Der'aliyye'de Yedikule civârında Mirahor-ı Evvel İlyas Bey Dergâh-ı şerîfi derûnundaki câmi'-i şerîfin müteveffâ biraderi Ali Efendi'den inhilâl eden bevvâblık cihetinin uhdesine tevcihi istid'âsına dâir dergâh-ı mezkûr dervîşânından Mehmed imzâsıyla makâm-ı sâmî-i Cenâb-ı Meşihat-penâhîlerine takdîm olup havâle buyurulan 23 Cemâziyelevvel sene [1]337 târihli ve 147 numaralı istid'ânâme üzerine Evkâf-ı Hümâyûn Nezâret-i celîlesi Kuyûd-ı Vakfiyye İdâresi'nden yazılan 13 Mart sene [1]335 târihli ve 706 numaralı derkenârda câmi'-i şerîf-i mezkûrun şehri yirmi dört gurus vazîfe ile bevvâblığı 7 Safer sene [1]321 târihinde Ali Rıza Efendi b. Mehmed Velî'ye tevcih olunduğu mukayyed ise de vâkıf İlyas Bey'in vakfiyesinde bevvâb nâmıyla bir cihet ihdâs edildiğine dâir sarâhat görülemediği ve İstanbul Evkâf Müdiriyyeti'nin 16 Nisan sene [1]335 târihli ve 1362 numaralı derkenârında dahi câmi'-i şerîf-i mezkûr bevvâblık ciheti vazîfesi olarak şehri yirmi dört gurus vazîfesinin mûmâ-ileyh nâmına tesviye edilmekte olduğu beyân edilmiştir. Mahallinde icrâ kılınan tahkîkât neticesinde mûmâ-ileyh Ali Rıza Efendi'nin bir buçuk sene mukaddem vefât ettiği ve evlâd-ı zükûru bulunmadığı ve bir müddetten beri fâhrî olarak bevvâblık hizmetini müsted'î Mehmed Efendi hüsn-i ifâ etmekte olduğu anlaşılmış olmasına binâen mezkûr bevvâblığın müteveffâ-yı mûmâ-ileyh Ali Rıza Efendi mahlûlünden vazîfe-i mu'ayyenesiyle müsted'î-i mûmâ-ileyh Mehmed b. Mehmed Velî uhdesine tevcihi tensîb edilmekle tasvîb-i sâmî-i Cenâb-ı Meşihat-penâhîlerine iktirân eylediği hâlde mu'âmele-i mukteziyyenin icrâsı zımında mazbata-i dâ'iyânemizin leffiyle nezâret-i müşârun-ileyhâya tezkire-i aliyye tastîr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Tefîk

IST_MFT_MSH_DFT02_01740_0001-0001-0092

İstanbul'da Uzunyusuf Mahallesi'nde Kelâmî diğer adıyla Süleymaniye Evkafı Kâtibi Hacı Mustafa Efendi Zaviyesi tevhitanesinin hatibi Yusuf Efendi'nin, Yıldız'daki Hamidiye Camii imam ve hatipliğine tayin edilmesiyle, yerine dergâhın postnişini Şeyh Esad Efendi b. Said'in tayini.

27 Receb sene [1]337 / 28 Nisan sene [1]335 / - / İstid'â 282 / 141 / Sîret / - / 13 / 29 minhü [30 Nisan 1919] / 30 minhü

Mazbata

İstanbul'da Uzunyusuf Mahallesi'nde Kelâmî unvânıyla müştehir Süleymaniye Evkâfı kâtibi Hacı Mustafa Efendi Zâviyesinin tevhîdhânesinde ber-vech-i hasbî hitâbet cihetinin mutasarrıfı Yusuf Efendi'ye ahîran Yıldız'da kâin Hamidiye Câmî'-i Şerîfinin imâmet ve hitâbet cihetleri tevcih olunmasından dolayı zâviye-i mezkûre hitâbet ciheti inhilâl etmiş olduğundan bahisle Meclis-i Meşâyih Nizâmnâmesi ahkâmınca mu'âmele-i tevcihiyyenin Meclis-i dâ'iyânemiz tarafından icrâsı muktezî bulunduğuna dâir Şûrâ-yı Evkâfın 23 Mart sene [1]335 târîhli ve 789 numaralı derkenârı mücebince Evkâf-ı Hümâyûn Nezâret-i celîlesinden mazrûfen irsâl olup havâle buyurulan mu'âmeleli arzuhâl kırâet ve icâbı teemmül olundu.

Hizmet-i mezkûre hasbî bulunduğu cihetle müsâbaka i'ânına lüzûm olmadığına ve tâlib olan zâviye-i mezkûre postnişini Şeyh Es'ad Efendi b. Said'in vazîfe-i mezkûreyi hüsn-i ifâya ehliyet ve kifâyeti müsellemler ve mesbûku'l-imtihân bulunduğu binâen ber-vech-i hasbî cihet-i münhalle-i mezkûrenin mûmâ-ileyhe tevcihi tensib edilmekle rehîn-i tasvîb-i sâmi-i Cenâb-ı Meşîhat-penâhileri buyurulduğu takdîrde mu'âmele-i mukteziyye ifâ ve berât-ı âlisi tastîr ve i'tâ olunması husûsunun mazbata-i dâ'iyânemizin leffîyle bâ-tezkire-i aliyye nezâret-i müşârun-ileyhâya iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Tevfik

IST_MFT_MSH_DFT02_01740_0001-0001-0093

Mevlevîhane Yenikapı'da Hacı Mahmud Mescidi'nin şeyhi Sâlih Selâhaddin Efendi'nin vefatıyla yerine, Şeyh Ali Hüsâmeddin Efendi b. İbrâhim'in tayini.

13 Receb sene [1]337 / 14 Nisan sene [1]335 / - / - / - / Sîret / - / Mazbata 12 / 13 minhü [14 Nisan 1919] / 14 minhü

Sûret

(Mücebince fî 12 Receb sene [1]337)

Mazbata

Mevlevîhâne Yenikapısı hâricinde evkâf-ı mülhakadan Hacı Mahmud Mescid-i şerîfinde tarikat-i aliyye-i Şa'bâniyye usûl ve ezkârı icrâsına meşrûta meşîhat ciheti pederi Şeyh Sâlih Salâhaddin Efendi mahlûlûlünden hâl-i sıgarında Şeyh Halil Efendi niyâbetiyle 19 Receb sene [1]320 târihinde Şemseddin Efendi uhdesine tevcih olduğunu Meclis-i dâ'iyânemiz kuyûdundan ve bi't-taleb Kuyûd-ı Vakfiyye İdâresi'nden ihrâc olunan fî 2 Muharrem sene [1]337 târih ve 3162 numaralı kayıd sûretinden müstebân olup mûmâ-ileyh Şemseddin Efendi el-yevm yirmi yaşını mütecâviz olduğu hâlde Hısnımansur Kazâsı Müdde'-i Umûmîliğinde müstahdem ve nâibi Şeyh Halil Efendi bundan akdem vefât etmiş olmasına mebnî cihet-i mezkûre vezâfî metruk ve mu'attal kaldığı tahkîkât-ı vâkı'adan anlaşılmışla Meclis-i Meşâyih ve Tevcih-i Cihât nizâmnâmeleri ahkâmına tevfikân bi'l-imtihân isbât-ı ehliyetle mezkûr ciheti der'uhde ve bizzât ifâ-yı vazîfe edip etmeyeceği mûmâ-ileyh Şemseddin Efendi'den istifsâr olunarak alınacak cevâbın inbâsı hakkında Meclis-i dâ'iyânemiz ifâdesiyle sebk eden iş'âr-ı âliye cevâben kazâ-yı mezkûr müftülüğünden vârid olup havâle buyurulan 29 Safer sene [1]337 târîhli ve iki numaralı tahrîrâtta melfûfu tezkire zîrine mûmâ-ileyhin kendi hattıyla muharrer ve mühr-i zâtîsi ile mahtûm derkenârda cihet-i mezkûreye tâlib olmaktan istinkâf ettiği arz ve iş'âr edilmiş

ve müteveffâ Şeyh Sâlih Efendi'nin hayatta başka evlâd-ı zükûru olmadığı bi't-tahkîk anlaşılmış olduğundan inhilâl eden meşihat-i mezkûra şart-ı vâkıf vechile tarikat-i aliyye-i Şa'bâniyye'den ehil ve müstahıkkına tevcîh olunmak üzere müsâbaka i'lân olundukta yegâne tâlib olan tarikat-i mezkûre hulefâsından Ali Hüsâmeddin Efendi'nin usûl ve nizâmına tevfikân imtihânı lede'l-icrâ ehliyet ve kifâyeti nümâyân olduğuna binaen sâlifü'l-arz meşihat cihetinin şehri kırk gurus vazife-i mu'ayyenesiyle mûmâ-ileyh Şeyh Hüsâmeddin Efendi b. İbrâhîm uhdesine tevcîhi tensîb edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhileri buyurulduğu takdirde mu'amele-i mukteziyye îfâ ve berât-ı âlîsi tastîr ve i'tâ olunması husûsunun mazbata-i dâ'iyânemizin leffîyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa Hakî, Seyyid Mehmed es-Sükûtî, Mustafa, Ali, Mehmed Abdülbâki,

Tevfik

Yazılmıştır

IST_MFT_MSH_DFT02_01740_0001-0001-0094

İstanbul Koska'da Sa'diyye tarikatı pîri, Abdüsselâm Efendi Hankahı postnişini Hikmet Efendi'nin azliyle, yerine Yusuf Zâhir Efendi'nin tayini.

28 Cumâdelâhire sene [1]337 / 31 Mart sene [1]335 / - / - / - / Sîret / - / 11 / Fî 28 minhü [31 Mart 1919] / 31 minhü

Sûret mücebince 28 Cemâziyelaahir sene [1]337

Mazbata

Der'aliyye'de Koska'da kâin tarikat-i aliyye-i Sa'diyye'nin Pîr-i sâni Abdüsselâm hazretlerinin medfûn bulunduğu hânkâh-ı şerîfin postnişini Hikmet Efendi'nin tahakkuk eden mesâvî-i ahvâline ve icrâ kılınan nesâyih ve tenbîhât-ı mükerrereye rağmen ıslâh-ı nefis etmemesine mebnî uhdesinden cihet-i meşihatın ref'i hakkında Meclis-i dâ'iyânemizden tanzîm ve takdîm kılınan müzekkire makâm-ı sâmi-i Meşihat-penâhilerinden 22 Cumâdelûlâ sene [1]337 târihinde tasvîb-i âliye iktirân etmekle inhilâl eden cihet-i mezkûre için tarikat-i aliyye-i Sa'diyye meşâyih ve hulefâsından tâlibler miyânında müsâbaka icrâ olunacağı i'lân edildikten sonra yevm-i mu'ayyende isbât-ı vücûd eden Şeyh Abdurrahman Sâmi ve tarîk-i mezkûr hulefâsından Yusuf Zâhir Efendilerin nizâmen lâzım gelen zevâtın huzûrlarıyla icrâ kılınan imtihân neticesinde mûmâ-ileyhimâdan Sâmi Efendi vasatî hesâb ile kırk altı ve bir rub' ve Zâhir Efendi kırk beş buçuk numara kazanmışlardır. Ancak Sâmi Efendi'nin esâsen tarikat-i aliyye-i Kâdiriyye'den olup tarikat-i Kâdiriyye'den Yahya Kethüdâ Dergâhı şeyhi bulunduğu hâlde tarikat-i Sa'diyye'den dahi müstahlef olduğuna dâir ibrâz ettiği icâzetnâme tedkîk ve lâzım gelen tahkîkât icrâ olundukta matlabını te'mîn maksadıyla sümme't-tedârik teberrûken alınmış bir icâzetnâme olduğu anlaşılmış ve meşihat cihetlerine tâlib olacak zevâtın yedlerinde tezkire-i nefis ve tasfiyye-i kalb ile ikmâl-i seyr ü sülûk eylemiş ve irşâd-ı enâma me'mûr bulunmuş olduklarını mübeyin hilâfet icâzetnâmelerinin bulunması lâzım olduğu ve yalnız intisâb ve ahz-ı tarîk nâmına teberrûken i'tâ edilegelen icâzetnâme sâhiblerine meşihat cihetleri tevcîh olunmayacağı ol bâbdaki ta'lîmâtın ikinci ve müte'addid turuk-ı aliyye meşâyihinden ahz-ı tarîk nâmına teberrûken yedinde müte'addid icâzetnâmeler bulunan zât hangi tarikat-i aliyye usûl ve ezkârı üzerine seyr

u sülûk ile hilâfet icâzetnâmesi almış ise ancak o tarikat-i aliyyeye meşrûta olan meşihat cihetine ta'yîn olunacağı üçüncü maddeleri ahkâmından bulunmuş olduğundan mûmâ-ileyhin imtihânı lağv addolunmuştur. Diğer Yusuf Zâhir Efendi ise aslâ tarikat-i aliyye-i Sa'diyye'den seyr u sülûk ile hilâfet icâzetnâmesi almış ve silsile-i tarîki doğrudan doğruya pîr-i sâni-i müşârun-ileyhten bulunmuş olup hüsn-i sülûk ve sîret erbâbından olmasına ve ehliyet ve kifâyeti sâlifü'l-arz bi'l-imtihân tebeyyün etmesine binâen meşihat-i münhalle-i ma'rûzanın vazîfe-i mu'ayyenesiyle mûmâ-ileyhin uhdesine tevcihi müttefikan tensib edilmekle sûret-i ma'rûza rehîn-i tasvib-i âlî-i Cenâb-ı Fetvâ-penâhîleri buyurulduğu takdîrde mu'amele-i mukteziyye ifâ ve berât-ı âlîsi i'tâ olunmak üzere mazbata-i dâ'iyânemizin leffîyle Evkâf-ı Hümâyûn Nezâret-i celîlesine tezkire-i aliyye tasâtir buyurulması bâbında.

Hakî, Vahyî, Seyyid Mehmed es-Sükûtî, Mustafa, Ali, Mehmed Abdülbâki, Tevfik

Yazılmıştır

IST_MFT_MSH_DFT02_01740_0001-0001-0095-96

Merdivenköy'de Şahkulu Sultan Zaviyesi şeyhi İzmirli Şeyh Ubeydullah Efendi'nin azliyle, türbedarlık vazifesine Muhyiddin Efendizâde Ahmed İsmet Efendi'nin tayini.

14 C. sene [1]337 / 17 Mart sene [1]335 / - / - / - / Sîret / - / 10 / 14 C. sene-i minhü [14 Mart 1919] / 17 Mart sene-i minhü / Sûret

(Mûcebince fi 14 C. sene [1]337)

Mazbata

Nerdübân karyesinde Şahkulu Sultân Türbe ve Zâviyesinin meşihat cihetinin bi'l-vekâle ve yâhûd bi'l-asâle uhdesine tevcihi istid'âsını hâvî Reîsü'l-ulemâ-i esbak merhûm Muhyiddin Efendizâde fazîletlü Ahmed İsmet Efendi tarafından takdîm olunup havâle buyurulan fi 1 Şubat sene [1]335 târihli arzuhâl kırâet ve tettebbu'ât-ı kuyûdiyye icrâ olundu.

İstinbât olunan ma'lûmât-ı kuyûdiyyeye nazaran mahall-i mezkûrda hem türbedâr ve hem zâviyedâr cihetleri mevcûd olduğu Evkâf-ı Hümâyûn Nezâret-i celîlesinin mülgâ Cihât İdâresi'nden muhrec kayıddan müstebân olmağla türbedarlık ile tarikat-i aliyye-i Nakşibendiyye usûl ve erkânı icrâ etmek üzere zâviyedârlik cihetleri Mehmed Ali Baba'nın mahlûlünden Hacı Ahmed Baba'ya tevcih olunduğu ve onun muhâlif-i şer' ahvâlinde dolayı ciheteyn-i mezkûreteynin uhdesinden ref'iyle zâviyedârlığın 26 Kânûn-ı sâni sene [1]330 târihinde uhdesine tevcih olunan İzmirli Şeyh Ubeydullah Efendi sûret-i gayr-i resmiyyede İbrâhîm Baba'yı tevkiil ederek diyâr-ı bâ'ideye gittiği ve bi'l-âhare vekil-i mûmâ-ileyh dahi isti'fâ etmesiyle Meclis-i dâ'iyânemiz tensibiyle Tevfik Efendi vekil ta'yîn edildiği anlaşılmıştır. Sâlifü'l-arz istid'â üzerine el-ân gaybûbeti temâdi eylediği ve hayat ve memâtı mechûl bulunduğu cihetle vazîfesi mûmâ-ileyh Ubeydullah Efendi nâmına bi'l-vekâle ifâ edilmekte olan cihetin şer'an ref'i lâzım gelip gelmeyeceği mütekaddem 19 Cumâdelülâ sene [1]337 târihli ve 27 numaralı kararıyla lede'l-istiftâ Meclis-i dâ'iyânemize muhavvel Fetvâhâne-i Âlî'nin 6 Cumâdelâhire sene [1]337 târihli derkenârında (Vazîfe-i mezkûrenin mutasarrıfı bulanan Ubeydullah Efendi'nin vekili terk-i hizmet etmekle şâğîr addolunur) cevâb-ı bâ-savâbı beyân buyurulmasına binâen cihet-i mezkûre mûmâ-ileyh Ubeydullah Efendi uhdesinden merfû' ve münhal addolunmuş vekil-i mûmâ-ileyh Tevfik Efendi'nin dahi vekâletten sükûtu zarûrî bulunmuştur.

Ancak müsted'î İsmet Efendi zâviye-i mezkûrenin meşihat cihetini taleb ve istid'â ediyor ise de zâviye-i mezkûre zâviyedârlık cihetlerinin tevcihinden sarf-ı nazarla derûnunda türbedârlık ve imâmet ve hitâbet cihetleri var ise yalnız o cihetlerin tevcih olunması cennet-mekân Sultân Mahmud Hân-ı Sâni hazretleri tarafından bin iki yüz kırk üç târihinde bâ-fermân-ı âlî irâde buyurulan zevâyâdan ve fermân-ı âlinin hükm-i celîli ilâ yevminâ hâzâ mer'ıyyü'l-icrâ bulunması hasebiyle [0096] kemâ-kân tarikat-i aliyye-i Nakşibendiyye usûl ve ezkârı icrâ olunmak üzere mezkûr Şahkulu Zâviyesi zâviyedârlığının mûmâ-ileyh Ubeydullah Efendi uhdesinden ref'i ve mezkûr türbedârlık cihetinin müsted'î-i mûmâ-ileyh ricâl-i ilmiyyeden Ahmed İsmet Efendi uhdesine tevcih ekseriyyet-i ârâ ile tensib edilmekle sûret-i ma'rûza rehîn-i tasvib-i sâmî-i Cenâb-ı Meşihat-penâhileri buyurulduğu takdirde mu'âmele-i mukteziyye ifâ ve berât-ı âlîsi tastîr ve i'tâ olunmak üzere mazbata-i dâ'iyânemizin bâ-tezkire-i aliyye Evkâf-ı Hümâyûn Nezâret-i celîlesine irsâl buyurulması bâbında.

Vahyî, Cevdet, Seyyid Mehmed es-Sükûtî, Mustafa, Ali, Tefvik

Muhâlifim

Mehmed Abdülbâki

Yazılmıştır

IST_MFT_MSH_DFT02_01740_0001-0001-0097

İstanbul'da Hekimoğlu Ali Paşa Dergâh ve Camii'nin ikinci kayyımlık görevinin Sancaktar Hayreddin Camii müezzini Hafız Ahmed Efendi'ye tevcih.

Fî 7 C. sene [1]337 / Fî 10 Mart sene [1]335 / - / - / - / Siret / - / 9 / Fî 9 C. sene-i minhü [12 Mart 1919] / 12 minhü

Mazbata

Der'aliyye'de Hekimzâde Ali Paşa Dergâh ve Câmi'-i şerîfinde münhal bulunan şehri iki yüz gurus tahsîsâtı kayyım-ı sânilik cihetinin Sancakdâr Hayreddin Câmi'-i şerîfi müezzini olup zühd ü salâh ashâbından ve hizmet-i mezkûreyi bi-hakkın ifâya muktedir bulunan Hâfız Ahmed Efendi uhdesine tevcih dergâh-ı mezkûr postnişini ve câmi'-i şerîf serkayyımı Hasan Müfid Efendi tarafından bâ-arzuhâl ifâde veistirhâm olunması üzerine bi'l-havâle Kuyûd-ı Vakfiyye İdâresi'nden yazılan 14 Kânûn-ı sâni sene [1]335 târihli ve 56 numaralı derkenârda câmi'-i şerîf-i mezkûrda üç aded müezzin ve üç aded kayyım bulunması tasnif icâbâtından ise de henüz müezzin-i sâlis ve kayyım-ı sâni ve sâlis cihetlerinin gayr-i müvecceh bulunduğu ve bâ-müzekkire vukû' bulan isti'lâma cevâben İstanbul Vilâyeti Evkâf Müdiriyyeti'nden yazılan 26 Şubat sene [1]335 târihli ve 329 numaralı derkenârda câmi'-i şerîf-i mezkûr hademesinin teselsülleri hakkındaki Şûrâ-yı Evkâfın 2 Temmuz sene [1]324 târihli kararı üzerine zamâim bi'l-icrâ bu miyânda hiç kimseye müvecceh olmayan kayyım-ı sânilik ciheti için müceddeden şehri iki yüz gurusun tahsîs kılındığı beyân edilmiş ve mûmâ-ileyh Hâfız Ahmed Efendi'nin müezzinliği uhdesinde bulunan câmi' harâb ve mesdûd olup cihet-i mezkûreyi terk edeceğini ifâde eylemiş olduğundan sâlifü'l-arz kayyım-ı sânilik cihetinin tahsîsât-ı mezkûre ile mûmâ-ileyhin uhdesine tevcih tensib edilmekle rehîn-i tasvib-i sâmî-i Cenâb-ı Meşihat-penâhileri buyurulduğu takdirce müzekkirenin işâret-i aliyye-i Fetvâ-penâhileriyle tevşih ve mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Mehmed Abdülbâki, Safvet

IST_MFT_MSH_DFT02_01740_0001-0001-0098

Eyüp'te Mihrişah Vâlide Sultan Türbesi hatm-i hâce görevlilerinden Şeyh Mustafa Saim Efendi'nin istifası ve Hafız Kâzım Efendi'nin de vefatı üzerine, yerlerine Ahmed Rifat ve Ali Nizâmeddin efendilerin tayini.

2 C. sene [1]337 / 5 Mart sene [1]335 / - / - / - / Sîret / - / 8 / 5 C. sene [1]337 [8 Mart 1919] / 8 Mart sene [1]335

Mazbata

Hazret-i Ebâ Eyyûb el-Ensârî -radiye anhü'l-Bârî- civârında kâin merhûme Mihrişah Vâlide Sultân Türbesinde yevm-i ahad ve hamîsde ba'de salâti'l-asr hatm-i hâcegân kırâeti cihâtı mutasarrıflarından Şeyh Mustafa Saim Efendi'nin ma'zeret-i meşrû'asından dolayı isti'fâsına ve Hâfız Kâzım Efendi'nin vukû'-ı vefâtına mebnî iki cihetin inhilâl etmesine ve mezkûr cihetlerin hîn-i inhilâlinde Özbekî Abdullah Efendi ve Şeyh Murad Efendi ve Şah Sultân ve Mustafa Paşa zâviyeleri müntesibîninden ehil ve muktedirlerine tevcîhi şart-ı vâkıf iktizâsından bulunmasına binâen Şah Sultân Dergâhı dervîşânından ve hüsn-i hâl ashâbından olup ciheteyn-i mezkûreteynin uhdelerine tevcîhi muvâfık olacağı Şeyh Murad Dergâhı şeyhi efendi tarafından inhâ olunan Ahmed Rifat ve Ali Nizâmeddin efendilerin hatm-i şerîf-i mezkûrun kırâetine kifâyet ve ehliyetleri Meclis-i dâ'iyânemizde nümâyân olduğundan ciheteyn-i mezkûreteynin vazîfe-i mu'ayyeneleriyle mûmâ-ileyhimânın uhdelerine tevcîhi tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu hâlde mu'âmele-i mukteziyyenin icrâsı zımnında işbu mazbatanın mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Mehmed Abdülbâki, Safvet

Yazılmıştır

IST_MFT_MSH_DFT02_01740_0001-0001-0099

İstanbul'da Şeyh Ebülvefâ Dergâhı'ndaki türbenin Hasan Hüsnü Efendi'den münhal türbedarlık cihetinin, dergâhın postnişini Şeyh Mehmed Sâlih Efendi b. Mustafa Hazım Efendi'ye tevcîhi.

25 Ca. sene [1]337 / 26 Şubat sene [1]335 / - / - / - / Sîret / - / 7 / 5 C. sene-i minhü [8 Mart 1919] / 8 Mart sene-i minhü

Arzuhâl zahrındaki Kuyûd-ı Vakfiyye derkenârı vakfiye defterine kaydolunacaktır.

Mazbata

Der'aliyye'de Şeyh Ebülvefâ hazretleri dergâh-ı şerîfinde kâin türbe-i şerîfelerinde Hasan Hüsnü Efendi'den inhilâl eden türbedârlik cihetinin uhdesine tevcîhi istid'âsına dâir dergâh-ı mezkûr postnişini Şeyh Mehmed Sâlih Efendi tarafından takdîm olunup havâle buyurulan merbût arzuhâl ve zahrında muharrer Kuyûd-ı Vakfiyye İdâresi derkenârı kırâet ve icâbı müzâkere olundu.

Azîz-i müşârun-ileyh evkâf-ı şerîfesinden almak üzere şehri ellişer gurus vazîfe ile türbe-i şerîflerinde üç aded türbedâr cihetlerinden bir adedi 13 Mayıs sene [1]331 târihinde İslimye muhâcirlerinden Hasan Hüsnü Efendi uhdesine tevcîh olunduğu ve vakfiyesi mukayyed olmaması hasebiyle şerâit-i tevcîhiyyesi mechûl bulunduğu idâre-i mezkûrenin 3 Rebî'ülevvel sene

[1]337 târihli derkenârından ve mûmâ-ileyh Hasan Hüsnü Efendi'nin üç yüz otuz dört senesi şehr-i Teşrîn-i sânisî'nin on üçünde bilâ-veled vefât eylediği Şeyh Ebûlvefâ Mahallesi imâmıyla üç zât tarafından mahtûm ve mumzâ merbût ilmühaberden anlaşılmış ve tekâyâ dâhilinde bulunan bu misilli cihâtın bulunduğu dergâh meşâyih ve mensûbînine tevcihi muvâfık olup müsted'î Şeyh Mehmed Sâlih Efendi ibn-i Mustafa Hazım dahi mezkûr türbedârlık vazîfesini hüsn-i îfâya her vechile muktedir sulehâdan bulunmuş olmasına binâen cihet-i mezkûrenin vazife-i mu'ayyenesiyle mûmâ-ileyh uhdesine tevcihi tensîb edilmekle karîn-i tasvîb-i sâmi-i Cenâb-ı Meşihat-penâhîleri buyurulduğu hâlde mu'amele-i mukteziyyenin icrâsı zımnında mazbata-i dâ'iyânemizin mazrûfen Evkâf-ı Hümâyûn Nezâret-i celîlesine irsâl buyurulması bâbında.

Vahyî, Seyyid Mehmed es-Sükûtî, Mustafa, Ali, Mehmed Abdülbâki, Safvet
Yazılmıştır

IST_MFT_MSH_DFT02_01740_0001-0001-0100

Haseki'deki Bayram Paşa Dergâhı'nın vaiz ve kayyımı Seyyid Mehmed Servet Efendi'nin vefatıyla, vaizliğe Şeyh Mehmed Ali Efendi b. Şeyh Esad Efendi'nin; Şeyh Mehmed Ali Efendi'den münhal müezzinliğe de Ayaşlı Hafız Nuh Efendi b. Hafız Emin Efendi'nin tayini.

11 Ca. sene [1]337 / 10 Şubat sene [1]335 / - / - / 18 / Siret / - / 6 / 14 Ca. sene-i minhü [15 Şubat 1919] / i 15 Şubat sene-i minhü

Mazbata

Haseki'de kâin Bayram Paşa Dergâhında münhal va'aziye ve kayyım cihetlerinin uhdesine tevcihi istid'âsına dâir dergâh-ı mezkûr postnişini ve imâmı Şeyh Mehmed Ali Efendi tarafından bi't-takdim Evkâf-ı Hümâyûn Nezâret-i celîlesinden mazrûfen vârid olup havâle buyurulan merbût istid'ânâme ve müteferri'âtı kırâet ve icâbı müzâkere olundu.

Evrâk-ı mezkûre mündericâtına ve Kuyûd-ı Vakfiyye İdâresi'nin 3 Teşrîn-i evvel sene [1]333 târihli derkenârı müeddâsına nazaran evkâf-ı mazbûtadan Vezîr-i esbak merhûm Bayram Paşa Vakfından almak üzere şehri birer buçuk guruş vazîfe ile Avratpazarı'nda kâin zâviyesinde evkât-ı selâsede müezzin ve kayyım cihetleri 8 Safer sene 1305 târihinde eş-Şeyh Ali Efendi'ye ve yevmî yirmi akçe vazife ile vâkıf-ı müşârun-ileyhin türbesinde vâ'iz ciheti de 11 Receb sene [1]258 târihinde es-Seyyid Mehmed Servet Efendi'ye tevcih olunduğu ve cihât-ı mezkûre mu-tasarıflarının tevârih-i muhtelifede vefât etmeleriyle el-yevm münhal bulunduğu ve evlâd-ı zükûrları olmadığı anlaşılmış ve dergâh derûnunda bulunan türbedeki mezkûr va'aziye ciheti için müsâbaka imtihânı icrâ olunacağı matbû'ât vâsıtasıyla i'lân olunup tâlib zuhûr etmemiş olmasına ve müsted'î Şeyh Mehmed Ali Efendi b. eş-Şeyh Es'ad Efendi Dâru'l-hilâfeti'l-aliyye Medresesinden me'zûn ve mesbûku'l-imtihân bulunmasına binâen sâlifü'l-arz va'aziye ve kayyım cihetlerinin vazife-i mu'ayyeneleriyle mûmâ-ileyhin ve müezzinlik cihetinin dahi vazife-i mu'ayyenesiyle doksan dokuz tevellüdlü olup hizmet-i askeriyesini bi'l-îfâ terhîs edilmiş olan ve lede'l-imtihân ehliyeti tebeyyün eden Ayaşlı Hâfız Nuh Efendi ibn-i Hâfız Emin uhdelerine tevcihi tezekkür ve tensîb edilmekle sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'amele-i kaydiyeleri icrâ ve berât-ı âlîleri i'tâ olunmak üzere işbu mazbata-i dâ'iyânemizle müteferri'âtının bâ-tezkire-i aliyye nezâret-i müşârun-ileyhâya irsâl buyurulması bâbında.

Vahyî, Mehmed Abdülbâki, Ali, Safvet
Yazılmıştır

IST_MFT_MSH_DFT02_01740_0001-0001-0101

Aksaray'da Sekbanbaşı Yâkub Ağa Zaviyesi şeyhi Hüseyin Hüsnü Efendi'den münhal meşihate, Şeyh Seyyid Mustafa Safvet Efendi b. Şeyh Seyyid Muhyiddin Abdülkâdir Sıddîkî Efendi'nin tayini.

5 Ca. sene [1]337 / 6 Şubat sene [1]335 / - / - / - / Sîret / - / 5 / Fî 7 Ca. sene [1]337 [8 Şubat 1919] / Fî 8 Şubat sene [1]335

Mazbata

Evkâf-ı mazbûradan merhûm Sekbanbaşı Ya'kûb Ağa'nın İstanbul'da Aksaray civârında kâin zâviyesinde yevmî on iki akçe vazîfe ile şeyh-i zâviye ciheti Hüseyin Hüsnü Efendi'nin uhdesinde iken vefâtıyla cihet-i mezkûre kebîr mahdûmu Mehmed Ali Efendi'ye tevcih olunmaksızın mûmâ-ileyhin dahi vefâtı vukû'una mebnî cihet-i mezkûre fudelâ-yı kirâmdan Şeyh Safvet Efendi vekâletiyle taht-ı silâhta bulunan oğlu İbrâhîm Efendi uhdesine tevcihi mülgâ Meclis-i Meşâyihce tensîb edilmiş ise de pederine müvecceh olmayan bir cihetin bi'l-vekâle mûmâ-ileyhe tevcihine mesâğ-ı nizâmî olmadığı ve müteveffâ-yı mûmâ-ileyhin uhdesinden inhilâl eden Bursa'da kâin Kaygulu Dergâhı meşihatının Şeyh Nail Efendi vekâletiyle mûmâ-ileyhe tevcih olunduğuna dâir mahallî encümen-i meşâyihî tarafından mürsel mazbata 19 Muharrem sene [1]337 târihli ve kırk yedi numaralı müzekkire ile bi't-tasdik mu'âmele-i mukteziyyesi icrâ kılındığı kayden müstebân olduğundan sâlifü'l-arz Ya'kûb Ağa Zâviyesiyle mûmâ-ileyhin hiçbir alâkası kalmadığı cihetle mukaddemâ icrâ edilen mu'âmele muhâlif-i nizâm görölerek müsâbaka imtihânı icrâ olunmak üzere keyfiyyet matbû'ât vâsıtasıyla i'lân olunup müddet-i mu'ayyene zarfında tâlib zuhûr etmemesine ve dergâh-ı mezkûrun vakfiyesi ve binâen-aleyh şart-ı tevcihi ma'lûm olmayıp ancak tarikat-i aliyeye-i Kâdiriyye meşâyihine tevcihi müte'âmil bulunmağ-la el-yevm vazîfe-i meşihati bi'l-vekâle ifâ etmekte olan Bayram Paşa Dergâhı meşihatinden müsta'fî tarikat-i aliyeye-i Kâdiriyye ecille-i meşâyihinden ve fudelâ-yı benâmdan Şeyh Seyyid Mustafa Safvet Efendi ibn-i eş-Şeyh Seyyid Muhyiddin Abdülkâdir Sıddîkî Efendi'nin meşihat-i mezkûreye ta'yini min külli'l-vücûh münâsib olacağı tezekkür edilmiş olmasına binâen sûret-i ma'rûza rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i kaydiyye icrâ ve berât-ı âlisi i'tâ olunmak üzere işbu mazbata-i dâ'iyânemizin leffiyle Evkâf-ı Hümayûn Nezâret-i celîlesine tezkire-i aliyeye tastîr buyurulmak bâbında.

Vahyî, Mehmed Abdülbâki, Mustafa, Ali

Yazılmıştır

IST_MFT_MSH_DFT02_01740_0001-0001-0102

Eyüp'te Lâlizâde diğer adıyla Özbekler Dergâhı şeyh vekili Emîr Buhârî Dergâh postnişini ve Meclis-i Meşâyih azası Şeyh Mustafa Efendi'nin istifasıyla, vekâlete Kâşgarlı Hacı Mehmed Behlül Efendi'nin tayini.

24 R. sene [1]337 / 27 Kânûn-ı sâni sene [1]335 / - / - / 68 / Sîret / - / 4 / Fî 26 R. sene [1]337 [29 Ocak 1919] / Fî 29 Kânûn-ı sâni sene [1]335

Mazbata

Hazret-i Ebâ Eyyûb el-Ensârî -radiye anhü'l-Bârî- civâr-ı rahmet-medârında kâin tarikat-i aliyeye-i Nakşibendiyye'den La'lizâde nâm-ı diğer Özbekler Dergâh-ı şerîfi meşihat cihetinin

bundan evvel hîn-i inhilâlinde şart-ı vâkıf mücebince tarîkat-i aliyye-i mezkûreden ve dergâh sekenesinden kalenderân ta'bir olunur mücerredân-ı Özbekiyye'den olup şeyhlik evsâfını hâiz olması lâzım gelen bir zât fi'l-hâl bulunamamasından vakfiyede munderic şûrût-ı ahkâmına muvâfık bir asıl bulununcaya değin Meclis-i dâ'iyânemizin iltimâsıyla a'zâdan ve tarîkat-i aliyye-i Nakşîyye'den Emir Buhârî Dergâh-ı şerîfi postnişîni Şeyh Mustafa Efendi dâ'ileri ber-vech-i hasbî vazîfe-i mezkûreyi vekâleten der'uhde etmiş ve ol bâbda takdîm kılınan fî gurre-i Zilhicce sene [1]337 ve fî 7 Eylül sene [1]335 târihli ve üç numaralı mazbataya binâen mu'âmele-i mukteziyye ifâ buyurulmuş idi. Efendi-i mûmâ-ileyhin hasbe'l-ma'zere bu kere vekâlet-i mezkûreden isti'fâ etmesine ve Kaşgar ahâlîsinden ve tarîkat-i aliyye-i Kâdiriyye ve Nakşîyye meşâyihinden olup cihet-i mezkûrenin kendisine tevcihîni muhavvel arzuhâlinde istid'â ve istirhâm eden el-Hâc Mehmed Behlül Efendi'nin müsin ve erbâb-ı irfândan bir zât bulunmasına mebnî ileride şart-ı vâkıf vechile asâleten intihâb edildiği icâbı ifâ olunmak üzere şimdilik cihet-i mezkûrenin vekâleten uhdesine tevcihî tezekkür ve tensîb edilmekle sûret-i ma'rûza karîn-i tasvîb-i sâmi-i Cenâb-ı Meşihat-penâhîleri buyurulduğu takdîrde icrâ-yı icâbı husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve işbu mazbatanın leffen tesyâr buyurulması bâbında.

Vahyî, Mustafa, Ali, Mehmed Abdülbâki, Safvet

Yazılmıştır

IST_MFT_MSH_DFT02_01740_0001-0001-0103-104

Silivrikapı'da Seyyid Seyfullah Efendi Dergâhı'nın Şeyh İbrâhim Şücâeddin Efendi'den münhal meşihatine Şeyh Hafız Mustafa Nûri Efendi'nin asaleten tayini.

17 R. sene [1]337 / 21 Kânûn-ı sâni sene [1]335 / - / - / - / Sîret / - / 3 / Fî 19 R. sene-i minhü [22 Ocak 1919] / Fî 22 [Kânûn-ı sâni] sene-i minhü

Mazbata

Der'aliyye'de Silivrikapısı dâhilinde kâin Seyyid Seyfullah Efendi Dergâh-ı şerîfi meşihat ciheti bilâ-evlâd-ı zükûr vefât eden Şeyh İbrâhim Şücâeddin Efendi mahlûlünden ve cihât-ı meşrûtadan olmadığından usûl ve nizâmı dâiresinde fî 26 Şa'bân sene [1]334 târihinde bi'l-imtihân tarîkat-i aliyye-i Halvetiyye'den Şeyh Hâfız Mustafa Nûri Efendi uhdesine tevcih buyurulmuş olduğu hâlde bi'l-âhare Bayram Dede vakfiyesi mücebince cihet-i mezkûrenin Seyyid Nizâmeddin hazretleri evlâdına meşrûta olduğu cihetle tevcih-i vâkı' hilâf-ı şart-ı vâkıf olduğundan ve seyid-i müşârun-ileyh evlâdından oldukları hükmen sâbit olan sagîr Kenan ve Turhan efendilerin meşrûtün-leh bulunduklarından bahisle vukû' bulan iddi'aya binâen Şûrâ-yı Evkâfca mûmâ-ileyhin uhdesinden cihetin asâleti ref' edilerek niyâbetiyle sagîr Turhan'a tevcih olunması üzerine Şeyh Hâfız Mustafa Efendi'nin cihet-i mezkûrenin asâleten uhdesinde ibkâsı lüzûmuna dâir Evkâf-ı Hümâyûn Mahkemesinden istihsâl eylediği fî 3 Cumâdelûlâ sene [1]335 târihli i'lâm-ı şer'îye karşı Şûrâ-yı Evkâf tarafından karâr-ı sâbıkta ısrâr edilmiştir.

Karâr-ı mezkûr aleyhine şeyh-i mûmâ-ileyhin vâkı' olan iddi'â ve istid'âsına mebnî Meclis-i dâ'iyânemizin mütâlâ'asını müstefsir Şûrâ-yı Devlet Riyâset-i celîlesinden vârid olup havâle buyurulan fî 9 Zilhicce sene [1]336 târihli tezkireye melfûf dosyanın tedkîki ve me'mûrîn-i mahsûsa ma'rifetiyle icrâ edilen tahkîkât-ı müşîkâfâne neticesinde Şûrâ-yı Evkâfin yegâne

medâr-ı istinâdı olan mezkûr Bayram Dede vakfiyesinin dergâh-ı mezkûra ta'alluku olmayıp Bayram Dede Zâviyesiyle Seyyid Seyfullah Efendi Dergâhının başka başka olduğu tahakkuk ettiğine dâir takdîm olunan mufassal ve müdellel fî 14 Muharrem sene [1]337, fî 21 Teşrîn-i evvel sene [1]334 târîh [0104] ve 45 numaralı müzekkire ile arz olunan dosya bâ-tezkire-i cevâbiyye riyâset-i müşârun-ileyhâya irsâl buyurulmuş idi. Bu kere vârid olup havâle buyurulan fî 11 Rebî'ülâhîr sene [1]337, fî 1 Kânûn-ı sâni sene [1]335 târîh ve 341273 umûmî ve 2 husûsî numaralı tezkire-i sâmiyede müzekkire-i mezkûre müfâdına nazaran Şûrâ-yı Evkâfın zikrolunan meşîhat cihetinin mûmâ-ileyh Mustafa Nûri Efendi uhdesinden ref'i hakkındaki kararının feshi icâb etmekte olmasına ve ma'a-mâfih zikrolunan meşîhatın mûmâ-ileyhin uhdesinde ibkâsını mutazammın olarak mukaddemâ Mahkeme-i Evkâftan i'tâ olunan i'lâmın da Mahkeme-i Temyîz-i Şer'iyye dâiresince nakzedildiği ibrâz olunan evrâk meâllerinden anlaşılmasına binâen Meclis-i Meşâyih Nizâmnâmesi mücebince işin merci'-i tedkiki olan Meclis-i dâ'iyânemizce yeniden tedkiki ile hâsıl olacak neticeye göre bir karar ittihâzı lüzûmu Şûrâ-yı Devlet Mülkiye ve Ma'ârif dâiresinden mu'tâ mazbataya atfen beyân ve evrâk-ı mevcûdenin i'ade kılındığı zikr ve ityân buyurulmuştur.

Keyfiyyet lede'l-müzâkere sâlifü'l-arz müzekkire-i mütekaddimede netice-i tedkikât ve tahkikâta ibtinâen arz olunduğu vechile Bayram Dede vakfiyesi Seyyid Seyfullah Efendi Dergâh-ı şerîfi için medâr-ı isnâd ve ihticâc olamayacağından cihet-i mezkûre hakkında cihât-ı gayr-i meşrûtaya âid ahkâmın tatbiki muktezî olduğuna ve Şeyh Hâfız Mustafa Nûri Efendi'ye esâsen bi'l-asâle tevcihi ise Mahkeme-i Temyîz-i Şer'iyye dâiresince nakz edildiği beyân buyurulan i'lâmın hük-müne mübtenî ve müstenid olmayıp Tevcih-i Cihât Nizâmnâmesi ahkâmı dâiresinde cereyân eylemiş bulunduğuna binâen dergâh-ı mezkûr meşîhatının tevcih-i evvel vechile bi'l-asâle mûmâ-ileyhin uhdesinde ibkâsıyla ona göre Kuyûd-ı Vakfiyyenin tashîhi ve müceddeden berât-ı âlî tastîr ve i'tâsı lüzûmu tezekkür kılınmağla sûret-i ma'rûza rehîn-i tasvib-i sâmi-i hazret-i Fetvâ-penâhileri buyurulduğu takdîrde ol vechile icrâ-yı icâbı husûsunun bâ-tezkire-i aliyye Evkâf-ı Hümâyûn Nezâret-i celîlesine iş'âr ve işbu mazbata ile nezâret-i müşârun-ileyhâya âid olup matviyyen takdîm kılınan mârru'l-arz dosyanın leffen tesyâr buyurulması bâbında.

Vahyî, Mustafa, Cevdet, Ali, Mehmed Abdülbâki, Safvet

IST_MFT_MSH_DFT02_01740_0001-0001-0105

İstanbul Laleli'de Kurşunlu Türbe yanındaki Müştakzâde Dergâhı'nın yarım hisse meşîhatine mutasarrıf Şeyh Ahmed Rifat Efendi'nin vefatı üzerine; hissesinin, diğer yarım hisse müşteriki Şeyh Mehmed Müştak Efendi b. Ali Rıza Cemâleddin'e tevcihi.

Fî 3 R. sene [1]337 / Fî 6 Kânûn-ı sâni sene [1]335 / - / - / - / Sîret / - / 2 / Fî 15 R. sene [1]337 [18 Ocak 1919] / Fî 18 Kânûn-ı sâni sene [1]335

Mazbata

İstanbul'da Laleli civârında Kurşunlu Türbe nezdinde kâin merhûm Ali Çavuş'un binâ-kerdesi olup Müştakzâde nâmıyla ma'rûf dergâhın nısf hisse meşîhat cihetinin mutasarrıfı Şeyh Ahmed Rifat Efendi'nin vukû'-ı vefâtına mebnî inhilâl eden mezkûr nısf cihetinin ilâveten uhdesine tevcihi istid'âsına dâir müşteriki Şeyh Mehmed Müştak Efendi tarafından takdîm olunup havâle buyurulan istid'ânâme ile Kuyûd-ı Vakfiyye Kalemi Müdîriyyeti'nin ol bâbdaki 23 Kânûn-ı

evvel sene [1]334 târihli ve 34/3638 numaları müzekkiresi kırâet ve îcâbı müzâkere olundu.

Müzekkire-i mezkûre müfâdına ve meclis kuyûduna nazaran yevmî beş akçe vazîfe ile dergâh-ı mezkûr meşihat cihetinin nısf hissesi 19 Muharrem sene [1]267 târihinde tarîkat-i aliyye-i Halvetiyye'den Şeyh Ahmed Rif'at ve nısf-ı diğeri 18 Zilka'de sene [1]316 târihinde el-Hâc Mehmed Müştak Efendi ibn-i Ali Rıza Cemâleddin'e tevcih buyurulmuş olduğu anlaşılmış ve mûmâ-ileyh Şeyh Ahmed Rif'at Efendi'nin geçende irtihâl-i dâr-ı bekâ [etmesine] mebnî inhilâl eden nısf hisse-i mezkûrenin Tevcih-i Cihât Nizâmnâmesi'nin on dokuzuncu maddesi ahkâmına tevfiikan îfâ-yı vazîfeye ehliyet ve kifâyeti ma'lûm olan müstereki müsted'î-i mûmâ-ileyh Mehmed Müştak Efendi uhdesine tevhiiden tevcihi tensîb edilmiş olmağla rehîn-i tasvîb-i sâmi-i Cenâb-ı Meşihat-penâhîleri buyurulduğu takdîrde mu'âmele-i mukteziyye îfâ ve berât-ı âlîsi tastîr ve i'tâ olunması husûsunun işbu mazbata-i dâ'iyânemizin leffiyle bâ-tezkire-i aliyye Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mustafa, Ali, Mehmed Abdülbâki, Safvet

Yazılmıştır

IST_MFT_MSH_DFT02_01740_0001-0001-0106-107

Kırşehir'de Hacı Bektâş-ı Velî Dergâhı postnişinliğine tayin edilen Şeyh Ömer Fârûkî Efendi'nin, görevine gitmeden vefat etmesiyle yerine Şeyh Hasan Efendi'nin tayini.

27 Ra. sene [1]337 / 31 Kânûn-ı evvel sene [1]334 / - / - / - / Sîret / - / 1 / Fî 28 Ra. sene [1]337 [1 Ocak 1919] / 1 Kânûn-ı sâni sene [1]335

Mazbata

Kırşehri'nde kâin Hacı Bektâş-ı Velî -kuddise sirruhu'l-Celî- hazretleri hânkâh-ı şerîfi postnişinliğine 20 Safer sene [1]337 târihinde ta'yîn buyurulan Şeyh Ömer Farukî Efendi mahall-i mezkûra kabl'l-azîme irtihâl-ı dâr-ı bekâ etmesine mebnî cihet-i mezkûre inhilâl etmiştir.

Ma'lûm-ı hakâyık-melzûm-ı Cenâb-ı Fetvâ-penâhîleri buyurulduğu üzere hânkâh-ı mezkûr postnişinliğine Ankara vilâyetinden vukû' bulan iş'âr vechile tarîkat-i aliyye-i Nakşîyye usûl ve ezkârını icrâ ve kasaba ile mütecâvir nevâhî halkına eyyâm-ı mübâreke ve evkât-ı münâsibede va'az u nasihat îfâ eylemek şartıyla hasbe'n-nizâm mahallince ehil ve muktedir bir zâtın intihâb ve inhâsı hakkında Meclis-i dâ'iyânemiz îfâdesiyle sebk eden iş'âr-ı âliye cevâben Ankara Merkez Müftülüğünden vârid olan 5 Eylül sene [1]334 târihli tahrîrâtta o havâlîde tarîkat-i aliyye-i Nakşîyye mensûbîninden evsâf-ı matlûbeyi hâiz kimse bulunmadığından Dersâadet'ten ehil bir zâtın ta'yîn ve îzâmı arz ve beyân edilmiş ve müsâbaka için evvelce mükerreren vukû' bulan i'lân üzerine mürâca'at edenlerden müteveffâ-yı mûmâ-ileyh Ömer Farukî Efendi'den mâ'adâsı evsâf-ı matlûbeyi hâiz olmadıkları tebeyyün etmiş olmasıyla Meclis-i dâ'iyânemiz a'zâsından olup i'lân-ı Meşrûtiyet'ten sonra makâm-ı âlî-i Meşihat-penâhîlerinden Irak ahâlîsine va'z u nesâyihe me'mûr buyurulup sekiz sene îfâ-yı hizmet eden sâdât-ı kirâmdan ve meşâyih-i Nakşibendiyye'den Sineli Şeyh Hasan Efendi dâ'îlerinin gerçi ma'âş-ı hâlîsiyle iki bin guruştan ibâret olan mezkûr postnişinlik tahsisâtı mikdârı müsâvî ise de derkâr olan ilim ve irfânıyla beraber icrâ-yı mevâ'iz husûsundaki ihtisâs ve melekese mebnî mahzâ bu sûretle dahi bir vecîbe-i dîniyye îfâ etmiş olmak üzere sâlifü'l-arz postnişinliğe ta'yîni muvâfık-ı hâl ve maslahat

olacağı mütâla'a ve tensîb edilmiş olduğundan sûret-i ma'rûza nezd-i sâmi-i hazret-i Fetvâ-penâhîlerinde rehîn-i tasvîb-i âlî buyurulduğu hâlde [0107] icrâ-yı icâbıyla iktizâ eden berât-ı âlînin istârı ve havâlenâmesinin bi't-tanzîm mahalline irsâli husûsunun mazbata-i dâ'iyânemizin leffiyle Evkâf-ı Hümâyûn Nezâret-i celîlesine iş'âr buyurulması bâbında.

Vahyî, Mehmed Cevdet, Mustafa, Ali, Mehmed Gülşen

Yazılmıştır

Mûcebince

İşâret-i aliyyesiyle tevşih buyurulmuştur.

Fî 28 Rebî'ülevvel sene [1]337 [1 Ocak 1919]

IST_MFT_MSH_DFT02_01740_0001-0001-0108

Merdivenköy Şahkulu Sultan Dergâhı postnişini Şeyh Ubeydullah Efendi'nin vekil tayin ettiği İbrâhim Efendi'nin istifası üzerine, vekâlete Mehmed Tevfik Efendi'nin tayini.

5 Muharrem sene [1]337 / 12 Teşrîn-i evvel sene [1]334 / - / - / - / Sîret / - / 5 / Fî 5 Muharrem sene [1]337 [11 Ekim 1918] / Fî 12 Teşrîn-i evvel sene [1]334

Mazbata

Üsküdar'da Nerdübanlı karyesinde kâin Şahkulu Sultân Dergâhı postnişini vekîli İbrâhîm Efendi tarafından takdîm olunup havâle buyurulan 22 Eylül sene [1]334 târihli isti'fânâme ile vekâlet-i mezkûrenin uhdesine tevcihi istid'âsına dâir Mehmed Tevfik Efendi'nin istid'ânâmesi kırâet ve icâbı müzâkere olundu.

Dergâh-ı mezkûrda tarîkat-i aliyye-i Nakşîyye usûl ve erkânıyla zikir ve tevhîd ettirmek üzere postnişin bulunan Şeyh Ubeydullah Efendi'nin me'zûnen hidemât-ı vataniyye ile meşgûl olmasından dolayı tarafından ta'yîn etmiş olduğu vekîl-i mûmâ-ileyhin isti'fâsına mebnî vazîfesi mu'attal kalmamak için yerine diğer bir vekîl ta'yîni lâzım gelmesine ve vekâlet-i mezkûreye tâlib olan mûmâ-ileyh Mehmed Tevfik Efendi'nin ehliyet ve kifâyeti Meclis-i dâ'iyânemizce ma'lûm bulunmasına binâen tarîkat-i müşârun-ileyhâ usûl ve erkânı icrâ etmek üzere mûmâ-ileyhin dergâh-ı mezkûr postnişin vekâletine ta'yîni tensîb edilmekle rehîn-i tasvîb-i sâmi-i Cenâb-ı Meşîhat-penâhîleri buyurulduğu takdîrde mu'âmele-i mukteziyyenin îfâsı zımnında mazbata-i dâ'iyânemizin mazrûfen Evkâf-ı Hümâyûn Nezâreti Vekâlet-i celîlesine irsâl buyurulması bâbında.

Vahyî, Cevdet, Mustafa, Ali, Mehmed Abdülbâki, Safvet

Yazılmıştır